

Матфейла ГІяхІ хабар; Лукала гІяхІ хабар

Matthew and Luke in Dargwa (Dargin)

This Bible is copyrighted by Institute for Bible Translation, Moscow (ibtrussia.org) and is provided with permission at the cost of printing by the Digital Bible Society (dbs.org). This translation is made available to you under the terms of the Creative Commons Attribution-Noncommercial-No Derivatives license 4.0.

This Bible, and many others, are available for free download in a variety of digital formats at dbs.org/bibles.

Матфейли	4
ГІСА МАСИХІЛИЧИЛА ЛУКАЛА ГІЯХІ ХАБАР	32

Матфейли

Гіса МасихІла акІуди

1 Даудла Урши сайси, Ибрагъимла Урши Гіса МасихІла акІуди. ² Ибрагъимличивад Гісакъ акІуб, Гісакъличивад Якъуб акІуб, Якъубличивад биалли Ягъуда ва илала узби акІуб. ³ Ягъудачибад Фаресра, Фамарилизирадси Зарара акІуб, Фаресличивад биалли Есром акІуб, Есромличивад Арам акІуб. ⁴ Арамличивад – Аминадав, Аминадавличивад – Наассон, Наассонничивад – Салман. ⁵ Салманничивад – Рахавилизивадси Ваэз, Ваэзличивад – Руфилизивадси Явид, Явидличивад – Яссей. ⁶ Яссейличивад биалли, Дауд пача акІуб, Даудличивад ва гьалар Урияла хъунул рирурсилизивад Сулайбан акІуб. ⁷ Сулайбайчивад Раваам акІуб, Раваамличивад – Авия, Авиядличивад Асап акІуб. ⁸ Асапличивад – Ясапат, Ясапатличивад – Ярам, Ярамличивад Гіузия акІуб. ⁹ Гіузияличивад – Яапам, Яапамличивад – Ахаз, Ахазличивад Язекия акІуб. ¹⁰ Язекияличивад – Манассия, Манассияличивад – Амос, Амосличивад Ясия акІуб. ¹¹ Вавилоннизи жугъутІуни гужли гечбарес гьалаб Ясияличивад Ягъун ва илала узби акІуб.

¹² Вавилоннизи гечбиубхІели биалли, Ягъунничивад Салафаил акІуб. Салафаилличивад Зарабабел акІуб. ¹³ Зарабабелличивад Авиут акІуб, Авиутличивад – ЯлихІяким, ЯлихІякимличивад Гязур акІуб. ¹⁴ Гязурличивад Садокъ акІуб, Садокъличивад – ГІяхІим, ГІяхІимличивад Ялиут акІуб. ¹⁵ Ялиутличивад Ялазар акІуб, Ялазарличивад – Матпан, Матпанличивад Якъуб акІуб. ¹⁶ Якъубличивад, сунес МасихІ бикІуси, Гіса варкъибси Марияла мурул Юсуп акІуб.

¹⁷ Илкьяйда, Ибрагъимличирад Даудличи бикайчи лерилра наслуби вецінуавра сари: Даудличирад Вавилоннизи гечбиайчира вецінуавра наслу сари, Вавилоннизи гечбиубхІейчирад МасихІличи бикайчира вецінуавра наслу сари.

Гіса МасихІ дунъяличи вакІни

¹⁸ Гіса МасихІ акІуб ишкъяйда: илала неш Мария Юсуплис ураркъибси замана, хъайчикариэс гьаларал, Дурхъати РухІлизирад дурхІялиспраили уррухъун. ¹⁹ Илала мурул Юсупли биалли, сай

гІябид виъни багъандан, Иличила багъахъес хІейрули, дигІянали ил раткаэс къасбариб. ²⁰ Ил барес пикрибарибхІели, Аричила малаик муэрлизив иличи вакІили, иб: «Даудла урши Юсуп! Мария хъунулрарес урухмакІуд, илизиб акІубси Дурхъати РухІлизибадси сабину. ²¹ Илини Урши виркъу ва Илис хІуни Гіса ибси у бирхъид. ИлиникІун Сунела халкъ чула бунагъуназибад уцахъу. ²² Ил секІал бетаурси саби Аричини бурибси бетерхахъес багъандан. Аричини сунела идбагла гъайличибли бурибсири: ²³ „Иш Рурси дурхІялисприур ва Урши виркъу, сунесра Еммануил – Аллагъ нушачил сай – ибси ура бедлуга“». ²⁴ ГъанкІелизивад чеваргъибси Юсупли Аричила малаикли бурибсиван бариб: ил рурси сунела хъунулли къабулрариб. ²⁵ Урши варкъили, илис Гіса ибси у бихъайчи, Мариячил варххІеркули калун.

2 Иудеяла Вифлеемлизив Ирод пачали вируси замана, Гіса акІубхІели, машрикълизибад Ярусалимлизи пасихІкарти бакІили, бикІар: ² «Чинава акІубси жугъутІунала Пача? НушаникІун машрикълизиб Илала зубари чебаира ва Илис икрамбарес дакІилра». ³ Иличила бакъили, Ирод пачара, иличил бархли лебилра Ярусалимра зигарбухъун. ⁴ Лебилра хала кашишунира, Низамла ГІялимтира бучили, илдази суравбариб: «МасихІ чинав алкІуси?» ⁵ Илдани илизи иб: «Иудеяла Вифлеемлизив, сенкІун идбагла жузлизиб ишкъяйда белкІи саби: ⁶ „ХІура, Вифлеем, Иудала ванза, Иудала мер-мусаличиб сецадалра биштІали ахІенри, сенкІун хІезивад дакІуулхъан Гъавкъяна, Суненира Дила Израилла халкъ уцахъуси“». ⁷ ИлхІели Иродли, дигІянали, пасихІкарти жибарили, ва, илдазибад зубари дакІубулхъуси заманаличила багъурли, ⁸ илди Вифлеемлизи гъунибатурли, иб: «Дукъеная, ВиштІасиличила дурусли багъирая ва, Ил ВаргибхІели, набзира багъахъирая, нура Илис икрамбарес укъес багъандан». ⁹ Илди, пачачи лехІахъили, арбякъун. Машрикълизиб абулхъули чебаибси зубари, илдас гьалаб башули, ВиштІаси левси мерличи баили, ил мерла чедиб тІашбизур. ¹⁰ Зубари чебаили, илди хІекъли дебали разибиуб. ¹¹ Хъули абаціили, Марияличил ВиштІаси чеиб ва, къуьмусбикили, Илис икрамбариб. ГІур, чула къунби гьаргдарили, Илис савгъутуни кадихъиб: мургъи, тІемла секІли

ва гІявадеш. ¹² Муэрлизиб саби Иродличи чархІебухъахъес лишан бакІили, илди цархІил гьуникад бикили, чула улкализі арбякьун.

Юсупра Мариямра Мисрилизи бешни

¹³ Илди арбякьунхІели, Аричила малаик муэрлизив Юсупличі льякьули сай ва викІули сай: «ВиштІасира, илала нешра касили, Мисрилизи вебши ва, нуни хІези бурайчи, илав уэн. СенкІун Ирод ВиштІасилигІив умцІес дигули сай – Ил вебкІахъес багъандан». ¹⁴ Ил айзурли, ВиштІасира, Илала нешра касили, дуги-дугели Мисрилизи арякьун ¹⁵ ва, Ирод вебкІайчи, илав калун – Аричини бурибси бетерхахъес багъандан, сайра идбагла гъайличил викІуси: «Мисрилизиwad Нуни Дила Урши живарира».

БиштІати кабушни

¹⁶ ИлхІели Иродли, пасихІкарти сунечібад чебдукарбяхІни чебаили, хІекъли гІясиуубли ва бургъанти бархъили, пасихІкартазибад багъурси замана акІубти кІел дула ва илала удибти Вифлеемлизибти ва ил-алавла мер-мусаличибти дурхІни кабушахъиб. ¹⁷ ИлхІели Еремия идбагла гъайличил бурибси бетерхур, суненира ибси: ¹⁸ «ЦІакъти бисала ва чІярла тІама дакъибтири Рама шагъарлизир; Рахил, сунела дурхІнала черкад рисули, паргъатриэс рирули ахІен, сенкІун илди агарли».

Мисрилизибад чарбухъни

¹⁹ Ирод вебкІибхІели, Аричила малаик муэрлизив Мисрилизивси Юсупличі льякьули сай. ²⁰ Ил викІули сай: «Айзину, ВиштІасира, Илала нешра касили, Израилла ванзаличи арукъен, сенкІун ВиштІаси кавшес умцІути бекІили сабину». ²¹ Ил, айзурли, ВиштІасира, Илала нешра касили, Израилла ванзаличи вакІиб. ²² Иудеялизив сунела дудеш Иродла мерличив Архелай пача виъниличила бакъили, ила укъес урухиуб, амма, муэрлизиб багъахъурли къяйда, Галилеялизи арякьун. ²³ Илаб, идбагуначибли бурибси – Илис Назорейлан бикІар ибси – бетерхахъес багъандан, Назарет бикІуси шагъарлизи мерлайуб.

Шиннизиб бизахъан ЯхІъяла вягІза

3 Замана арбякьунхІели, шизиб бизахъан ЯхІъя льякьули сай ва, Иудеяла чІянкІ авлахъличив вягІзуртаиркьули, викІули сай: ² «МукІурдакІирая, сенкІун Аллагъла ПачяхІдеш гъамбиубли сабину». ³ ЯхІъячилиагу ГІисайя идбагли бурибси: «ЧІянкІ авлахъличив чІярикІусила тІама: „Аричис гьуни хІядурбарая, Илис гьундури дархътили детаахъая“». ⁴ ЯхІъяла палтар валрила балализирадти сарри, къякъяличиб кабцла ирира лебри, илала беркала

цІурцІби ва дугІла варъа сарри. ⁵ ИтхІели Ярусалимлизибадра, лебилра Иудеялизибадра, Иорданна лебилра алавла мер-мусаличибадра иличи башутири. ⁶ Илди, чула бунагъуначи мукІурбикІули, Иорданнизиб бизахъутири. ⁷ Сунечи шизиб базахъес бакІибти бахъал фарисейтира, саддукейтира чебаили, илдази иб: «ЧІичІлумазирад кадикибти! Чили бурибсив хІушази челябкьуси Аллагъла гьимилизирад дебшахъес? ⁸ ХІуша мукІурдакІнила лайикъси даража чебаахъая. ⁹ УркІикад мадикІудая: „Нушала дудеш Ибрагъим сай“, сенкІун, хІушази викІула: Аллагъли ишди къркъубазибадра Ибрагъимлис дурхІни барес вирар. ¹⁰ Галгубала мякъла барда кабихъили саби: гІяхІна цІедеш хІелугуси гъарилра галга, бяхъили, цІаличи чебилкъа. ¹¹ Нуни къалли, хІушала тавба къабулбарили, хІуша шизир дизахъулра. Наб гІергъи Льякьуси биалли, набчив цІакъси сай. Илала дабри гІергъидихесалра ну лайикъикибси ахІенра. Илини хІуша Дурхъати РухІлизир ва цІализир дизахъурая. ¹² Илала кура Сунела някълизиб саби. Илини Сунела дургІела умубиру, Сунела анкІи усилизидурцу, нег биалли хІебилшуси цІали игу».

ГІиса шиннизиб вазахъни

¹³ ИлхІели Галилеялизиwadли ГІисара Иорданничи вакІили сай, ЯхІъязи Сай шиннизиб вазахъес. ¹⁴ ЯхІъяни ил тІашиусири ва викІусири: «Ну ХІуни вазахъес гІягІнисира, ХІу набчи льякьусирив гъатІи?» ¹⁵ Амма ГІисани, илис жаваблибахъубли, иб: «Илкъяйда биаб. Илкъяйда бетурхахъес гІягІнибирур нушаб Аллагъла амру». ИлхІели ЯхІъяни Ил ватур. ¹⁶ Вазибси ГІиса бусягІят шиннизиwad дуравхъун ва, хІера, Илис зубри гъаргдиуб ва ЯхІъяни Аллагъла РухІ чедаиб, лагъаван гІяшдикІули, ГІисачи кадицІути. ¹⁷ ХІера, тІамара зубразибадли бикІуси: «Ил сай Дила дигуси Урши. Дила харидешра Иличи саби».

ГІиса илбисли хІярамсилічи хьулварни

4 ГІурхІели РухІли ГІиса чІянкІ авлахъличи арукиб, Илбислизи хІярамсилічи хьулварахъес. ² Ил авцІали бархІи дубурцули калун ва, бегІла гІергъира, гушиуб. ³ Сай хІярамсилічи хьулирахъуси Илбис Иличи гъамбиуб ва иб: «Эгер ХІу Аллагъла Урши виадли, илди къркъуби къуцІри детаахъес бура». ⁴ Илини биалли жаваблис иб: «БелкІи саби: „Адам къацІличивлицун ахІенну хІерируси, Аллагъличібадси гъайличивли сай“». ⁵ ГІур Илбисли Ил дурхъаси шагъарлизи арукиб ва Аллагъла хъалила хъалчла дубличі тІашатур. ⁶ Илбисли Илизи иб: «Эгер ХІу Аллагъла Урши виадли, уди тІяхІухъен, сенкІун белкІи саби: „Аллагъли Сунела малакуначи ХІу хъарирури».

Илдани Хиу някъбачив аркури ва Хиела къяшалра къаркъализи чехИейгур». ⁷ Гисани илизи иб: «БелКи саби: „Хиела Арочи Аллагъла хИялумџесра валмалзад“». ⁸ Гурра Илбисли Ил хИекъли ахъси дубурличи аркули сай ва дунъяла лерилра пачалихъунира, Илдала черяхИдешра чедиахъули сари, ⁹ ва бикИули саби: «Илди лерилра Хиед лугас, эгер, къукъмусикили, наб икрамбарадли». ¹⁰ ИлХиела Гиса илизи викИули сай: «Гъарахъбики Набчибад, илбис. БелКи саби: „Хиела Арочи Аллагълис икрамбирен, Илалацун хИурматра бирен“». ¹¹ ИлХиела илбисли Ил уввалтули сай, малаикуни гъамбиубли Илала хИурматбирули саби.

Галилеялизир Гисала вягІза-насихІят

¹² ЯхІгъя уцниличила бакъили, Гиса Галилеялизи аркъун. ¹³ Назарет батурли, Завулонна ва Неффалимла мер-мусаличбси урхъу-дублабси Капернаумлизи хъурайуб ¹⁴ Илини илкъяйда бариб Гисайя идбагли бурибси бетерхахъес багъандан. Ил идбаг викИули сай: ¹⁵ «Урхъула дубкадси Завулонна ванзали ва Неффалимла ванзали, Иорданна Гелабси жугъутІунала аХиенси Галилеяли, ¹⁶ џІябдешлизиб кабиибти халкъли чебяхІси шала чебаиб ва, бекІала дяхІџилиу кабиибтас, шала пархбухъун». ¹⁷ ИлХиечивад Гиса, вягІзуртаиркъули, гъайкиџесвахІиб: «МукІурдакІирая, сенкІун Аллагъла ПачяхІдеш гъамбиубли саби».

Симонра, Андрейра, Якъубра, Юнра жибарни

¹⁸ Галилеяла урхъу-дублавад шалГевулхъули, Гисани кІел узи чебаиб: Петр бикІуси Симонра, илала узи Андрейра. Бялихъчиби сабХиели, илдани урхъулизи тур лайбикІулри. ¹⁹ Илдази Илини иб: «Наб ГІергъи даширая, Хиуша нуни адамти бурцантили детарахъурая». ²⁰ Туранира датурли, илди бусягІятал Илис Гелабад арбкъун. ²¹ Илад аркъули, Илини кІел царХиил узира чебаиб: Заведейла уршби Якъубра, ЯхІгъяра. Чула дудешличил къаякъличирти турани далиути илдира Илини жибариб. ²² Илдира, бусягІятал къаякъра батурли, дудешра ватурли, Илис ГІергъи арбкъун.

Галилеялизиб вягІза ва сагъбарни

²³ Гиса лебилра Галилеякад вашулри: Аллагъла ПачяхІдешличила жугъутІунала киласабазив вягІзуртаиркъули, Гевугъули, ва, адамтазибси гъарилра изалара, хилипдешра сагъдирули. ²⁴ Иличила хабар лебилра Сириялизиб тІинтІибуб. Лебилра хилиптира, декІар-декІарти излумани буцибтира, хІял чебашутира, жиндралабиубтира, бусули башутира Иличи бикулри. Илди лебилра

Илини сагъбирутири. ²⁵ Галилеялизибадти, Веџшагъарлизибадти, Ярусалимлизибадти, Иудеялизибадти ва Иордан хІеркІла Гелабадти бахъал халкъ Илис ГІергъи башулри.

НигІматуни: дубурличибси Гисала вягІза

- 5** Халкъ чебаили, Ил дубурличи аџиб: кайибХиели, Иличи мутаГІалимти гъамбиуб.
- ² Илди руркъули, Ил викІусири:
- ³ «ИрхІилибти саби рухІлашал къарцинти, сенкІун илдала саби Аллагъла ПачяхІдеш.
- ⁴ ИрхІилибти саби бисути, сенкІун илди харибиру.
- ⁵ ИрхІилибти саби ГІясили аХиенти, сенкІун илдани ванза букъурлибурцу.
- ⁶ ИрхІилибти саби бархъдешличи гъаргъти, сенкІун илди лукъан.
- ⁷ ИрхІилибти саби уркІеџичебти, сенкІун илди уркІеџили бургу.
- ⁸ ИрхІилибти саби уркІби умути, сенкІун илдани Аллагъ чейу.
- ⁹ ИрхІилибти саби даршудешГіебти, сенкІун илдас Аллагъла дурХиени или, бикІар.
- ¹⁰ ИрхІилибти саби бархъдеш багъандан дугІаибти, сенкІун илдала саби Аллагъла ПачяхІдеш.
- ¹¹ ИрхІилиртирая Хиуша, Хиушаб биргухІели ва Ну багъандан вайта бугъухІели.
- ¹² Шаддиирая ва разидирая, сенкІун халаси саби зубрачбси Хиушала шабагъат: илкъяйда дугІиутири Хиушаб гъалаб биубти идбагунира.

«Хиуша – ванзала зе»; «Хиуша – дунъяла шала»

¹³ Хиуша – ванзала зе сарра. Зела џІакъ беткахъалли, селичил вирара илди зукъидиахъес? Илди селисалра манпаГІятХИедирар, адамтази ганздарахъес лайдакІалли аХиенси.

¹⁴ Хиуша – дунъяла шала сарра. Дубурла бекІличибси шагъар дигІянбиџс Хиебирар. ¹⁵ Шям, абалкахъи, тІалХиянала уди каХиебирхъуну, къасиличи кабирхъу ва хъулибти лебтасалра ил шалабикІар. ¹⁶ Илкъяйда Хиушала шалара адамтала гъалаб ухесбиаб, илдани Хиушала ГІяхІти баркъудлумира чедиџсли, Хиушала Зубрала Дудешлис дезара бикІесли.

«Ну дуџс вакІибси аХиенрану, детерхахъес вакІибсира»

¹⁷ Хиуша пикримадикІудая, Ну Низам яра идбагуни буџс вакІибси сай или: буџс вакІибси аХиенрану, бетерхахъес вакІибсира Ну. ¹⁸ СенкІун хИекъли бурулра Хиушази: зубри ва мусни лералли, Низамлизибси џа къелалра бетХиейхъур – гъар секІал детерхайчи. ¹⁹ Хиера, ишди къяйдуртазибадли бегІлара камси буи, адамти

илкъяйда бурсибаралли, Аллагъла ПачяхІдешлизив бегІлара виштІасилизи вейгІи вирар, сунени дузра дузахъули, бурсира барибси биалли Зубрала ПачяхІдешлизив бегІлара чевяхІселизи вейгІи вирар. ²⁰ СенкІун, хІушази викІулра, эгер хІушала бунагъагардеш Низамла гІялимталайчирра, фарисейталайчирра чедихІедухъалли, хІуша Аллагъла ПачяхІдешлизи ахІедицІудая.

**Гъмиличила ва каршниличила;
«ХІела узичил даршукайи»**

²¹ ХІушани бакъира гъалабла адамтази бурибси: „Камаршид, чи-биалра кавшибси судличи лайикъси сай“. ²² Ну викІулра хІушази: гъарилра дугІлашал сунела узичи гъимуркІусира судличи лайикъси сай, ахІедаибси викІуси судличи лайикъли сай. Абдал викІуси биалли, цІала жагъаннабличи лайикъли сай. ²³ Къурбунти дируси мерличи къурбан хибхІели, хІед гъанбикалли узила хІечил къидадеш лерниличила, ²⁴ къурбан илаб батурли, узичи укъенну даршукайи ва, гІур чарухъи, хІела къурбан бара. ²⁵ ХІела къаршикарличил гъуйчив левалли, къалаба-къалабали даршукайрен – илизи хІу судлизи хІеvedaхъес багъанданра, суд барили, къараултази ведили, туснакълизира дебахІерахъес багъанданра. ²⁶ Марли викІулра хІези: хІу илавад дурахІелхъад – бегІла гІергъисигъуна гІяббасира балли хІебедили.

Гъаргъси хъулличилси хІер

²⁷ ХІушани бакъира гъалабла адамтази бурибси: „КъехІбадеш мадиридая“. ²⁸ Ну хІушази викІулра: хъунул адамличи гъаргъси хъулличил хІерикІуси гъарилра сунела урКІилизив иличил къехІбадеш дарибси сай. ²⁹ Эгер хІела балуй хІуй хІу бунагъличи хъулирахъули виадли, дурабитІенну ил лайбакІа, сенкІун хІела лебилра къаркъала жагъаннаблизи бухІнабушахъесичиб, ца биркІан бебКІили хІед гІяхІил саби. ³⁰ Эгер хІела балуй някъли бунагъличи хъулирахъули виадли, чеббяхъяну, хІешибад гъарахъбара, сенкІун хІела лебилра чарх жагъаннаблизи лайбакІахъесичиб, ца биркІан бебКІили хІед гІяхІил саби.

Магъар кабуршниличила

³¹ Бурили саби: сунела хъунуйчил чи декІарикаллира, магъар кабушнила кагъар бедаб, или. ³² Ну викІулра хІушази: чи, хиянат агарли, сунела хъунуйчил декІарикаллира, илини илис къехІбадеш дирахъес сабабра лугули сай; декІаррикибсилочи чи хъайчикайалра, илинира къехІбадеш дирули сай.

Хъяличила

³³ ГІурра хІушани бакъибси саби гъалабла адамтази бурибси: хъялис къянамайруд, Аричила гъалар хІела хъями тамандирен. ³⁴ Ну биалли викІулра хІушази: хъямамаркъуд бекІлил: я закличира или, сенкІун ил Аллагъла тах саби; ³⁵ я ванзаличира или, сенкІун ил Илала къяшмала удила саби, я Ярусалимличира или, сенкІун ил чевяхІси Пачала шагъар саби, ³⁶ я хІела бекІличира или, сенкІун цалра гъез я цІуба, я цІудара бетаахъес хІейрухІели. ³⁷ ХІушала девли биаб: бархъсилис – гІе; балКІсилис – юх; илала дурарадти – илди илбислизирадти сари.

«Вайсилис къаршидеш мадирид»

³⁸ ХІушани бакъира бурибси: „ХІуйс хІули ва цулалис цула“. ³⁹ Ну биалли викІулра хІушази: вайдешлис къаршидеш мадиридая. ХІела балуй ляжлизи бяхъялли, иличи итилилра шурбара; ⁴⁰ хІела хІева кебасес дигули, чи судлизиахъалра, илис чедила палтарра деда. ⁴¹ Чили хІези гуждан сунечил ца ерс ахъахъалра, хІуни иличил кІел ахъа. ⁴² ХІези гаикІусилис беда, хІезибад чеблалис сасес дигусилизивадра гІелуммалзад.

«ХІушала душманти дигахъеная»

⁴³ ХІушани бакъира бурибси: „ХІела гъамси дигахъен ва хІела душмайчи гъимичевли вии“. ⁴⁴ Ну биалли викІулра хІушази: хІушала душманти дигахъеная; хІушаб уркъути, баркатлабиреная; хІушачи гъимикартас гІяхІбаркъ биреная ва хІушаб децІигахъутасра, хІуша дугІиутасра дулгеная, ⁴⁵ хІушала Зубрала Дудешла дурхІни детаэс багъандан, сенкІун Илини саби Сунела берхІи гІясикартачира, малхІямтачира абухъахъес амру бируси ва бунагъагартачира, бунагъкартачира заб-марка дурхъуси. ⁴⁶ СенкІун хІуша чус дигахъути хІушанира дигахъадалли, илаб хІушаб сегъуна шабагъат леба? Ил ахІену бируси хІекъ бурчантанира? ⁴⁷ Эгер хІуша хІушала узбасцун саламдикІули диадалли, се хасси бирулрая? Ил бирули ахІену аллагъагартанира? ⁴⁸ ХІебиалли бегІлара ункътили дирирая, хІушала Зубрала Дудеш ункъсили виубси къяйдали.

Садакъала хІекълизибси белчІуди

6 Адамтази чебаахъес или садакъа мабиридая, сенкІун иличибли хІушаб хІушала Зубрала Дудешлизибад шабагъат хІебирар. ² ХІебиалли, садакъа бирухІели, киласабазибти ва къакъурбазибти, чус адамти дезабикІахъес бузути, кІибяхІянтиван хІу вявмайкІуд. ХІекъли бурулра хІушази: илдани гъаннадал чула шабагъат касили саби. ³ ХІела биалли, садакъа бирухІели, балуй

някъли бируси алгъай някъли мабагъаб, ⁴ садакъа дигІянали бетаахъес багъандан ва дигІянаси чебиуси хІела Дудешли хІед дакІули луга.

Балга-дугІяличила

⁵ УлгухІелира, киласабазиб ва къакъурбала хІябкъяйтациб тІашбизурли, адамтази саби булгули чебаахъес дигахъути, кІибяхІянтиван майруд хІу. ХІекъли викІулра хІушази: илдани гъаннадал чула шабагъат касили саби. ⁶ ХІу улгухІели, хІела хъули аціи, унзара гІекІили, хІела Дудешлис балга бара ва дигІянатира чедиуси хІела Дудешли хІед дакІули луга. ⁷ ДулгухІели, аллагъагартаниван имціати мадуридая, илди пикрибикІути саби дахъал дурниличибли чула гІяхІил бикъу, или. ⁸ Илдачи мешумадиркудая, сенкІун хІушала Дудешли хІушани тиладибарайчира хІушала агри селизиб сабил балуси сабину.

«Нушала Дудеш...»

⁹ Дулгеная ишкъяйда: „Зубрачивси нушала Дудеш! ХІела у дурхъабираб; ¹⁰ ХІела ПачяхІедешра бакІаб; Ванзаличибра, зубрачивбра ХІела ари бетерхаб; ¹¹ ишбархІи хІялалси къаціра биха нушаб; ¹² хасардати нушаб нушала чеблуми, нушаб чеблалиубтас нушани хасардалтуливан; ¹³ хІярамсиличи хъулмадирахъаба, илбислизирад дерцахъаба “.

¹⁴ СенкІун хІуша адамтала бунагъуначирад черкадурхадалли, хІушачивад хІушала Зубрала Дудешра чевкархар, ¹⁵ амма хІуша адамтала бунагъуначирад черкахІедурхадалли, хІушачивад хІушала Зубрала Дудешра чевкахІерхар.

Дубурцниличила

¹⁶ Илкъяйда хІуша дубдурцухІелира кІибяхІянтиван душкъубли камадилзадая, илдани дирар дамкъурти дяхІ кадурцути – дуббурцути саби или адамтас гъанбикахъес. ХІекъли викІулра хІушази: илдани чула шабагъат гъаннадал кайсули саби. ¹⁷ ХІу дубуцибхІели, бекІра гІявабакили, дяхІра дирцили кайи, ¹⁸ адамтала гъалав ахІи, дигІянси хІела Дудешла гъалав дакІуухъес багъандан; дигІянатира чедиути хІела Дудешли хІед дакІули луга.

Хазналичила

¹⁹ Ванзаличир хІушани хазнурби цаламадирхъидая, сарира имсли яра сигли заядирахъути, яра хъулкнани дигІянали дилгІути, ²⁰ амма зубразир хазнурби цаладирхъеная, илар илди я имсли, я сигли заяхІедиру, я хъулкнани дигІянали хІедилгІя, ²¹ сенкІун хІела хазна лебихІиб хІела уркІира бирар.

ХІули – чирагъ

²² ХІули – чархла чирагъ саби. ХІела хІули умули биалли, лебилра чархра шалали бирар; ²³ амма хІули вайтІа биалли, лебилра чархра ціябли бирар. ХІезибси шала ціябдеш биалли, ціябдеш сегъуна бирара гъатИи?

КІел хужаимлис къуллукъбирни

²⁴ Чилилра кІел хужаимлис къуллукъбарес хІейрар: ил цаличи гъимичевли вирар, цархІил – дигахъу; яра цаличила къайгъилизииркур, цархІилличила авараагаркайрар. Аллагълис ва давлалис къуллукъбирес хІедирудая.

Къайгъначила

²⁵ Илбагъандан викІулра хІушази: се букусив, се бужусив яра се челгъусив или, хІушала жайчила къайгъилизимадиркудая. ХІушала жан беркайчир ва чархла палтарличир бекІти ахІену гъатИи? ²⁶ Зубрала арцантаци хІердизирая: илдани я делгІули ахІен, я иршули ахІен, я усурбази дурчули ахІен; хІушала Зубрала Дудешли илди далхули сай. ХІуша илдачир гъатІиралра гІяхІти ахІенрав гъатИи? ²⁷ Яра хІушазивадли къайгъилизиикибси цалинра вирару ца сягІяталра сунела гІямру гІеркъадиахъес? ²⁸ Палтар-къяшличилара сен къайгъназиртирая? ХІеръая авлахъла вавначи – лилиябачи: я дузхІедузули, я душхІедушули секъяйда халадикІулил; ²⁹ викІулра хІушази: сай бегІлара чевяхІси манзиллизив Сулайбанра валли, илдазибадди цалраван вегІируси ахІенри; ³⁰ эгер ишбархІи лебси, амма жягІял печлизи лайбикІуси авлахъла къар Аллагъли илкъяйда бегІбирули биалли, хІуша дегІдарес хІейрулив, камли дирхантИи?

³¹ ХІебиалли къайгъилизимадиркудая ва мадикІудая: нушани се букуси? яра се бужуси? яра се челгъуси? ³² Аллагъагартира илдагІиб умціули саби. ХІушала Зубрала Дудешли балуси сабигу илдала шайчирти хІушала хІяжатуни лерти диъниличила.

³³ ХІуша гъаланачи умціеная Аллагъла ПачяхІдешлигІир ва Илала бархъдешлигІир – гІурилти секІал хІушаб кадихъили дирар. ³⁴ ЖягІялла бархІиличила пикримадикІудая, сенкІун жягІялла сунечила саби къайгъилизибиркур: гъарил ца бархІилис сунела къайгънира даибти сари.

Уціала ва зехни

7 Чилра гІяйиблизи марцид, хІура хІерцури, ² сенкІун, хІушани сегъунти гІяйибти дарадалра, илдигъунти хІушабра диру; сегъуна умцлаличил умцадалра, илгъуна умцлаличил

хІушабра умцу. ³ Сен хІу хІела узила хІуйзибси уцІалаличи хІерикІулрив, хІела хІуйзибси зехни хІясибхІебирули? ⁴ Яра секъяйда бурида хІела узиси: „биха, хІела хІуйзибси уцІала дурайсис“, хІелайзиб зехни лебли биалли? ⁵ КІибхІян! Гьаланачи хІела хІуйзибси зехни дураса, илхІели чебиид хІела узила хІуйзибси уцІала сен дурасес вирарал.

Цурмала гьалар жавгьар духури

⁶ Хурас хІялалсира малугадая, хІушачи ласдиубли хІуша гьархІедердахъес, цурмала гьала жавгьар духурира маргьидая – илдази ганзхІедарахъес.

Аллагьла гІяхІти савгьатуначила балга-дугІя

⁷ Тиладибиреная, ва хІушаб луга; умцІеная, ва хІушани бургидая; къутІдирхъеная, ва хІушаб гьаргдиру: ⁸ гьарил тиладиикІусини кайсуси саби, умцІусини бургуси саби ва къутІикІусилис гьаргбируси саби.

⁹ ХІушала ургав адам леву, суненира уршили къацІ тиладибарибхІели, къаркъа бедес вирусИ?
¹⁰ Яра, бялихъ тиладибарибхІели, чІичІала бедесси?

¹¹ ХІера, хІуша сецад вайти диадалра, хІушала дурхІнас гІяхІти дарес балулра, хІебиалли хІушала Зубрала Дудешлира Сунези тиладибарибтас гІяхІдешуни луга.

ХІед цархІилтани барили дигуси, хІуни цархІилтасра бирен

¹² Илкъяйда гьарил секІайзиб: адапти хІушачил секъяйда биубли дигулрал, илкъяйда адамтачил хІушара диреная, сенкІун Низамра идбагунира илкъяйда бикІули саби.

ГІямруличи аркути къакъати къапу

¹³ Къакъати къапулизирад адацІирая, дягІути къапулабад ва гьарзаси гьуйчибад аркъути бахъал биалра, улхниличи аркъути саби. ¹⁴ ГІямруличи викути къакъати къапура, гьярцІа гьунира камтани сари дургути.

Къалпти идбагуни; «илди чула цІедеш хІясибли баладая хІушани»

¹⁵ Мазалагъуна куцличил хІушачи башути, амма бухІнабад буцІи сабти къалпти идбагуназирад мяхІкамдирая. ¹⁶ Чула баркъудлумачибли баладая илди. Занзбачирад тІутІи яра хІякулличирад инжир дурчув? ¹⁷ Гьарилра гІяхІси галгали гІяхІти цІедеш луга, вайси галгали биалли вайти цІедеш луга. ¹⁸ ГІяхІси галгали вайти цІедеш гес хІебирар я вайси галгали гІяхІти цІедеш гес хІебирар. ¹⁹ ГІяхІти цІедеш хІелугуси гьарилра галга бяхъили, цІаличи

чебилкъа. ²⁰ ХІера, чула цІедешличибли баладая илди.

«Аричи! Аричи! викІуси Набзи гьарил...»

²¹ Набзи „Аричи! Аричи!“ викІусицун, Аллагьла ПачяхІдешлизи ахІейцІур, амма Зубрачивси Дила Дудешла амру таманбируси айцІур. ²² ИтбархІи Набзи бахъалтани иру: „Аричи! Аричи! ХІела уличирли ахІенрив нуша идбагуниван гьайдикІути? ХІела уличирли ахІенрив жиндрира дугІути? ХІела уличирли ахІенрив дахъалгъунти мугІжизатунира дирути?“ ²³ ИлхІели илдази бурира: „Нуни хІуша бекІлил далути ахІенра; набчирад гьарахъдикирая, далхІедикибти диранти“.

ГІякълукар ва гІякълуагар юртани лушанти

²⁴ Гьарилра дила гьайличи лехІра ихъули, илди таманра дирути Нуни мешубурцисра шурла хьулчиличиб юрт белшунси духуси адамличил. ²⁵ ХІера, заб-марка дариб, хІуркІби чедидерхур, бурямти духъун ва лерилра ил юртличи чедухъун, амма юрт гьятІхІебиуб – шурличиб тІашбатни багъандан. ²⁶ Гьарилра дила гьайличи лехІихъуси, амма илди таманхІедируси, сунела юрт гьумличиб тІашбатурси, гІякълуагар адамличи мешуиркур; ²⁷ ХІера, заб-марка дариб, хІуркІби чедидерхур, бурямти духъун ва лерилра ил юртличи чедухъун, ил юрт гьятІбиуб – илала гьятІбиънира халасири».

Ари лебсилван ГІисани руркъули сай

²⁸ ГІисани илди гьай тамандарибхІели, халкъ Илала белчІудиличи тамашабирутири, ²⁹ сенкІун Ил Низамла гІялимтираван, фарисейтираван ахІи, арила вегІ бучІахъан сайри.

Къявгала изайзивси сагъварни

8 Ил дубурличивад кацІибхІели, Илис гІергъи бахъал халкъ арбъакъун. ² ХІера, Иличи къявгала изай уцибси адам гьамиуб ва, Илис икрамра бирули, иб: «Аричи! ХІед дигадли ну умуиахъес вируд». ³ ГІисани някъ гьабатурли, иличи гачикиб ва иб: «Дигулрану умуии». Ил адам бусягІятал изайзивад умуиуб. ⁴ Илизи ГІиса викІар: «Вари, чизилра мабурид, амма чеахъес кашишличи укьен ва, бикъридешлис, Мусани хьарбарибси, садакъара бара».

Даршла бекІла къараваш сагъварни

⁵ ГІиса Капернаумлизи вакІибхІели, Иличи даршла бекІ гьамиуб ва хьарбаиб: ⁶ «Аричи! Дила къараваш лев хъулив кайхьи, биркІанти дуцили ва кахли гІязабуркІули». ⁷ ГІиса илизи викІар: «Ну вакІили, ил сагъирис». ⁸ Даршла бекІли биалли,

жаваблибахъубли, иб: «Аричи! Хіу дила юртлизи аціли, дила хіурматбарес ну лайикълира хіергус. Амма Хіуни ца гъайадли – дила къараваш сагъкайрар. ⁹ СенкІун нура цархІилла арилиувси адам сайра, амма дила арилиубти бургъантира леб. Илдазивад цализи „Укъен“ или, бурасли, ил аркъян, цархІиллизи „Иша ваши“ или, бурасли, льякъян. Къаравашлизира „Ит секІал бара“ или, хъарбарасли, илинира бирули сай». ¹⁰ Илди гъай дакъили, Гіса тамашакайуб ва, Сунес Гіелабадли льякъути халкълици дугъайзурли, иб: «Нуни хіушази бурулра: Набчи ишабсигъуна бирхауди Израиллизибра хіебаргира. ¹¹ ВикІулра хіушази: бахъал льякъян магъриблизибад ва машрикълизибад, ва Аллагъла ПачяхІдешлизиб Ибрагъмличил, Гісакъличил, Якъубличил хъарбилхъан; ¹² Аллагъла ПачяхІдешлизи диэхІе бикІути биалли, дурала ціябдешлизи лайбакІили бирар: илар бисара, цулбала къяржарра дирар». ¹³ Гісани даршла бекІлизи иб: «Укъен, хіу вирхусиван хіед бетра бетарар». Илала къараваш илхІяйзив сагъкайуб.

Петрла хъубеш неш ва цархІилти сагъбарни

¹⁴ Гіса Петрла юртлизи аціб ва илзамана, ціакъти дуціари чедухъи карихъунси, илала хъубеш неш чераиб. ¹⁵ Гіса илала някълици гачикиб ва изала беткахъиб. Илмадан аризурли, ил илдас къуллукъбиресряхІиб.

¹⁶ БархІи ахъибхІели Иличи гъар журала излумани буцибти бахъал адамти киб, ва Илини, гъайличил жиндри дугІиули, лебилра сагъбариб. ¹⁷ Гісайя идбагличибадли багъахъурси бетерхур. Ил викІусири: «Илини нушала гъунарагардеш ва излуми касиб ва духиб».

«БекІ хъарбихъес мер агара»; «БекІибти бекІибтази хІярибихъахъес бати»

¹⁸ Сай-алав бахъал халкъ чебаили, Гісани сунела мутагІялимтази къаякълициб итилил дубличи арбукъяхъес хъарбариб. ¹⁹ ИлхІели ца Низамла гІялимли, Иличи гъамиубли, иб: «МугІяллим! Хіу чина укъядлира хіед гІергъи льякъяс». ²⁰ Гіса илизи викІар: «Гурднала пукъни лер, зубрала арцанталара лер, амма Инсаниятла Уршила агара, бекІ хъарбихъахъесалра мер агара». ²¹ Илала мутагІялимтазивад цархІилли Илизи иб: «Аричи! Ихтияр бара гъаланачи вякъи дила дудеш хІяриихъахъес». ²² Амма Гісани илизи иб: «Наб гІергъи ваши, бекІибти бекІибтази хІярибихъахъес бати».

Гісани бурям паргъатбахъни

²³ Ил къаякълици ацібхІели, Илала мутагІялимтира Илис гІергъи гъайбиуб. ²⁴ ХІера, урхъулициб хІекъли ціакъси бурям ахъбиуб ва къаякъ ругертани кІапІбирескабиб, амма Ил усулри. ²⁵ ИлхІели мутагІялимтани, Иличи гъамбиубли, чеваргъахъиб ва иб: «Аричи! Дерцахъаба, нуша улхулира». ²⁶ Илдази викІар: «Сен хіуша илцад урухкІутирав, камли дирхант?» ГІур, айзурли, бурямлис ва урхъулис къадагъабариб, ва хІекъли халаси лехІдеш чебихъун. ²⁷ Адамти биалли, тамашабирули, бикІутири: «Чи саяра Ил – сунечи бурямтира урхънира лехІихъути?»

Гергесинна улкализиб жиндралабиубти кІел сагъбарни

²⁸ ЦархІил дубличи саили, Гадаринна улкализи вакІибхІели, Илис жиндрани буцибти, хІекъли къяркъти ва алавити гъундурачиб чилра шулумухъахъес хІелтути кІел адам гъунибаиб. Илди адамти хІярибихъути инкъурбазиб хІербирулри. ²⁹ ХІера, илди вьавбикІесбиб: «Хіед нушазибад се хІяжатлив, Гіса, Аллагъла Урши? Хіу иша заманалис гъалар нуша ГіязабдеркІес вакІилри». ³⁰ Илдацибад гъарахъли цурмала халаси хІенкъ гІяйбикІулри. ³¹ Жиндрани Илизи тиладибариб: «Нуша дугІаибхІели, цурмала хІенкълизи дархъаба». ³² Илини илдази иб: «Дукъеная». Илди, дурадухъи, цурмала хІенкълизи ардякъун. Жиндралабиубси цурмала хІенкъ шурмачибад урхъулизи тІяхІкабухъун ва алхун. ³³ ХІенкъулаби шагъарлизи дуціли бакІиб ва гъар секІайчила буриб, жиндралабиубтас бетаурсиличилара. ³⁴ ХІера, лебилра шагъарла халкъ Гіисас гъалабакІиб ва, чула мер-муса датурли арукъяхъес Илизи тиладибухъун.

БиркІанти дуцибси сагъварни

⁹ ИлхІели Гіса, къаякълици аціли, гІелавяхІ Сунела шагъарлизи чарухъун. ² ХІера, Иличи, бурушличи кайхъили, биркІанти дуцибси хиб. Илдала бирхни чебаили, Гісани зягІипсилизи иб: «ЧіумайкІен, дурхІя! ХІела бунагъуни хасардатурти сари». ³ ИлхІели цабехІти Низамла гІялимтани чузи чули иб: «Ил Аллагълици къаршили сай». ⁴ Гісани, илдала пикруми дагъурли, иб: «Сен хіушани хіушала уркІазиб вайси пикрибирулрая? ⁵ Се гъамадлив гъатІи бурес: „ХІела бунагъуни хасардатурти сари“ или, яра „Айзину вашен“ или? ⁶ Амма хіушани багъирая: ванзаличир бунагъуни хасардалтес Инсаниятла Уршила ари лебси саби». ИлхІели зягІипсилизи викІар: «Айзину, бурушра касили, хІела хъули арукъен».

⁷ Ил, айзурли, сунела бурушра касили, хъули арякъун. ⁸ Халкъли биалли, ил чебаили, тамашара биубли, адамтас илгъуна ари бедибси Аллагълис деза бариб.

Матфей живарни

⁹ Илад аркъули, Гисани хІекъ бурчуси мерличи кайибси Матфей бикІуси адам чеиб ва илизи виКІар: «Наб гІергъи ваши». Ил, айзурли, Илис гІергъи арякъун. ¹⁰ Гиса хъулив хъарихъунхІели, бакІили гІяхІцад хІекъ бурчантира, бунагъкартира Иличил ва Илала мутагІялимтачил барх хъарбихъун. ¹¹ Ил чебаили, Илала мутагІялимтази фарисейтани иб: «Сен хІушала мугІяллим хІекъ бурчантачил ва бунагъкартачил укра укули, ужра ужусив?» ¹² Гисани ил бакъили, илдази иб: «Арати хІебирарну тухтурличи хІяжатбиркути, зягІипти бирар. ¹³ „Къурбан ахІи, уркІецІи дигула“ се ибсил, дякъи, багъирая. Ну гІябидуни жибарес вакІибси ахІенрану, бунагъкарти пашманбиахъес вакІибсира».

Дубурциничила

¹⁴ ИлхІели иличи ЯхІгъяла мутагІялимти бакІиб ва бикІар: «Сен нушара, фарисейтира имЦІали дубурцухІели, хІела мутагІялимти дубхІебурцутив?» ¹⁵ Илдази Гисани иб: «Мекъла хъулибти хумарбиэс бирару, эгер гелешмеш чучил виалли? Амма бурхІни ляркъян, чузивад гелешмеш къябируси – илхІели илди дубра бурцар.

¹⁶ Чилилра дуркъа палтарличи сагаси чІянкІила декІа кахІебалта, сенкІун сагали чебирбубси чебкавду ва тІярхъи гъатІира халабиур. ¹⁷ Чилилра сагати чягъирра дуркъа тІагънази кахІертІу, сенкІун илдира тІярхъубаддирар, чягъирра дурааркъян. Сагати чягъир сагати тІагънази картІу – кІидехІалра калахъес багъандан».

ХІякимла рурси мицІиррарни ва гачрикниличирли хъунул адам сагъриъни

¹⁸ Илдази илди дурухІели, Иличи ца хІяким гъамиуб ва, Илис икрамбирули, виКІар: «Дила рурси рубкІули сари. ХІу вакІили, иличи някъ чебуцадли мицІирли кавлан». ¹⁹ Айзурли, Гиса илис гІелавад арякъун, Иличил бархли Илала мутагІялимтира.

²⁰ ХІера, вецІнукІира дус хІи дашули зягІипси хъунул адам гІеларад гъамриубли, Илала чебуцалала дубличи гачрикиб, ²¹ сенкІун ил сунези сари рикІулри: «Илала палтарличи гачрикаслира ну арарирус». ²² Гисани, шуряхъили, ил чераили, иб: «ЧІумари, рурси! ХІела рирхнили хІу рерцахъири». ИлсгІятличирадал хъунул адам сагъкариуб.

²³ ХІякимла хъули вакІибхІели, Гисани дяднучІабира, гъузгъалдибиубти адамтира чебаиб ²⁴ ва илдази иб: «Дурадухъеная ишад, рурси ребкІили ахІенну, русули сари». Илди лебилра Иличибад дукалкІутири. ²⁵ Адамти дураибхІели, Илини, ацІили, рурсила някъ буциб ва рурси мицІирриуб. ²⁶ Иличила хабар лебилра мусначи тІинтІбиуб.

Гисани кІел сукъур сагъбарни

²⁷ Илавад аркъухІели кІел сукъур Гисас гІелабадбикиб ва вявбикІесбиб: «Нушачи уркІецІи бара, Гиса, Даудла урши!» ²⁸ Хъули ацІибхІели, сукъурти Иличи гъамбиуб. Гиса илдази виКІар: «ХІуша дирхулрав Нуни ил барес вирниличи?» Илди Илизи бикІар: «ГІе, Аричи!» ²⁹ ИлхІели Ил илдала хІулбачи гачикиб ва иб: «ХІуша дирхусиван бетааб хІушаб». ³⁰ Илдала хІулби гъаргдиуб. Гисани къяркъли буриб: «ХІердикІеная, чизилра мабалахъадая». ³¹ Илдани биалли, дурабухъи, лерилра мусначиб Иличила хабар тІинтІбиахъуб.

Жиндралаиубси тилхъавси сагъварни

³² Илди дурабухъунхІели, Иличи киб жиндралаиубси тилхъавси адам. ³³ Жинд дугІаибхІели, ил адам гъайикІесвахІиб. Адамти, тамашабиубли, бикІулри: «Илгъуна анЦІбукъ гъалаб Израиллизиб биубси ахІенри». ³⁴ Фарисейти биалли бикІулри: «Илини жиндри дурайули сай жиндрала талхъа кумекличирли».

³⁵ Гиса лерилра шагъурти-шимикад чедиверхур, киласабазиб адамти бучІахъули, Аллагъла ПачяхІдешличила гІяхІ хабар тІинтІбирули ва адамтазирти излумира, хъябшдешлумира сагъдирахъули.

«БекІнадли халкъ чебиули, Илини илдачи уркІецІибариб...»

³⁶ ХІенкъулаагар мазаван тІутІути ва хІялагарбиубти адамтала бекІни чедиули, Илини илдачи уркІецІибариб. ³⁷ ИлхІели Сунела мутагІялимтази иб: «Арши дахъал сари, амма хІянчизарти камли саби». ³⁸ ХІебиалли аршила Хужаимлизи тиладидикІеная, хІянчизарти аршиличи дураахъес багъандан.

ВецІнукІира чеббикІни

10 Сунела вецІнукІира мутагІялим жибарили, Илини жиндри дугІаихъес ва сегъуна-дигара изалара, хъябшдешра сагъдирахъес ари бедиб. ² ВецІнукІира мутагІялимла уми ишди сари: цаибил Симон, сунесра Петр бихъибси, илала узи Андрей, Заведейла Якъуб ва илала узи Югъан, ³ Филипп ва Варфоломей, Фома ва хІекъ бурчан Матфей,

«ХІу сайрив Ит, вакІес ГІяГІниси?..»

11 Сунела вецІнукІира мутаГІялимлис насихІятуни дедибхІели, руркъули ва вгІзурти дирули, ГІса Галилеяла шагуртикад аркъун. ² Туснакълизивси ЯхІъяни ГІсала баркъуддумачила бакъили, сунела мутаГІялимтазибад кІел ГІсачи бархъиб ³ Илизи ишкъяйда бурахъес: «ВакІес ГІяГІниси Баягъи ХІу сайрив, яра нуша цархІил вакІахъес хІердикІес ГІяГІнилив?» ⁴ Илдас жаваблис ГІсани иб: «Дукъеная, хІушани ЯхІъязи чедаибтачилара, дакъибтачилара бурая: ⁵ сукъурти чебианбирулри, ГІяргаби башанбирулри, къявгала изайзибти умубирулри, ГІянцаби бикъанбирулри, бекІибти мицІирбирулри, мискинтачи ГІяхІ Хабар биулри. ⁶ Набчи васвасхІейубси ирхІиливси сай».

ЯхІъячила ГІсала гъай

⁷ Илди арбякъунхІели, ГІса халкълизи ЯхІъячила гъайикІесвахІиб: «ЧІянкІ авлахъличи хІуша селичи хІердикІес дякъунрая, дягІли лавшарбируси чигІяличив? ⁸ Гъу, селичи хІердикІес дякъунрая? КІантІити палтарла вегІ адам чейэхІе или гъанбикибу? Амма кІантІити палтар дихути пачнала тавхунтазиб саби бирути. ⁹ ХІуша чичи хІерэс дякъунрая? Идбагличи? ГІе, хІушази бурулра: ЯхІъя идбагличивра халал сай. ¹⁰ Иличила ишкъяйда белкІи саби: „ХІера, Нуни ХІечив гъалав Дила вакил урхъулра, илини ХІед гъалаб ХІела гъуни хІядурбиру“. ¹¹ Нуни хІекъли бурулра: хъунул адамтани баркъибтазибад шиннизиб бизахъан ЯхІъяличив чевяхІил ахІекІуб. Амма Аллагъла ПачяхІедешлизив виштІалра иличив чевяхІиси сай». ¹² Шизиб бизахъан ЯхІъяла бурхІначибад гъанналичи бикайчи Зубрала ПачяхІедеш къайгъиличил сархули саби, къайгъи халаси бирутани бурцра бурцули саби. ¹³ Лебилра идбагунани ва Низамли ЯхІъячила гъалахили бурибсири. ¹⁴ Къабулварес дигадалли, ил Илияс сай, вакІес ГІяГІниси. ¹⁵ Бакъес лихІби лертани бакъаб! ¹⁶ Амма гъаннала къам Нуни чичил цугбуциша? Ил мешули саби къакъализи кабиибти ва чула уртахъунази ишкъяйда ¹⁷ бикІути дурхІначи: „Нушани зирняв бяхъилихъалли, хІушани делхъ хІедарра, нушани марайти далуйти делчІихъалли, хІуша дисихІедирая“. ¹⁸ ЯхІъя вакІиб, ил я укули ахІен, я ужули ахІен, амма хІуша иличила дикІулра: „Илизиб жинд леб!“ ¹⁹ Инсаниятла Урши вакІиб. Ил укра укули сай, ужра ужули сай – Иличила дикІулра: „ХІера, ил укес ва ужес дигахъуси адам – хІекъ бурчантала ва бунагъкартала вархкъя“. Амма Аллагъла пасихІедеш лебилра илала дурхІнани марбирули саби».

Хоразиннис, Випсаидас ва Капернаумлис балагъуни

²⁰ ИлхІели, Ил Сай вякъи, бегІлара халати гъунарти чедаахъибти шагурти далтІес вехІихъиб, илабти халкъ мукІурхІебакІни багъандан. ²¹ «Балагъуни хІед, Хоразин! Балагъуни хІед, Випсаида! Нуни хІушазир чедаахъибтигъунти итди ГІяламатла анцІбукъуни Тирлизирра, Сидоннизирра чедаахъибти диаллири, зибкънира чекагъурли, палдара чекъурли, илди жявлил Аллагълис мукІурбикІи. ²² Амма викІулра хІушази: къиямала бархІи Тирлисра, Сидоннисра хІушаблисичиб къулайли бирар. ²³ ХІура, Капернаум, зубрачи ахъбиублира или, гъанбиркулив? Юх, хІу жагъаннабла бухІна кабиудра, сенкІун хІезир дакІударибти итди ГІяламатла анцІбукъуни Содомлизир дакІударибти диалри, ил гъанналичи бикайчи кавлусири. ²⁴ Амма викІулра хІушази: къиямала бархІи Содомла ванзалис хІушаблисичиб къулайли бирар».

ПасихІкартас дигІянбарибси ва хІехартас гъаргбарибси

²⁵ Сунела гъай даимдирули, ГІсани иб: «ХІед деза бирулра, Дудеш, зубрала ва ванзала Аричи, сенкІун ХІуни ил секІал пасихІкартазибад ва духутазибад дигІянбарили, хІехартас гъаргбарири. ²⁶ ГІе, Дудеш! Илгъуна сабри ХІела ГІяхІбаркъла къас.

Дудеш ва Урши; «Набчи даширая...»

²⁷ Лерилра Набзи гибти Дила Дудешли сари, Урши чилилра валхІела – Сунела Дудешли ахІенси; Дудешра чилилра хІела, Уршили ахІенси, ва Уршили Сай чис гъаргварес дигулил – илини ахІенси. ²⁸ Лерилра къиянтазирти ва ГІузуртазирти Набчи дакІирая, Нуни хІушаб паргъатдеш лугасра; ²⁹ Набчибси дукІ хІушаб касая ва Набзирадли бурсикадирая, сенкІун Ну урхІилизив ряхІятси ва бушинси сайра – илхІели хІушала рухІлисра паргъатдеш бургида. ³⁰ Дила дукІ ГІяхІдеш саби, дила махра кункси саби».

Сут бархІи лугни авдни ва беръубси някъла вегІ сагъварни

12 Илала гІергъи сут бархІи ГІиса анкІила хъу байбяхъили аркъухІели, Илала мутаГІялимти гушкабиубли, дердили лугни, някъба суркдарили, дукулри. ² Фарисейтани илди чебаили, Илизи иб: «ХІела мутаГІялимтани сут бархІи бирес асухІебируси бирулигу!» ³ ГІисани илдас жаваб бедиб: «ХІушани хІебелчІунраяв гъатІи, Даудли сайра, сунела адамтира гушбиубхІели се барибал? ⁴ Ил, Аллагъла юртлизи ацІили, кашишуна ахІи,

цархИл адамли деркес асухИебирусилизи халдирути кьуцІри, суненира дерки, сунела адатасра дедибал? ⁵ Яра хІебелчІунраяв сут бархИи Аллагъла хъулиб кашишунанира сут бархИила тяхІяр-кьяйда дулъниличила ва саби гІяйибагарли калниличила? ⁶ Амма хІушази викІулра: Аллагъла юртличивра халал ишав сай; ⁷ эгер хІушани балули диадалри „кьурбан ахИи, уркІеци дигулра“ ибси, гІяйибагартачи гІяйибта хІедиркъада. ⁸ Инсаниятла Урши – сут бархИилара хужаим сай».

⁹ Илавад арякьи, Ил илдала киласализи ацІиб. ¹⁰ Илав сунела някъ беръубси ца адамра леври. ГІиса гІяйиблаварес багъандан, Илизи хьарбаиб: «Сут бархИи адатти сагъбирес асубирару?» ¹¹ Илини илдази иб: «ХІушазивад чили, сунела лебси ца маза сут бархИи курлизи кабикалли, дураадхІесили балтав? ¹² Адам сецад ункълив мазаличив! ХІебиалли сут бархИира гІяхІдеш бирес асубирули саби». ¹³ ИлхІели ГІиса ил чулахълизи викІар: «ХІела някъ гъабати, гъари». Илини някъ гъабатур, ил цархИл някъван сагъсили бетаур.

¹⁴ Фарисейти, дурабухъи, саби-ургаб гъайбухъун, Ил кавшес багъандан. Иличила багъурси ГІиса илавадди арякъун.

ГІисайя идбагли гъалахили бурибси бетерхни

¹⁵ Бахъал адатти Илис гІергъи арбякъун, илди лебилра Илини сагъбариб. ¹⁶ Сунечила бурахъес Илини къадагъабариб. ¹⁷ Илкьяйда ГІисайя идбагличибли бурибси бетерхур. ИлхІели викІусири: ¹⁸ «Иш Дила ДурхІя сай, Нуни чевикІибси сай, Наб дигахъуси сай, Дила РухІлис гІяхІилзуси сай. Дила РухІ иличи чедирхъис ва халкъанас Илини суд балахъа. ¹⁹ я жалхІелхъан, я чІярхІелхъан, я къакъурбазиб Илала тІама чилилра хІебикъу. ²⁰ Бархъдеш чедибдешличи кайчи я къячІаурси чІигІя хІябълча, я гавбикІуси къама хІебилша. ²¹ Илала уличи халкъанани умутбирхъу».

Белзибулла цІакъличил вяшикІнилизив фарисейтани ГІиса гІяйиблаварни

²² ИлхІели Иличи жиндра уцибси сукъурси ва тилхъавси адам киб. Илини ил сагъвариб – сукъурси ва тилхъавси чедианиуб ва гъайикІаниуб. ²³ Халкъ, тамашабирули, бикІулри: «Ил МасихІ ахІенара, Даудла урши?» ²⁴ Фарисейтани биалли, иличила бакъили, иб: «Илини жиндри дугІиули сай Белзибулла – жиндрала талхъа – кумекличил».

ГІисани фарисейти пужбирули сай

²⁵ ГІисани илдала пикруми далули, илдази иб: «Гъарил саби-ургаб бутІибси пачалихъ бацІбулхъан, гъарил саби-ургаб бутІибси шагъар ва

хъали кахІевлан. ²⁶ Илбисли илбис дугІиули биалли, ил саби-бухІнаб бутІили саби, секъяйда кавлана илала пачалихъ? ²⁷ Нуни илди Белзибулла цІакъличил дугІиули виасли, хІушала уршбани чила цІакъличил дугІиули илди? Илбагъандан илдани хІушала балкІдеш кабилзахъа. ²⁸ Эгер Нуни Аллагъла кумекличил жиндри дугІиули виасли, гъайгъайра, Зубрала ПачяхІдеш хІушачи баили саби. ²⁹ Яра секъяйда вирара цІакъсила хъули ацІили, илала секІал дигІес, эгер хъа вегІ вигъхІейгъалли?

Дурхъаси РухІличи къаршиси хІулбуцІличила

³⁰ Набчил ахІенси, Набчи къаршиси сай; Набчил урчхІерчуси, ил пулкІуцІдируси сай. ³¹ Илбагъандан хІушази викІулра: адаттала гъарилра бунагъличибад ва хІулбуцІличибад чебкабурхар, амма Дурхъал РухІличи къаршиси адаттала хІулбуцІличибад чебкахІебурхар. ³² Инсаниятла Уршиличи къаршили чили гъай буралра, иличибад чебкабурхар, амма Дурхъал РухІличи къаршили бурибсилчибад я иш даршдуслизиб, я челябкъалализиб чебберхни хІебирар.

ГІяхІлис гІяхІличил ва вайлис вайличил черихъниличила

³³ Яра галгара илала цІедешра гІяхІти диъни марбарая, яра галгара илала цІедешра вайти диъни марбарая, сенкІун галга багъес вируси сай илала цІедеш хІясибли. ³⁴ ЧІичІлумазирад кадикибти! Секъяйда хІушани гІяхІси бурес дирутирая, вайти диубхІели? УркІила халадешли бирар мухІли гъайбикІахъуси. ³⁵ ГІяхІси адатти гІяхІсила хазнализибад гІяхІси кайсу, вайси адатти биалли, вайдешла хазнализибад вайдеш кайсу. ³⁶ ВикІулра хІушази: адаттани бурибси гъарилра дугІла гъайлис, къиямала бархИи жаваб луга. ³⁷ ВегІла гъайличивли марра варили вирар, вегІла гъайличивли танбихІлара варили вирар».

Юн идбагла гІяламат

³⁸ ИлхІели цацабехІти Низамла гІялимтани ва фарисейтани иб: «МугІяллим! ХІезибадси гІяламат нушаб чебаэс дигахъахІери». ³⁹ Амма Илини илдази иб: «ГІямултарси ва пасадси къамлис гІяламат гІягІнили саби. Илис Юн идбагла гІяламат ахІенси, цархИл сегъуналра гІяламат бирхІебирар. ⁴⁰ КІасла варглав хІябал бархИира, хІябал дугира Юн кали къяйда, Инсаниятла Уршира ванзала уркІилизив хІябал бархИира, хІябал дугира кавлан. ⁴¹ Къиямала бархИи Ниневияла халкъра, ишхІелла наслуличи къаршили бирар ва илди гІяйиблабиру. Юнни барибси вягІза бакъили, илди чула бунагъличи пашманбиуб. ХІушачил вархси Юнничив халал сай!

⁴² Югла шайчибтала пача хъунул Къиямала бархИи ишхИелла наслуличи къаршили рирар ва илди гІяйиблабиру. Ил Сулайбанна пасихИти гъайличи лехІахъес дунъяла дубларад раКибси сарри. ХІушачил вархси Сулайбанничив имцІали чевяхІси сай!

Илбис ва бушкибси хъали

⁴³ Адамлизибад жинд дурабухъунхИели, паргъатдеш баргес шинагар мер-мусаличи башар ва хІебургу. ⁴⁴ ИлхИели бикІар: «Ну сунезибад дурабухъунси дила хъули чарбулхъас». БакІибхИели ил чилипра хІебуцили, умубарили ва ибгили бургу. ⁴⁵ Илини, бякьи, верхІел гъатІира вайти жиндра кили, илаб хІеркабирар. Адамлис биалли илхИели гъалабричибра вайтІа бирар. Илкъяйда бирар иш вайси къамличилра».

ГІисала «Неш ва узби»

⁴⁶ Ил халкъличил гъайикІухИели, Илала нешра, узбира, Иличил гъайбухъес дигули, хъа дураб тІашлири. ⁴⁷ Чилирил, вакІили, Илизи иб: «ХІела нешра, ХІела узбира, ХІечил гъайбухъес дигули, дураб тІашли саби». ⁴⁸ Илкъяйда викІусилизи Илини иб: «Дила неш чи сари? Чихъали саби Дила узби?» ⁴⁹ Сунела мутагІялимти някъли чебаахъили, иб: «ХІера, ихди Дила неш ва Дила узби. ⁵⁰ Чили таманбиралра Дила Зубрала Дудешла ари – ит Наб узира, рузира, нешра сай».

ВелгІусиличила бурала

13 ИлбархИи дуравхъи, ГІиса урхъула дубла кайиб. ² Илаб хІекъли бахъал халкъ цалабикиб. Ил къаякъличи ацІили, кайиб. Лебилра халкъ урхъудублаб тІашбизур. ³ Илини илди руркъулри, дахъал буралабира дурули, ва викІули: «Гъе дегІес хъубзар дуравхъун. ⁴ Илди делгІухИели цацадехІти гъе гъунила дубла кадикиб ва, арцурли даКІили, арцанта дергун. ⁵ ЦархІилти гъе – къаркъубарси ванзаличи кадикиб, гІянжи камси сабхИели, чедаКІиб. ⁶ БархИи ахъбиубхИели илди сусделхун ва, хІячми агни багъандан, деръуб. ⁷ ЦархІилти занзубала урга кадикили, эркинни дерхъибти занзубани илди гІянддаКІиб. ⁸ ЦархІилти биалли, тухъси ванзаличи кадикили, чедаКІиб ва цадахІтани даршналі имцІаси, цархІилтани урегцІайналі, итилтани хІябцІайналі имцІаси сабухъ гиб. ⁹ Бакъес лихІби лерсини бакъаб!»

Сен Ил буралабачил гъайикІусири?

¹⁰ Гъамбиубти мутагІялимтани Илизи хъарбаиб: «Сен илдази буралабачил гъайикІулрив?» ¹¹ Илдас жаваблибахъубли, Илини иб: «Аллагъла ПачяхІдешла дигІяндешуни дагъахъес хІушаб

имкан гибси саби, амма илдас гибси ахІен, ¹² Лебсилис гили бирар, агарсила лебсира кебасили бирар. ¹³ Илдази буралабачил гъайикІулра, сенКІун илдани хІербикІули чехІебиули саби, лехІихъули хІебикъули ва иргъхІергъули саби. ¹⁴ Илдала черкадти ГІисайя идбагла гъалахили дурибтира детурхули сари: „ЛихІбани бикъидая – иргъхІергъидая, хІулбани хІердикІудая, амма чехІебиидая, ¹⁵ сенКІун уркІби чурхдиубли, лихІбанира къиянни бикъули саби, хІулбира чекадихъили сари. Илдани хІулбани чемабааб, лихІбани мабакъаб, уркІилира маргъаб, сагъбарахъес Набчира мабакІаб“. ¹⁶ ХІушала биалли, ирхІилирти сари хІулби, чунира чедиути, ирхІилирти сари лихІби, чулира дикъути. ¹⁷ ХІекъли викІулра хІушази: бахъал идбагуни ва ГІябидуни хъулбикІутири хІушани дикъути дикъесра, хІушани чедиути чедиэсра, амма я хІедакъиб, я чехІедаиб.

ВелгІусиличила бурала баянбарни

¹⁸ ХІуша лехІдизирая хъубзарличила буралала мягІналичи: ¹⁹ Гъунила дубла кадикибти ибси – илди гъайла бакъибти адамти саби, амма, илбис бакІили, бакъибси гъай илдада уркІбазибад бигІи арбухити адамти саби. ²⁰ Къаркъубар ванзаличи кадикибти ибси – бакъибси гъай чули разидешличил къабулбирути, ²¹ амма чІумаси кабизалачебдеш агарти адамти саби, къияндешлизиб яра гъай багъандан саби хІебалтухИели илдани гъандуцес хІебирар ибси саби. ²² Занзбази кадикибти гъе ибси – илди чузи бурибси гъай бакъибти адамти саби; амма чула къайгъназира, арцлизира, гІямрула лазатуназира ахъили – илдада лугнира дикъхІедикъурли кавлули сари ибси саби. ²³ Тухъси ванзаличи кадикибти ибси – бакъибси гъай чула хІялалси, умуси уркІилизиб бихІути, кабизалачебдешличибли цабахІтани даршналі имцІаси, цархІилтани урегцІайналі, итилтани хІябцІайналі имцІаси сабухъ бурчути адамти саби».

АнкІиличила ва хъалталичила бурала

²⁴ ЦархІил бурала гъалабихъиб илдас, викІули: «Зубрала ПачяхІдеш мешуси саби сунела хъучи гІяхІти гъе дегІунси адамличи. ²⁵ Адамти бусаунхИели, илала душман вакІили, анкІила урга хъалта дегІун ва арякъун. ²⁶ Гъе шинишли чедаКІибхИели, хъалтара дурадухъун. ²⁷ Ила бакІибти хІянчизартани хъа вегІлизи иб: „Хужаим! ГІяхІти гъе ахІенрив хІуни дегІунти? Илар хъалта чинарад даКІибти?“ ²⁸ Илини илдази иб: „Душман адамли барибси саби“. ХІянчизартани илизи иб: „Дигалли, нушани илди луцІехІе“. ²⁹ Амма илини иб: „Юх, хъалталичил дархли хІушани анкІира къябдиридая, ³⁰ кІидехІалра даКІахъес датирая,

иршухІели нуни аршикъянабази бурисра гьаланачи хъалта дучахъес ва цІали дигахъес, гІур биалли анкІи усурбази дучахъес“».

Ризкъила къякъличила

³¹ ЦархІил буралара буриб Илини, викІули: «Зубрала ПачяхІдеш мешули саби адамли касили сунела хъучи бегІунси гьела къякъличи, ³² сабира гье хІясибли бегІлара биштІаси биалра, лерилра ризкъиличиб халаси – галгацад бухъала башуси, ва сунела къялубачи закла арцанти кадируси».

БерхетІличила

³³ ЦархІилра бурала буриб Илини илдас: «Зубрала ПачяхІдеш мешули саби берхетІличи, сабира хъунул адамли касили, бетІу чебакІахъес или, декъла хІябал бархализи кабихъибси».

³⁴ Илди лерилра ГІисани буралабачил дуриб, бурала агарли селра хІебуриб. ³⁵ Илкъяйда идбагли гьалахили бурибси бетерхур. Ил викІусири: «Буралабачил Дила дубша гьаргбирисра, дунъя биубла дигІянаси бурисра».

³⁶ ИлхІели, ГІисани халкъ баткаиб ва хъули аціиб. Иличи мутагІялимти гъамбиуб ва иб: «Хъучирти хъалталичила бурала нушаб баянбара».

АнкІиличила ва хъалталичила бурала баянбарни

³⁷ Илини, жаваблибиахъубли, иб: «ГІяхІси гье белгІуси – ил Инсаниятла Урши сай, ³⁸ хъу – дунъя саби, гІяхІти гье – илди Аллагъла ПачяхІдешла дурхІни саби, хъалта – илбисла дурхІни саби.

³⁹ Илди дегІунси душман – илбис саби. Арши садаъни – дунъяла ахират саби, аршикъянаби биалли, малаикунни саби. ⁴⁰ Хъалта дучили цІали игули къяйда, дунъяла ахиратлизибра илкъяйда бирар: ⁴¹ Инсаниятла Уршили Сунела малаикунни бурхъу ва Сунела ПачяхІдешлизибти лебилра Низам булъанти бурчу, ⁴² ва илди лебилра ухуси печлизи бухІнабуршу. Илар бисара, цулбала къяржарра дирар. ⁴³ ИлхІели чула Дудешла ПачяхІдешлизиб гІябидуни берхІиван ухар. Бакъес лихІби лерсини бакъаб!

Хъучибси хазналичила ва дурхъаси жавгъар духуриличила

⁴⁴ ГъатІира Зубрала ПачяхІдеш мешули саби авлахъличиб дигІянбарисби хазналичи, сабира адамли баргили, чизилра хІебурили, ва, иличибси разидешли, лерилра секІал дирцуси, ва баягъи хъу исуси.

⁴⁵ ГІурра Зубрала Аллагъла ПачяхІдеш мешули саби жавгъар духури даргес умціуси базригайчи, ⁴⁶ суненира илгъуна ца къякъ баргили, лебилра сунела лебдеш бицили, ил асисби.

Бетакъурси турличила

⁴⁷ ГІурра Зубрала ПачяхІдеш мешули саби урхънази лайбакІибси ва жура-журала бялихъуна биціибси турличи, ⁴⁸ дурасили, кабиили, гІяхІти уркасили, вайти лайдакІибси. ⁴⁹ Илкъяйда бирар дунъяла ахиратлизибра: гІябидуназибад малаикунани вайти декІаркабиру, ⁵⁰ ва илди ухуси печлизи бухІнабуршу: илар бисара, цулбала къяржарра дирар».

⁵¹ ГІисани илдази хъарбаиб: «Аргъирав хІушани илди лерилра?» Илди Илизи бикІар: «ГІе, Аричи!» ⁵² Илини биалли илдази иб: «Илбагъандан Зубрала ПачяхІдешличи вяркъурси гъарил Низамла гІялим мешули сай сунела хазнализирад дуркъабира сагатира дихуси хужаимличи».

«ВеГІла ватІайзив ахІи, хІурмат агарси идбаг вирхІейрар».

⁵³ Илди буралабира дурили, ГІиса илавад арякъун. ⁵⁴ Сунела ватІайзи вакІили, Илини киласабазиб бучІахъухІели, лебилра тамашакабирутири ва бикІутири: «Чинарадтив Илала илдигъунти пасихІдеш ва цІакъ? ⁵⁵ Къисла устала урши ахІену Ил? Сунес Мария бикІуси – Илала неш ахІену? Якъубра, Юсийра, Симонра, Ягъудара – Илала узби ахІену? ⁵⁶ Лебилра илала рузбира нуша-ургабти ахІену? Чинарадти сарив илди лерилра Илала?» ⁵⁷ Илди Иличи бирххІебирханбирулри. ГІисани илдази иб: «Идбагла хІурмат бирар – веГІла ватІайзиб ва веГІла хъулиб ахІенси». ⁵⁸ Дахъал гІяламатунни илар Илини чехІедаахъиб – илди бирххІебирхни сабабли.

Шиннизиб бизахъан ЯхІъя кавшни

14 Илзамана вилаятла халал бекІ Гъирадли ГІисачила хабурти дакъиб. ² Илини сунела къуллукъчибази иб: «Ил – шизиб бизахъан ЯхІъя сай, миціркайубси, илбагъандан сари илини гІяламатунни чедиахъути». ³ Илис гьалав Гъирадли, ЯхІъя уцили, вигъи, туснакълизи катур – сунела узи Филиппла хъунул Гъирадиада багъандан. ⁴ ЯхІъя викІулри Гъирадли ил кариэс асухІебирар или. ⁵ Гъирадлис ЯхІъя кавшес дигулри, амма, ил идбаглизи халирни багъандан, халкълизивад урухкІулри. ⁶ Гъирадла акІубси бархІила байрам дурабуркІухІели, Гъирадиадала рурсили делхъ дариб, илди Гъирадлис гІяхІдизур, ⁷ илбагъандан илини хъяличил чесиб рурсилис дигуси бедес. ⁸ Рурсили биалли, нешли гъиррарни хІясибли, иб: «Наб ишаб кІабатІлизиб шизиб бизахъан ЯхІъяла бекІ биха». ⁹ Пача пашманиуб, амма сунечил кабиитала гьалаб барисби хъя багъандан, ил рикІуси бедахъес хъарбариб ва ¹⁰ туснакълизивси ЯхІъяла бекІ чеббяхъяхъес бархъиб. ¹¹ Илала бекІ

кІабатІлизиб хиб ва рурсилизи бедиб, илини биалли сунела нешличи арбухиб. ¹² ЯхІяла мутаГІялимтани кьаркъала арбухили, хІярибихъиб ва бетаурсиличила ГІисази багъахъур.

ГІисани шел азир белкъахъни

¹³ Ил хабар бакъили, ГІиса, къаякъличи айили, бацІси мерличи сайцун арякъун. Адамти биалли, иличила бакъили, шагъуртазибад хъурали Илис гІергъи бакІиб. ¹⁴ ДуравхъунхІели ГІисани хІекъли бахъал халкъ чебаиб ва, илдачи ряхІмубарили, илдазибад зягІипти сагъбариб. ¹⁵ БархІи ахъибхІели, Иличи мутаГІялимти гъамбиуб: «Ишди халкъ чус хъурабиэси мерра, сегъуна-биалра беркалара баргахъес алавчарти шимази бархъагу. Иш адам хІерхІейруси мер сабину». ¹⁶ Амма ГІисани илдази иб: «Илдас чиналра букъес гІягІинили ахІен, хІушани бахеная». ¹⁷ Илдани Илизи иб: «Нушала лерти шел къацІра, кІел бялихъра сари». ¹⁸ Илини иб: «Илди иша Набчи дихая». ¹⁹ ГІур халкълизи кьарличи кабиахъес хъарбарили, шел къацІра, кІел бялихъра касили, ГІисани, закибхІ хІеръили, баркатладарили, бутІнаддариб ва илабти адамтас дутІахъес Сунела мутаГІялимтази дедиб. ²⁰ Лебилра, букули, белкъун. Калунти бутІнани вецІнукІира чІап дицІахъиб. ²¹ Илаб букунти, хъунул адамтира, дурхІнира халхІебарили, шел азирцад адам лебри.

ГІиса шинничивад вашни

²² ГІисани, адамти баткаайчи, сунес гъалаб, мутаГІялимти къаякъличи абацІахъиб ва итилил дубличи бархъиб. ²³ Халкъ баткаили, хашли балга барес багъандан, Ил дубурличи ацІиб ва бархІехъ илав сайцун калун. ²⁴ Къаякъ биалли, шарала байлизи баилри ва ил ругертани бирхъулри, сенкІун жяргаси бурям ахъбиублири. ²⁵ Авъибил дуги ГІиса илдачи арякъун, шараличивад вашули. ²⁶ Шараличив вашуси ГІиса чеили, Илала мутаГІялимти, гъузгъалдибиубли, бикІулри: «Ил кьаралди саби», ва урехбиубли вявбикІесбииб. ²⁷ Амма ГІиса, илдачил гъайкІескайили, иб: «Ну сайра, урухмакІудая». ²⁸ Петрли жаваблис иб: «Аричи! Ил ХІу виадли, шинничивад ну ХІечи вакІахъес хъарбара». ²⁹ Илини иб: «Ваши». Къаякъличивад кацІили, Петр шинничивад ватихъиб, ГІисачи гъамиэс багъандан, ³⁰ амма, цІакъси дягІ чебаили, урухиуб ва, кяйгІули, вявикІесииб: «Аричи! Ну верцахъаба». ³¹ ГІисани някъ гъабатурли ил уциб ва викІар: «Камси бирхаудила вегІ! Сен хІу васвасухъунри?» ³² Илди къаякъличи абацІибхІели, дягІ багълабиуб. ³³ Къаякъличибти иличи гъамбиуб ва, икрамбарили, иб: «ХІекъли ХІу Аллагъла Урши сайри».

Геннисаретлизиб адамти сагъбарни

³⁴ Бетахъбикили, илди Геннисаретла ванзаличи бакІиб. ³⁵ Илди мер-мусала адамтани, Ил вагъурли, лебилра мер-мусаличи бархъили, лебилра зягІипти Иличи кахъиб. ³⁶ Илди тиладибикІутири, Илала палтарла дубличи гачбикахъесалра батахъес, гачбикибти сагъкабирутири.

Бухънабала гІядат ва Аллагъла Дев

15 Илаб ГІисачи Ярусалимла Низамла гІялимти ва фарисейти бакІиб ва бикІар: ² «Сен хІела мутаГІялимтани, къацІли букухІели някъби хІейцули, гъалабла адамтала гІядатуну дулъути?» ³ Илини жаваблибиахъубли иб: «Сен гъатІи хІушани Аллагъла вягІза булъулра, хІушала гІядат багъандан? ⁴ Аллагъли хъарбариб: „Дудешла ва нешла хІурматбара. Дудешлис ва нешлис виргуси, бебкІали сай вебкІаб“. ⁵ ХІуша биалли дикІулра: „Чили-биалра дудешлис яра нешлис буралли: нушазибад пайдаласи Аллагълис савгъатбара, ⁶ илини сай дудешла яра нешла хІурматбирнилизивад азадвалтули сай“. Илкъяйда хІушани Аллагъла хъарбаркъ хІушала гІядатличил барсбарилра. ⁷ КІибхІянти! Ункъли хІушачила гъалахили буриб ГІисайя идбагли, викІули: ⁸ „Ишди адамтани Дила хІурмат мухІилили бирули саби, уркІи биалли набчибад гъарахъли саби. ⁹ ДугІла илдани Наб икрамбирули саби, инсантала белчІуди-насихІятличи адамти руркъули“». ¹⁰ Халкъ жибарили, ГІисани иб: «ЛехІдизирая ва аргъая! ¹¹ Адам хІярамирахъуси мухІилилизи аркъусини ахІенну, мухІилилизибад дурабулхъусини сай». ¹² ИлхІели мутаГІялимтани, гъамбиубли, Илизи иб: «ХІуни балулрив илди гъай дакъибхІели фарисейта хІейгизниличила?» ¹³ Илини жаваблис иб: «Дила Зубрала Дудешли ухІебатурси гъарилра бухъала къирбарили бирар. ¹⁴ Илди батирая: илди сукъуртала сукъурти гъабкъяби саби. Сукъурли сукъур викалли, кІелра курлизи кабиркур». ¹⁵ Петрли Илизи иб: «Баянбара ил бурала нушаб».

«УркІилизирад дурадулхъан...»

¹⁶ ГІисани иб: «Марлира, хІушани гъаннара хІергъилрав? ¹⁷ ХІушани хІебалулрав мухІилилизирад аркъути лерилра варглизи диъни ва дурааркъни? ¹⁸ МухІилилизибад дурабиркуси – уркІилилизибадси саби ва илини сай адам жярга-хІярамирахъуси. ¹⁹ Кабуршнила, къехІбадешла, тамяхІкардешла, хъулкидешла, къалпти бикъридешла, хІулбуцІла пикруми алкІути уркІилилизир сари. ²⁰ Илдани сай адам жяргаирахъуси, хІедирцибти някъбачил укнили ахІенну».

Хананейланна рурси сагърарни

²¹ Илавад арякъи, Гиса Тирла ва Сидонна улкнази вакѳиб. ²² Хѳера, хананейлан хъунул адам иларад дурарухъи, Илизи вяврикѳесрииб: «Уркѳеѳѳи бара набчи, Аричи, Даудла урши, дила рурси ѳѳакъли жиндралариубли сари». ²³ Амма Илини илизи дубалра хѳехъиб. Гъамбиубли, мутагѳялимти Илизи тиладибухъун: «Раткаа ил, сенкѳун нушаб гѳергъи вявкарѳѳули сари». ²⁴ Илини биалли, илдази иб: «Ну вархъибсира Израилла чердалкѳунти мазаличи». ²⁵ Ил биалли, гъамриубли, Илис икрамрикѳули, рикѳулри: «Аричи! Кумекбара наб». ²⁶ Илини жаваблис буриб: «Дурхѳназибад кебасили къаѳѳ хялис иргъни гѳяхѳси ахѳен». ²⁷ Хъунул адамли иб: «Аричи! Чула хужаимтала къумурларад кадикибти хъимихъули хуранира дугагу». ²⁸ Илхѳели жаваблис Гѳисани иб: «Агъ, хъунул адам! Халаси саби хѳела рирхни, илбагъандан хѳу хъуларѳѳусиван биаб». Илхѳяйзир илала рурси сагъкариуб.

Бахъал сагъбарни ва авал азир адам белкъахъни

²⁹ Илавад дуравхъи, Гиса Галилеяла шараличи вакѳиб ва, дубурличи аѳѳили, кайиб. ³⁰ Илаб Иличи бахъал халкъ бакѳиб, илдала ургаб балкѳабира, сукъуртира, тилхъавтира, гѳяргабира ва цархѳилти зягѳиптира лебри. Илди Гѳисала къяшмала гъала киб. Гѳисани илди лебилра сагъбарѳиб. ³¹ Илбагъандан халкъ тамашакабирутири, тилхъавти гъайбикѳули, гѳяргаби ара-сагъли, сукъурти чебианбиубли, балкѳаби бархъбиубли чебиухѳели, Аллагълис дезни дирулри. ³² Гѳисани биалли, Сунела мутагѳялимти жибарили, иб: «Хѳябал бархѳи набчил барх лебти халкъ Наб язихъбилзули саби, илдала беркеси агара, гушли бархъесра дигули ахѳенра, гъуйчиб гъатѳира усалбикес асубирарну». ³³ Мутагѳялимти Илизи бикѳар: «Илдиѳад халкъ бахес чѳянкѳ авлахъличир къуѳѳри чинар кайсути нушани?» ³⁴ Гѳиса илдази викѳар: «Нушала чум къаѳѳ лера?» Илдани Илизи иб: «Верхѳел къаѳѳра, чумал бялихъра сари лерти». ³⁵ Илхѳели адамтази ванзаличи кабиахъес хъарбарѳиб. ³⁶ Касили верхѳел къаѳѳра, чумал бялихъра, Гѳисани баркатладарѳиб, бутѳнаддарѳиб ва илабти адамтас дутѳахъес Сунела мутагѳялимтази дедѳиб. ³⁷ Лебилра, букули, белкъун. Калунти бутѳнани верхѳел чѳап диѳѳахъиб. ³⁸ Илаб букунти биалли, хъунул адамтира, дурхѳнира халхѳебарѳили, авал азир адам лебри. ³⁹ Халкъра баткаили, Ил къаякъличи айѳиб ва Магадан мер-мусаличи вакѳиб.

Замунтала лишанти дални

16 Фарисейтира, саддукейтира Иличи гъамбиубли, хѳялумѳули, закибадси гѳялама тѳебаахъни тиладибарѳиб. ² Илдас жаваблис Илини буриб: «Бархѳехъ, зак хѳунтѳенбиъни хѳисаббарѳили, хѳуша дикѳулра: „Гѳяхѳси аргъ бирар“; ³ ва савлира, гъуршбиубси зак чебаили, дикѳулра: „Ишбархѳи вайси аргъ бирар“. Кѳибхѳянти! Закла дяхѳ декѳардирес балулра, амма заманала гѳялама тѳунѳи декѳардирес хѳебалулра. ⁴ Гѳямултар ва пасадси наслу гѳялама тѳунагѳиб умѳѳули саби, амма илис гѳялама тѳунѳи дедхѳелуга, Юнна гѳялама тѳунѳи ахѳенти». Илди батурли, Гѳиса гъарахъикиб.

Фарисейтала берхетѳ

⁵ Итилил дубличи бетахъбѳикили, Илала мутагѳялимтани къуѳѳри асес хъумартур. ⁶ Гѳисани илдази иб: «Хѳердикѳеная, фарисейтала ва саддукейтала берхетѳлизирад мяхѳкамдиирая». ⁷ Илди биалли, саби-ургаб пѳикрикабикѳулри: «Къуѳѳри кахѳесира къалли нушани». ⁸ Иличила багъурли, Гѳисани иб: «Сен хѳуша къуѳѳри кахѳесири или пѳикрикадикѳулра, камли дирханти?» ⁹ Яра хѳергъирав, яра гъанхѳебиркулив шел азир адамлис даибти шел къаѳѳличила ва сеѳад имѳѳалира калунал? ¹⁰ Авал азирлис даибти верхѳел къаѳѳличилара, ва чум чѳап имѳѳара духъунал гъанхѳебиркулив? ¹¹ „Фарисейталара, саддукейталара берхетѳлизирад мяхѳкамдиирая!“ или, ибти дила гъай къаѳѳличила хѳедѳни сен хѳергъулра?» ¹² Саби мяхѳкамбиѳс гѳягѳниси бетѳула берхетѳ ахѳи, фарисейталара, саддукейталара белчѳуди биъни илхѳели илдани аргъиб.

Аллагъла Урши Гѳиса Масѳхѳличи Петр вирхули сай

¹³ Филиппла Къайсариятѳлизи вакѳибхѳели, Гѳисани мутагѳялимтази хъарбаиб: «Инсаниятла Урши чи сай бикѳулив адамти?» ¹⁴ Илдани иб: «Цабехѳѳи Яхѳъя сай, цархѳилти Илияс, итилти Еремѳя яра ца цархѳил идбаг сай бикѳули саби». ¹⁵ Ил илдази викѳар: «Хѳуша чи сай дикѳулра Наб?» ¹⁶ Симон Петрли, жаваб лугули, иб: «Хѳу – Масѳхѳ сайри, Миѳѳирси Аллагъла Урши». ¹⁷ Илхѳели Гѳисани илис жаваблис иб: «Ирхѳилибси сайри хѳу, Юнна урши Симон, сенкѳун чархли яра хѳили ахѳен хѳед ил гъаргбарѳибси – Дила Дудешли саби, зубрачивси. ¹⁸ Ну хѳези викѳулра: Хѳу Петр сайри ва ил къаркъаличиб Нуни Дила уммат алкѳахъас, жагъаннабла къапулира илис селра барес хѳедирар. ¹⁹ Зубрала Пачяхѳдешла умхъни хѳези лугасра: ванзаличиб асухѳебиахъубси зубрачивбра асухѳебирар, ванзаличиб асубиахъубси зубрачивбра асубирар». ²⁰ Илхѳели Илини Сай Гѳиса Масѳхѳ

виъниличила чизилра хІебурахъес Сунела мутагІялимтази хъарбариб.

²¹ Ил заманаличивад вехІихъили, ГІисани Сунела мутагІялимтази гъамли Сунес детарутачила балахъескайиб: Сай Ярусалимлизиди аркъниличила, хала тјамадабазирад, хала кашишуназирад ва Низамла гІялимтазирад дахъал къиян-жапа чекасес чевкъниличила, каршниличила ва хІябъибил бархІи мицІирирниличила. ²² Сунечи ГІиса витІакІахъили, Петр къабулагарли гъайухъун: «Аллагъли ХІечи уркІецибиру, Аричи! Илгъуна ХІечил хІебирар!» ²³ Петрличи дугъайзурли, Илини иб: «ГІелумии набчивад, Илбис! ХІуни Ну чевулкІахъулра, сенкІун хІу Аллагълайчила пикриикІули ахІенрину, адамталайчила пикриикІулри».

Сунес гІелабад башниличила ва чебуркъибси дех бихниличила

²⁴ ИлхІели ГІисани Сунела мутагІялимтази буриб: «Наб гІергъи вакІес дигусини, сунела жайчивадра чевверхурли, ва, сунечи чебуркъибси дехра бихули, вакІаб. ²⁵ Сунела гІямру дерцахъес дигусини илди детихъахъу. Амма Ну багъандан сунела жайзивад ухъунсини биалли, илди уцахъу. ²⁶ Лебил дунъя сунела бетааллира, адамлис се гІяхІдеша, эгер сунела рухІлис заралбиралли? Яра се бедес вирара адамли сунела рухІ калахъес? ²⁷ Сунела Дудешла ва дурхъати малаикунала чебяхІдешла рурхІнилизив Инсаниятла Урши льякъян ва илхІели гъарилра сунела баркъудлуми хІясибли къиматлаиру. ²⁸ ХІекъдеш бурулра хІушази: ишаб тІаштазибад цацабехІли бекІала хІял багъес гъалавал Сунела ПачяхІдешлизи льякъуси Инсаниятла Урши чейу».

ГІиса варсиъни

17 Урегал бархІи дикибхІели, Петрра, Якъубра, илала узи Югъанра касили, ГІиса ахъси дубурличи ациб. ² УлгухІели, илдала гъалав варсиуб: Илала дяхІ берхІиван ухесдиб, палтар шалаван цІубдиуб. ³ Илдани Иличил ихтилатбикІути Мусара Илиясра чебаиб. ⁴ ИлхІели Петрли Илизи иб: «Аричи, нушаб ишаб лебгІеб гІяхІил саби! Дигалли, ишар хІябал чятир дирехІе, ца ХІед, ца Мусас, Ца Илияслис». ⁵ Илини ил бурухІели, шаласи гъагул багъарбиубли, илди сунела дяхІцили кІапІбариб ва гъагуллизибад тІама бакъиб: «Ил сай Дила дигуси Урши, Дила харидешра Иличи саби. Иличи лехІдилзелена!» ⁶ Ил бакъибмад, мутагІялимти бяхІудибкиб ва хІекъли урухбууб. ⁷ Амма ГІиса, гъамиубли, илдачи гачикили, иб: «Адизирая ва урухмакІудая». ⁸ Илдани чула хІулби ахъдуцибхІели, ца ГІиса ахІенси чилра чехІеиб. ⁹ Дубурличибад

кабицІухІели, ГІисани илдази хъарбариб: «Инсаниятла Урши вебкІили мицІириайчи, Ишаб хІушани чебаибсиличила чизилра мабуридая». ¹⁰ МутагІялимтани Илизи хъарбаиб: «Илияс гъалав вакІес гІягІниси сай или, сен бикІутив низамла гІялимти?» ¹¹ ГІисани илдас жаваблис иб: «Бархъси саби, Илияс, гъалав вакІили, гъар секІал цугдушес гІягІниси сари. ¹² Нуни бурулра хІушази: Илияс вакІиб, амма ил вагъхІегъур ва адамтани илис чус дигуси бариб. Илкъяйда илдазирад Инсаниятла Уршилира гІязабти чекайс». ¹³ ИлхІели мутагІялимтани аргъиб Илини дурибти шишиб бизахъан ЯхІъячила диъни.

Жиндралаиубси сагъварни

¹⁴ Илди халкъличи бакІибхІели, Иличи ца адам гъамиуб ва, къукъмусикили, ¹⁵ иб: «Аричи! Дила уршиличи уркІецибара. Бац цІибухъунхІели, ил жиндралаирули сай, ва цІакъли инжитирули сай: гъачам цІализи, гъачам шинниси тІяхІикІули сай. ¹⁶ Нуни ил ХІела мутагІялимтачи кира, амма илдани сагъварес хІебиуб». ¹⁷ Илис жаваблис ГІисани иб: «Агъ, хІебирхуси ва пасадси къам! Ну сецадхІи хІушачил варх виэс ва хІушани дирутачи Нуни гІурра сецадхІи сабурбарес вирусира? Гъари, ил урши иша кая!» ¹⁸ ГІисани жинд дугІаиб ва урши бусягІят сагъиуб. ¹⁹ ИлхІели мутагІялимтани ГІисази хъарбаиб: «Сен нушани ил дугІаэс хІедиубра?» ²⁰ ГІисани Илдази иб: «Камли дирхни багъандан. ВикІулрагу хІушази: эгер мучила къякъцадалра хІушала дирхни биубли, иш дубурлизи бурадалли: „Ишадли ита арбукъен“, ил аркъян ва хІушани хІебареси селра хІебирар».

Сай убкІниличила ГІисани гъалахили бурни

²² Саби ГалилеялизибхІели, ГІисани илдази иб: «Инсаниятла Урши адамтала някъбази ведлуга, ²³ Ил каршу ва хІябъибил бархІи мицІирирар». Илди цІакъли пашманбиуб.

Аллагъла хъайс хІекъ бедни

²⁴ Капернаумлизи бакІибхІели, Аллагъла хъайс кІи-кІел шагъи дурчанти гъачам Петрличи гъамбиуб ва иб: «ХІушала МугІяллимли кІел шагъи хІелугав?» ²⁵ Ил викІар: «ГІе». Ил хъули ацибхІели, ГІиса гъалаикили, иб: «ХІед секъяйда гъанбиркулив, Симон, ванзала пачнани хІекъра, налогунира чизирад кайсув? Чула дурхІназирад яра урхІлизирад?» ²⁶ Петр Илизи викІар: «УрхІлизирад». ГІисани Илизи иб: «ХІебиалли, дурхІни азадли саби, ²⁷ амма илдас хІейгихІебизахъес, урхъуличи бялихъуни дуцес укъен ва, цаибил бялихъла мухІли абхъили, иларад авал шагъи касану, хІела ва Дила шайзирад деда».

«Тяп дурхІниван...»

18 Ит замана мутагІялимти Писачи гьамбиуб ва иб: «Зубрала ПачяхІдешлизив чи халасив?» ² Писани, виштІаси дурхІя живарили, илдала урга катурли, ³ иб: «ХІекъли бурулра хІушази: эгер ласхІедухъадалли ва дурхІнигъунтили хІедиадалли, Зубрала ПачяхІдешлизи ахІедицІудая. ⁴ Иш дурхІяван сунени сай виштІаварибси Зубрала ПачяхІдешлизив халаси вирар. ⁵ Ну багъандан ца ишгъуна дурхІя къабулварибсини, Нура къабулирулра. ⁶ Амма илдазивад, Набчи бирхутазивад, цалра вирхнлизивад сунени гІелумаибсилис, хъябличи урхамра бигъи, урхъула лутІилизи тІяхІухъни бегІлара гІяхІсири.

⁷ Чараагрти бунагъуни дихуси дунъялисра балагъ, амма цархІил вирхнлизивад улхъахъуси адамлисра балагъ. ⁸ Эгер хІела някъли яра къяшли чевулкІахъули виадли, чердяхъяну лайдакІа: гІямрулизи ацІес къяш яра някъ агарли къулайли бирар, кІелра къяшличил ва кІелра някъличил даимси цІализи лайвакІниличиб. ⁹ Эгер хІела хІуй чевулкІахъули виадли, дураабитІенну лайвакІа: гІямрулизи ацІес хІули агарли къулайли бирар, кІелра хІуйчил жагъаннабла цІализи лайвакІниличиб.

¹⁰ ХІердикІеная, ишди биштІатазибад цалра мучлаагармабиридая, сенкІун хІушази викІулра: зубрачибти илдала малаикунани Зубрачивси Дила Дудешла дяхІ мурталра чедиути сари .

ЧеббалкІунси маза

¹² ХІушаб секъяйда гъанбиркулив? Даршал маза лерси хІушазивадли цала, ца чебкабалкІи бетахъили саби. Ил сунела гІелар калунти урчІемцІанну урчІемра мазара датурли, илигІив умцІес архІякъяну, гъатІи? ¹³ БаргибхІели, хІекъли викІулра хІушази, калунти урчІемцІанну рчІемраличив имцІали разиирар. ¹⁴ Илкъяйда хІушала Зубрала Дудешла амру агара ишди биштІатазивад цалра алхяхъес.

Бунагъуни дируси узи

¹⁵ Эгер хІечи къаршили хІела узини бунагъ баралли, укъенну сунелара хІелара ургацун пужбара. ЛехІахъалли хІечи, хІела узи варгири. ¹⁶ Эгер хІечи лехІихъалли, хІечил барх ца яра кІел адам каса, кІел яра хІябал бикърили гъарил дев марбаресли. ¹⁷ Илдачи лехІихъалли, бирхантаци бура. Бирхантацира лехІихъалли, хІед сай аллагъагарсиван яра хІекъ бурчанван виаб. ¹⁸ ХІекъли бурулра хІушази: ванзаличиб асухІебиахъубси зубрачибра асухІебирар, ванзаличиб асубиахъубси зубрачибра асубирар.

«Дила у багъандан кІел яра хІябал учибикибхІели...»

¹⁹ Гурра хІекъли бурулра хІушази: эгер хІушазибад кІел къабулбикалли, ванзаличиб сегъуна-биалра секІайчила тиладибарес, се тиладибараллира Дила Зубрала Дудешли луга. ²⁰ Ну багъандан кІел яра хІябал учибикибхІив илдала ургав Нура вирусира.

10 азирла мургъила умцлала ва 100 динарла чебла хІялалбалтнличила

²¹ ИлхІели Петр Иличи гъамиуб ва иб: «Аричи! Чуйна чевурхусирав набчи къаршили бунагъ барибси узичивад? ВерхІнара-сера?» ²² ГІиса викІар илизи: «ВерхІна викІули ахІенра хІези, верхІна верхІцІайна викІулра.

²³ Илбагъандан Зубрала ПачяхІдеш мешуси саби сунела лугърачил бетиркуси хІисаббарес вализурси пачачи. ²⁴ ХІисаббирес вехІихъибхІели, иличи ца пулан кибсири, сунелара арцла вецІал азир умцлала чебла лебси . ²⁵ Илала дедес арц агархІели, пачани буйрухъбариб сайра, илала хъунулра, дурхІнира, лерилра илала лертира дицахъили чебла чарбарахъес. ²⁶ ИлхІели лагъ къукъмусикиб ва викІар: „Пача! Гъиматчевиубли, ну ватаба, хІела арц нуни чардири“. ²⁷ Пачани, уркІецІибарили, чеблаличивад чевкерхур ва лагъ ваткаиб. ²⁸ Ил лагъ биалли, дуравхъи, сунела ца уртахъ варгиб, даршал динарла чеблалиувси ва, уцили, гІяндуршесвяхІиб: „Дила чебла чарбара“, – викІули. ²⁹ ИлхІели уртахъ илала къяшмала гъала къукъмусикиб ва бусравухъун: „Сабурбарили, ватаба, лерилра чардири“. ³⁰ Амма ил хъулхІевхъун ва, вякъи, чебла чарбарайчи ил туснакълизи катур. ³¹ Бетаурси чебаили, уртахъуни хІекъли пашманбиуб ва, пачачи бакІили, лерилра детаурти дуриб. ³² Пачани ил живариб ва иб: „УвахІси лагъ! ХІела лебилра чеблаличивад ну чевкерхурра, хІуни тиладибарибхІели. ³³ ХІура хІела уртахъличивад чевкерхес гІягІиниси ахІенрив, ну чевкерхурси къяйда?“ ³⁴ ГІясиуубли, сунела лебилра чебла чарбарайчи, пачани ил къараултази ведиб. ³⁵ Дила Зубрала Дудешра хІушачил илкъяйда вирар, эгер хІушазивад гъарил уркІи-уркІилавад узила бунагъуначивад чевкахІерхалли».

Магъар кабуршуси сабаб

19 ГІисани илди гъай тамандарибхІели, Галилеялизивад дуравхъи, Иордан хІеркІла итил шайчирти Иудеяла мер-мусаличи вакІиб. ² Илис гІергъи бахъал адамтира бакІиб, илди Илини илаб сагъбариб.

³ Иличи фарисейти гъамбиубли ва, Илала хІялумџули, бикІулри: «Ихтияр лебсив адамлизиб гъарил сабабличивли сунела хъунуйчил декІаркаркес?» ⁴ Илдас жаваблис Илини иб: «ХІушани хІебелчІунрајав, гъаланачи мурул адам АкІахъубсини хъунул адамра акІахъниличила?» ⁵ Илини чебатур: «Илбагъандан адамли балта неш-дудеш ва сунела хъунуйчи џапалкан, ва кІел цали бетарар. ⁶ Илбагъандан гъанна илди кІел ахІенну, ца чарх саби. Аллагъли бархбяхъибси адамли декІарбируси ахІен». ⁷ Илди Илизи бикІар: «Сен гъатИи Мусани магъар бушнила кагъарра бедили, декІариркахъес хъарбарибсив?» ⁸ Ил илдази викІар: «Мусани хІушала хъунразирад декІардиркахъес пурбанбарибсири, хІушала абздеш пикрилизи касили, амма гъаланачи илкьяйда бируси ахІенри. ⁹ Ну викІулра хІушази: хаинхІериубкъи хъунуйчил декІарикибси ва цархІилличи хъайчикайибси сайра хаинирули сай». ¹⁰ Илизи мутагІялимти бикІар: «Адамла чебла илгъуна биалли, бекІлил хъунул кахІериъни гІяхІси саби». ¹¹ Илини биалли илдази иб: «Иличил гъарил къабуликес хІейрар, чедибад сунес ил бедибси ахІенси. ¹² Нешла канилабал илкьяйда акІубти бурхъаби леб, адамтани бурхъибтира леб, Зубрала ПачяхІдешлис чули саби бурхъаби барибтира леб. Къабулбарес вирусини къабулбараб».

ГІисани дурхІни баркатлабирули сай

¹³ ГІиса гачикахъес ва баркатлабарахъес, халкъли Иличи биштІати дурхІни киб. МутагІялимтани биалли къадагъабирулри. ¹⁴ ГІисани иб: «ДурхІни Набчи бакІахъес батирая ва илди Набчи башахъес диргаламадулхъадая, Зубрала ПачяхІдеш илдигъунтас саби къадарси». ¹⁵ Илдачи някъбира гачдикахъили, илавад арьякъун.

Даимти ГІямру; давлачевси ГІулухъа

¹⁶ ХІера, ца пулан Иличи гъамиубли, иб: «ГІяхІси мугІяллим, даимти ГІямру диахъес се гІяхІбаркъ баришал бурагу?» ¹⁷ ГІисани илизи иб: «ХІу Набзи „ГІяхІси“или сен викІусири? ХІуни багъи, цайли ца Аллагъ ахІи, цархІил чилра „ГІяхІси“ левси ахІен. Даимти ГІямру сархес дигадли, Аллагъла амрурти тамандирен». ¹⁸ Ил викІар: «Сегъунти?» ГІисани биалли, иб: «Инсан камаршид, хаинмайруд, хъулкидеш мадирид, къянати бикъридеш мадирид; ¹⁹ хІела неш-дудешла хІурмат бирен ва гъамси хІед хІуван дигахъен». ²⁰ Жагъил адам Илизи викІар: «Нуни илди дурхІяхІейчирадал дузахъулра, гІур се камлив наб?» ²¹ ГІисани илизи иб: «Ахъси даражаличиикес дигадли, хІела лебилра лебсигъуна секІал бицану, мискинтас бутІа. ИлхІели зубрачибра хІела давла бирар. Илала гІергъи хІу Наб ГІелавад вакІи». ²² Амма илди гъай

дакъили, жагъил хумарли ГІелумиуб, сенкІун ил халаси давлала вегІ адам сайри.

«Аллагъла ПачяхІдешлизи аџІес давлачевлис къиянни саби»

²³ ГІисани Сунела мутагІялимтази иб: «ХІекъли викІулра хІушази: къиянни саби давлала вегІлис ПачяхІдешлизи аџІес. ²⁴ ГІурра викІулра хІушази: давлачевсилис Зубрала ПачяхІдешлизи аџІесичиб, валрилис буребала тІярхъилабад бетаџІес гъамадли саби». ²⁵ Ил бакъили, мутагІялимти хІекъли тамашабиуб ва иб: «Чи верцес вируси гъатИи?» ²⁶ ГІисани илдас жаваб бедиб: «Адамтас ахърихІебикІуси Аллагъли барес вирар».

²⁷ Петрли жаваблис Илизи иб: «ХІера, нушала лебсигъунара бархъкабатурли, нуша ХІед ГІеларадли дакІира, нушаб се бирара?» ²⁸ ГІисани илдази иб: «Нуни бархъли бурулра, наб гІергъи дакІибти, Инсаниятла Урши Сунела чебяхІдешла тахличичи кайибхІели, веџІнукІира тахличичи хІушара кадирудая ва Израилла веџІнукІира къамлис суд бирида. ²⁹ Дила у багъандан сунени сай вегІси юрт, яра узби, яра бегІти, яра дурхІни бархъбатурси гъарилли даршналли имџІали кайсу ва даимти ГІямрула букъурра ветарар. ³⁰ Бахъал цаибти бегІла гІергъитили бирар, бегІла гІергъитира цаибтили бирар.

ТІутІила анхълизибти хІянчизартачила бурала

20 Зубрала ПачяхІдеш тІутІила анхълизи хІянчизарти буцес савли жявли дуравхъунси хъа вегІличи мешуси саби. ² БархІилис ца динар бедлугесли хІянчизартачил вягІда барили, илди сунела анхълизи бархъиб. ³ СягІят хІябал диркухІели, дуравхъунси илини базарла майдайчиб тІашти цархІилтира чебаиб. ⁴ Илдазира анхълизи букъяхъес буриб, чус бетиркуси бедес чесили. ⁵ ГІурра урегличив ва урчІемличив дуравхъи, баягъи илкьяйда бариб. ⁶ Ахирра, сягІят веџІнуцара диркухІели, ГІурра дуравхъун ва цархІилтира баргили, илдази викІар: „Сен абзур бархІи бируси агарли ишар тІаштира?“ ⁷ Илди бикІар Илизи: „Нуша чилилра жихІедарира“. Ил илдази викІар: „ХІушара дукъеная дила тІутІила анхълизи, хІушаб сабиркусира лугас“. ⁸ БархІи ахъибхІели, хъа вегІ сунела къуллукъчизи викІар: „ХІянчизарти жибарили, чус бетиркуси багъа беда, бегІла гІергъитачивад вехІихъили цаибтачи бикайчи“. ⁹ ВеџІнуцара диркухІели бакІибтанира ца-ца динар касиб. ¹⁰ БегІгъалаб бакІибтас гъанбикиб чули имџІали кайсу или, амма илданира ца-ца динар касиб. ¹¹ Касили, илди хъа вегІличи жункъурбикІесбиб, ¹² ишкъяйда бикІули: „БегІла гІергъити ца сягІят сабри бузибти, илди хІуни

нушачил цугбушири, нушаникІун барХила кЪияндеш ва буцІардеш чекасира“. ¹³ Илини биалли, жаваблис, илдазивад цализи иб: „Гьалмагь! Нуни хІед вайси бирули аХІенра. Ца динарлис аХІенрив гьатІи хІу набчил вягІдалаиубси? ¹⁴ ХІед сабиркуси касили, арукъен; наб биалли, бегІла гІергъисилисра хІедгъуна хІекъ бедес дигула. ¹⁵ Наб дигуси барес набзиб ихтияр агарав гьатІи? Яра хІела хІули кьясбиублив ну гІяхІверхурхІели?“ ¹⁶ Илбагъандан бегІла гІергъити цаибтили ва цаибти бегІла гІергъитили бирар».

ГІисани Сай убкІниличила гьалахили бурни

¹⁷ Ярусалимлизи аркъули, Сунела вецІнукІира мутагІялим ца шайчибяхІ букили, ГІисани илдази иб: ¹⁸ «ХІера, гъанна нуша Ярусалимлизи аркъула. Инсаниятла Урши киласала халалтази ва Низамла гІялимтази ведлуга ва кавшес суд биру. ¹⁹ ГІур аллагъагартази ведили, илдани Иличир кьугъни диру, витра вители, гІур каршу. ХІябэсил бархІи Ил мицІиркайрар».

Заведейла уршбала нешла тилади; «ХІушазивад чидил халалли виэс дигаллира, хІушаб кьаравашли виаб»

²⁰ ИлхІели сунела уршбачил Иличи Заведейхъала неш гъамриуб, се-сабил тиладибирули. ²¹ Илини илизи иб: «ХІед се дигулрив?» Ил Илизи рикІар: «ХІела ПачяХІдешлизиб дила уршби ХІела мякъла ца балуй шайчи, ца алгъай шайчи кабатахъес бура». ²² ГІисани жаваблис иб: «Се тиладибирулрал балули аХІенра. Нуни бужуси умегІ бержес дирудаяв?» Илди Илизи бикІар: «ДирехІе». ²³ Илдази викІар: «Дила умегІ бужидая, амма балуй ва алгъай шайчи кадиъни Набзибад дигахъуси аХІен. Дила Дудешли хІядурбарибтала сари илди мусни». ²⁴ Иличила бакъили, калунти вецІал мутагІялим кІелра узичи гІясибиуб. ²⁵ ГІисани, илди жибарили, иб: «ХІушани балула цархІил халкъанала талхъунти адамтачи буюрбикІули биъни, хІякимтира буюрбикІули саби. ²⁶ Амма хІушала ургаб илкъяйда мабиаб: хІушала ургав халал ветаэс дигуси, хІушаб лагъли виаб. ²⁷ ХІушала ургав цаибил ветаэс дигусира, хІушаб лагъли виаб. ²⁸ Инсаниятла Урши сунес кьуллукъбирахъес вакІибси аХІенну, сай кьуллукъбарес ва бахъал берцахъни асес жан дедес вакІибси сай».

КІел сукъур сагъбарни

²⁹ Саби Ерихоннизивад дурабулхъухІели, илдас гІергъи бахъал халкъ башули. ³⁰ Гъунила дубла кабибти кІел сукъурли, ГІиса льякъниличила бакъили, вявбикІесбиб: «Аричи! Даудла урши, уркІецІибара нушачи!» ³¹ Халкъли илди лехІихъахъулри, амма илди гьатІира ахъли

вявбикІесбиб: «Аричи! Даудла урши!» ³² ГІисани, тІашизурли, илди жибарили, иб: «ХІушаб се дигулрав Набзибад?» ³³ Илди Илизи бикІар: «Аричи! ХІулби гьаргдиубли дигула!» ³⁴ ГІиса, уркІецІибарили, илдала хІулбачи гачикиб ва илхІяйзир илдала хІулби чедиандиуб. Илди кІелра ГІисас гІергъи арбякъун.

ГІиса Ярусалимлизи ухІнаахъни; халкъ хІулбукІни

21 Ярусалимличи гъамбиубли, Вифагиялизибси Елеон дубурличи бакІибхІели, ГІисани кІел мутагІялим бархъиб, ² илдази или: «Ит бяхІчиси шилизи дукъеная. Илаб хІушани гъаялизи бигъунси кьарира, жагъил эмхІера чедида. Гъаялизира арзили, илди иша кая. ³ Эгер чили-биалра хІушази хьарбаалли, „ишди Аричис гІягІнидикили сари“ или, бурая». ⁴ Ил секІал бетаурси саби Аричини бурибси бетерхахъес багъандан. Идбагла гъайличил бурибсири: ⁵ „Бурая Сионна рурсилизи: хІера, хІела Пача льякъули, кьариличив ва жагъил эмхІечив – дукІлиубсила дурхІяличив“». ⁶ Аричини бархъибти мутагІялимтани, арбякъи, гьар секІал Илини чучи хьарбарибси тяхІярли дариб. ⁷ Илдани кьарира, жагъил эмхІера ГІисачи киб ва илдачи чула палтар чедушили, ГІиса мурдаяхъиб. ⁸ Ил ватихъибхІели, цабехІли чула палтар, цархІилтани галгала кьялуби ГІиса аркъуси гъуйчи удуршутури. ⁹ Гьалаб башути халкъ дезабикІескабиб: «Берцуди Даудла Уршилис! Аричила уличил Льякъуси баракатла сай! Чихъ зубрас деза!» ¹⁰ Ил Ярусалимлизи ухІнаухъунхІели, лебилра шагъар жургъбикІескабиб, адамти бикІулри: «Чи сая Ил?» ¹¹ Халкъ бикІулри: «Ил ГІиса сай, Галилеяла Назаретлизивадси идбаг».

Вачуртазияхъибти Аллагъла хъайзибад дугІаъни; сукъурти ва гІяргаби сагъбарни

¹² ГІиса Аллагъла хъули ацІиб ва илабти лебилра бирцути ва исути дугІаиб, арц дарсдирутала кьасурбира, лагъни дирцутала утнира гераиб ¹³ ва илдази иб: «БелкІи саби: „Дила хъали – балгала хъалили бирар“ или. ХІушани биалли ил кьачагъунала кьехІбаханаличи шурбатурлира». ¹⁴ Илаб Иличи сукъурти ва гІяргаби гъамбиуб, Илини илди сагъбариб. ¹⁵ Хала кашишунани ва Низамла гІялимтани Илини чедиахъути гІяламатунира чедиули, «Даудла Уршилис деза!» или, вявбикІути дурхІнира чебиули, гІясибиуб ¹⁶ ва Илизи иб: «Бикъулрив илди се бикІулил?» ГІиса илдази викІар: «Ге! ХІушани гъачамалра „ХІехартала кІунтІбачил ХІуни деза тІашбатурри“ или, хІебелчІунраяв?» ¹⁷ Илди батурли,

шагъарлизиwad Вифаниялизи арякъун ва илаб дуги беркИиб.

Инжирла беръубси галга; вирхничила

¹⁸ Савли, шагъарлизи чарулхъухИели, гушкайуб.
¹⁹ Гъунила дублаб инжирла ца галга чебаили, иличи гъамиуб, амма кІари ахІенси селра хІебаргили, илизи викІар: «ХІечибад гІурра муртлисалра цІедеш мадакІаб!» Инжир илхІяйзиб беръуб.
²⁰ МутагІялимтани ил чебаили, тамашабиуб ва иб: «Секъяйда инжир бусягІят берэс биубсив?»
²¹ ГІисани илдас жаваблис иб: «ХІекъли бурулра хІушази, эгер хІушала дирхни биалли, ва васвасхІедикІадалли, инжирличил барибсицун ахІи, их дубурлизи адалли: „Ахъбиину, урхъулизи кабики“ или, илра бетарар. ²² Дирхули, балгализиб се тиладибарадалра ил бетарар».

«Сегъуна ариличил ХІуни илди дирулрив?»

²³ Ил Аллагъла хъули вакІили, ГІякълума угъухИели, хала кашишунира, халкъла тямадабира бакИиб, ва иб: «ХІуни илди лерилра секІал чила ихтиярличил дирусири? ХІед илгъуна ихтияр чили гибси?» ²⁴ ГІисани илдас жаваблис иб: «Гъари, Нунира хІушази ца суал хъарбиисну, хІушани Набзира бурая, иличила хІушани бурадалли, Нунира бурисра сегъуна ихтиярличил илди дирулрал. ²⁵ ЯхІгъяни шиннизиб бизахъни чинадсири? Зубразибадсирив яра адамтазибадсирив?» Илди чузиб-саби пикрибухъун: «Эгер нушани „зубразибадли“ или, бурахІелли, Илини нушази иру: „ХІуша иличи сен дирххІеуррая, гъатИи?“ ²⁶ Амма нушани „адамли“ или, бурахІелли, халкълизирад урухкІулра, сенкІун лебтанилра ЯхІгъя идбаглизи халирули сай». ²⁷ ГІур илдани ГІисас жаваб чарбатур: «Нушани хІебалехІе». Илдази Илини иб: «ХІебиалли, чила ариличи хъарахъили дирулрал хІушази Нунира хІебурис.

КІел уршиличила бурала

²⁸ ХІушаб се гъанбиркулив? Ца адамла кІел урши лебри: ил цаибилличи гъамиубли, иб: „Урши! ИшбархІи вякъи дила тІутІила анхълизиб хІянчи бара“. ²⁹ Амма илини иб: „Дигули ахІенра“. ГІур биалли, сунела пикри барсбарили, анхълизи арякъун. ³⁰ ЦархІилличира дудеш гъамиубли, илкъяйда буриб. Уршили жаваблис иб: „Аркъясра“, амма архІявкъун. ³¹ Илдазивад чидилли дудешла амру таманбарива?» Илизи бикІар: «Цаибилли». ГІиса илдази викІар: «ХІекъли викІулра хІушази: хІекъ бурчантира, къехІбунира хІушаб гъалаб Аллагъла ПачяхІдешлизи аркъули саби, ³² сенкІун гІябиддешла гъуйчивад хІушачи ЯхІгъя вакИиб, амма хІуша иличи дирххІеуррая; хІекъ бурчантира,

къехІбунира биалли бирхаур. ХІушани, ил чебаибкъи, гІурхІелира я пашманхІедиубра, я иличи дирххІеурра.

Вайти тІутІи дашахъантачила; «юрт лушантани мучлахІебарибси къаркъаличила»

³³ ЛехІдизирая цархІил буралаличи: ца адамли, тІутІира удатурли, анхълис хІярира дяхъили, тІутІидялчра барили, хІерудибарахъес анхъчибази бедили, сай вахъХІилис дура арякъун. ³⁴ ТІутІи дилкъуси замана сабаибХІели, илини анхъчибачи сунес биркуси сабухъ сасахъес къаравашуни бархъиб. ³⁵ Амма анхъчибани ца витиб, цархІил кавшиб. ³⁶ Илини гІурра цархІилти къаравашуни бархъиб. Илдасра ил бариб. ³⁷ Ахирра, илдачи сунела урши вархъиб: „Белики, илала хІурматбарес“, – викІули. ³⁸ Амма анхъчиба, ил чеили, цализи цали иб: „Даширая ит кавшили, илала масла букъурти детарехІе!“ ³⁹ Анхъчибани ил, анхъла дура арукили, кавшиб. ⁴⁰ ТІутІила анхъла вегІли илдас се бирув гъатИи?» ⁴¹ Илизи бикІар: «Анхъла вегІ чарухъунХІели, анхъчибира, гІязабберкІили, кабуршу, сунела заманаличир тІутІи дучили, сунес лугести, цархІилти анхъчибази анхъра бедлуга». ⁴² ГІиса илдази викІар: «Марлира, хІушани гъачамалра хІебелчІунсив Дурхъати жузази белкІунси: „Лац лушантани хІейгибарибси къаркъа музализиб бегІлара хІяжатсили бетаур“ или? Аричини барибХІели саби ил секІал нушала хІулбазиб тамаша бетаурси. ⁴³ Илбагъандан бурулра хІушази: Аллагъла ПачяхІдеш хІушазибад кебасили, цІедеш лугути халкълис бедили бирар. ⁴⁴ Ил къаркъализи чегибсира, кайкили, тІутІуирар, ил къаркъа сунечи кабикибси адамра ПІянчІкайу». ⁴⁵ Илала буралаби дакъили, хала кашишунанира, фарисейтанира аргъиб Ил чучила гъайикІули виъни. ⁴⁶ Илди къайгъилизибри Ил уцес, амма халкълигиб урухбиуб, сенкІун Ил идбаглизи халирулри.

Мекъла сяхІбатличила бурала

22 ГІиса, буралабачил гъайикІес даимиубли, иб: ² «Зубрала ПачяхІдеш сунела уршилис мекъ барибси пачачи мешули саби. ³ ХІера, илини сунела лугъри бархъиб мекъла сяхІбатличи жибарахъес, амма жибарибти бакІес хъулхІебухъун. ⁴ ГІурра бархъиб цархІил лугъри, ишкъяйда или: „Жибарибтази бурая, хІерикун хІядурли саби, цІерхъдарибти бугъни делгъи сари, гъар секІал хІядурли сари, мекъла сяхІбатличи даширая“ или. ⁵ Амма илдани, ил жи мучлахІебарили, цабехІ чула хъумачи, цархІилти вачурта биркъес арбякъун, ⁶ цархІилтани илала лугъри батІун ва кабушиб. ⁷ Иличила бакъибси пача гъимукИиб ва, сунела ГІяскурти дархъили,

лугъри кабушибтира къирбариб, шагъарра цІали бигуб. ⁸ ИлхІели ил сунела лугърази викІар: „Мекъла сяхІбат хІядурли саби, амма жибарибти лайикъти ахІенри; ⁹ дукъеная хІябкъяйтаци ва чихъали къаршибикалра мекъла сяхІбатличи жибарая“. ¹⁰ Илди лугъри, гъундурачи дурабухъи, лебилра къаршибикибти жибариб – вайтира, гІяхІтира. Мекъла хъали жибарибтани бициб. ¹¹ Илдаци хІеризес ацибси пачани мекъла палтар агарли кайибси ца адам чеиб ¹² ва илизи иб: „Юлдаш! ХІу сен ацибсирив иша мекъла палтар агарли?“ Ил лехІкахъиб. ¹³ ИлхІели пачани къаравашунази иб: „Някъбира, къяшмира дигъи, дурала цІябдешлизи лайвакІая, илар бисара, цулбала къяржарра дирар. ¹⁴ Жибарибти бахъал саби, амма чеббикІибти камти саби“.

«Пачас – пачала, Аллагълис – Аллагъла»

¹⁵ ИлхІели фарисейти, бякъи, вягІдалакабиуб Ил гъайлизив уцес багъандан. ¹⁶ Илдани Иличи чула мутагІялимтира, Ирод гІевурцантира бархъиб. Илди бакІили, бикІар: «МугІяллим! Нушани балулра бархъдеш бирахъес ва чисалра гІяхІулахІейрули, лебтазилра дакІу-гъаргли Аллагъла бархъси гъуникад башахъес ХІу гІевугъни, ¹⁷ бурагу, ХІед секъяйда билзулив, Римла пачас хІекъ бедлугес нушачиб чебсив, яра ахІену?» ¹⁸ Илдала суалла вайси мягІналичичи шакикили, ГІисани илдази иб: «Сен Дила хІялумцІулрая, кІибяхІянти? ¹⁹ Чебаахъая Набзи хІекълис бедлугуси арц». Илдани илис динарий хиб. ²⁰ Илдази Ил викІар: «Чила сарив иличирти суратра, белкІра?» ²¹ Илизи бикІар: «Пачала». ИлхІели викІар илдази: «ХІебиалли, пачас пачала бедая, Аллагълис – Аллагъла». ²² Ил бакъили, илди тамашабиуб ва, Ил ватурли, арбякъун.

Мицирбирниличила

²³ Ил бархІи Иличи саддукейти гъамбиуб, сабира бекКибти гІур мицирбирниличичи бирххІерути ва Илизи хъарбаиб: ²⁴ «МугІяллим, Мусани иб: „ДурхІни ахІекІубли, чи-биалра вебКалли, илала хъунул цархІил узини сунес кариаб ва узис дурхІни абикъаб“. ²⁵ ХІера, лебри нушала верхІел узи: цаибил, хъунулра кариили, сунезивад дурхІя ахІекІубли вебКиб. ²⁶ Илкъяйда кІиэсиллира, хІябэсиллира, хІятта верхІэсиллира кариили сари. ²⁷ Илди верхІелра узи бекКили гІергъи ил хъунулра ребКиб. ²⁸ Илди мицирбиубхІели, ил чидил узила хъунулли риэсара? Ил верхІелра узичир хъунулли калунси риалли?!» ²⁹ ГІисани илдас жаваблис иб: «Дурхъати жузира, Аллагъла цІакъра хІебалули, чердулКулрая. ³⁰ МицирбиубхІели я хъайчикабирути ахІен, я шери башути ахІен, илди Аллагъла малаикунигъунтили бирар. ³¹ БекКибти

мицирбирниличила Аллагъли хІушаб дурибтазирад хІебелчІунраяв: „Ну Ибрагъимлара, ГІисакълара, Якъублара Аллагъ сайра“. ³² Амма Аллагъ – ил алхунтас ахІенну Аллагъли сайси, мициртас сай». ³³ Халкъли илди дикъули, Илала белчІуди-динничичи дебали тамашабирутири.

Халасигъуна вягІза

³⁴ Илини саддукейти лехІкахъахъниличила бакъили, фарисейти цалабикиб. ³⁵ Илдазивад цали сайси Низамла гІялимли, Илала хІялумцІули, хъарбаиб: ³⁶ «МугІяллим! Низамлизиб бегІлара халаси амру чидил саби?»

³⁷ ГІисани илизи иб: «ХІела Аричи Аллагъ лебилра уркІила цІакъличил, жайчил ва дагъриличил дигахъен: ³⁸ ил саби цаибил ва бегІлара халал амру. ³⁹ КІибиблра иличи мешуси саби: „ХІед хІу къяйдали, хІела гъамсира дигахъен“. ⁴⁰ Илди кІелра амру Низамла ва идбагунала хъулчичи сари».

Фарисейтази ГІисала суалти

⁴¹ Фарисейти цалабикибхІели ГІисани илдази хъарбаиб: ⁴² «ХІушаб МасихІ чи сай или гъанбиркулив? Ил чила урши сая?» Илизи бикІар: «Даудла урши сай». ⁴³ Илдази иб: «Сен гъатИи Дауд Илис Аричи викІулив, ишкъяйда бурухІели: ⁴⁴ „Аллагъли дила Аричизи иб: ‘Дила балуй шайчи кайъи, ХІела душманти ХІела къяшмала удиб багъарбиахъайчи’“. ⁴⁵ Дауд Илис Аричи викІули виалли, секъяйда вирара Ил илис уршили виэс?» ⁴⁶ Чилилра жаваблис Илизи гъайэс хІебиуб, ил бархІила гІергъи чилилра хъарбаэсра хІебиуб.

Фарисейтачила ГІисала насихІятуни

23 ИлхІели ГІиса халкълизи ва Сунела мутагІялимтази гъайикІесиили, ² иб: «Мусала мер Низамла гІялимтанира, фарисейтанира буцили саби. ³ Илдани дирахъес хъардирути диреная, амма чули дирутиван мадиридая, сенкІун илдани дурули сари, амма дирули ахІен. ⁴ Адамтала хъуцІрумачи декІти ва дихесагартти мухри чедирхъули сари, амма кумек акІахъес тІулалра вяшбарес дигули ахІен. ⁵ Лерилра чула баркъудлуми адамтази чедаахъес дирули сари: андаличирти ва някъбачирти белкІаначилти хІябнира, палтарла сурмира дягІудирахъули сари. ⁶ СяхІбатуначир ва киласабазир цаибти мерани дигахъу ⁷ ва халкъла цахІнабикуначиб чузи саламбикІули дигахъу, илхІелира адамти чузи бикІули: „МугІяллим! МугІяллим!“ ⁸ ХІуша биалли, хІушаб мугІяллимти сарра или мадикІудая, сенкІун хІушала МугІяллим ца сай – МасихІ, хІуша лерилра узби сарра; ⁹ ванзаличир чисалра дудеш илира мадикІудая, сенкІун хІушала Дудеш ца сай, сайра зубрачивси. ¹⁰ НасихІятчи илира чисалра

мадикІудая, сенкІун хІушала насихІятчира ца сай – МасихІ. ¹¹ ХІушазивад халал хІушаб къаравашли виаб: ¹² сунени сай чевяхІирусИ, увяхІварили вирар, сунени сай увяхІирусИ – чевяхІирар.

¹³ Балагъ-къадар хІушаб, кІибяхІянТИ Низамла гІялимТИ ва фарисейТИ! Зубрала ПачяхІдеш гІекІили, я хІуша духІна ахІедицІули, я абацІес дигути абацІахъес хІебалтантас. ¹⁴ Балагъ-къадар хІушаб, кІибяхІянТИ Низамла гІялимТИ ва фарисейТИ! Гамъабала мас букни багъандан ва кІибяхІяндешличил дахъхІи дулгни багъандан, ил шайчиб танбихІ имцІали кайсидая.

ВерхІкаси «балагъ хІушаб»

¹⁵ Балагъ-къадар хІушаб, кІибяхІянТИ Низамла гІялимТИ ва фарисейТИ! ХІушани ца адамалра динничИ шурухъахъес урхънира, дегъра къунздирулра, амма ил бетаурхІели, хІушачивра вайси жагъаннабла уршили ветарахъулрая. ¹⁶ Балагъ-къадар хІушаб, сукъурТИ хала тјамадаби: „Аллагъла хъайчи чили хъя баралра, селра ахІен, амма Аллагъла хъя мургъиличи баралли, гІяйибла вегІ сай“ или, дикІулра. ¹⁷ АбдулТИ ва сукъурТИ! Се халалив: мургъив, яра илди мургъи дурхъадирусИ Аллагъла хъалив? ¹⁸ ГІурра: „Къурбанханаличи чили хъя баралра селра ахІен, амма илизИбси савгъатличи хъя барИбси гІяйибла вегІ сай“ дикІулра. ¹⁹ АбдулТИ ва сукъурТИ! Се халалив: савгъату, яра ил савгъат дурхъабирахъусИ къурбанханав? ²⁰ Илбагъандан къурбанханаличи хъя бирусинИ, иларТИ лерилра секІайчира хъя бирули сай. ²¹ Илкъяйда Аллагъла хъайчи хъя бирусинИ илизив ХІерирусИличира хъя бирули сай. ²² ЗубрачИ хъя бирусинИра, Аллагъла ТахличИра, иличи КайИбсилИчира хъя бирули сай. ²³ Балагъ-къадар хІушаб, кІибяхІянТИ Низамла гІялимТИ ва фарисейТИ! ШумерИлара, хъалталара, гъар журала духълумалара вецІал бутІала ца бутІа закатлис лугули, НизамлизирТИ бегІлара мягІничерТИ: судра, ряхІмура, дирхИнира датнилис. ХІушани ца бирухІели, итилра хъумхІертес чебсири. ²⁴ СукъурТИ тјамадаби, жибин къяраэс мяхІкамдикІути, амма валри къяриути! ²⁵ Балагъ-къадар хІушаб, кІибяхІянТИ Низамла гІялимТИ ва фарисейТИ! ХІушани къямла чедила ицулра, бухІнала биалли хъям-къацІлира, къалплира бицІили саби. ²⁶ Сукъур фарисей! ГъаланачИ къямла бухІнала умубара, чедилара умули баахъес. ²⁷ Балагъ-къадар хІушаб, кІибяхІянТИ Низамла гІялимТИ ва фарисейТИ! ХІуша мешудиркулра хІябла дерхъурТИ тІакъначИ, чедила куц хІясибли илди жагадизести сари, амма духІнала бибкІибталала лигубани ва нясдешунани дицІили сари. ²⁸ Илкъяйда хІушара чедирадди адамтас хІялалТИли кадилзулрая, амма духІнарадди кІибяхІяндешли ва

ламусагардешли дицІилрая. ²⁹ Балагъ-къадар хІушаб, кІибяхІянТИ Низамла гІялимТИ ва фарисейТИ! ХІушани идбагунас хІябри дирулрая ва гІябидунала цІелдубИ жагадирулрая, ³⁰ ва дикІулрая: „Эгер нушала дудешунала замана нуша диубТИ диахІелри, идбагунала хІи картІинилизир нуша илдала дархкъябили детхІерехІери“.

³¹ Илкъяйда хІушани хІушачИ къаршили бикъридеш дирулрая ва хІуша идбагуни кабушибталала дурхІни диъни марбирулрая.

³² ХІушала дудешунала умцІла чебирцІахъИдая.

³³ ЧІичІлумазирад кадикибТИ чІичІлумИ! Илала гІергъИ секъяйда хІуша уцутирая жагъаннабла танбихІлизирад?

Идбагуни хІебалтНИличила

³⁴ Аллагъли бурили саби: „Илбагъандан Нуни хІушачИ идбагунира, пасихІтира, гІялимТИра бурхъулра. ХІушани цабехІ кабуршидая ва хІябтІерхъаличи бетирхъИдая, цархІилТИ кИласабазиб итидая ва шагъуртазибад шагъуртази дугІиИдая. ³⁵ Илбагъандан иш дунъя акІубхІейчирадди, Гъабилла хІиличирад дехІдихъили, Аллагъла хъалила дурхъасИ мерлара къурбанханалара ургав кавшибси Варахинна урши Закарияличи бикайчи, кертІибТИ лебилра идбагунала хІила жавабкардешра хІушачИр дирар“.

³⁶ Нуни хІушази хІекъли бурулра: илди лерилра иш гъаннала къамличи чевкъар.

ЯрусалимЛИчи гІяйИбТИ

³⁷ Ярусалим, Ярусалим, идбагунира кабуршусИ, хІечи бархъибТИра къаркъуба итули кабуркІусИ! ГІяргІянира сунела жибхІни дуклумау дурчуливан, хІела дурхІни бучес Нуни чуйнара къасбарИли хъалли, хІу къабулхІебекири! ³⁸ ХІера, гъанна хІушала юрт бацІикабухъИ саби! ³⁹ Нуни хІушази бурулра: „Аричи багъандан ЛявкъусИ Аллагъли мубаракварИбси сай!“ или, дикІусИ замана сабаайчи, хІушани Ну чехІейура!»

Аллагъла хъали гъятІбирНИличила, дявТИ дирНИличила ва гІелабадкабиркНИличила ГІисани гъалахИли бурули сай

24 ДуравхъИ, Аллагъла хъуливад аркъухІели, Иличи мутагІялимТИ гъамбиуб Аллагъла хъа юрт Илизи чебаахъес или. ² ГІисани биалли, илдази иб: «Илди лерилра чедиулрав? ХІекъли бурулра хІушази: ишаб къаркъаличиб къаркъа кахІевлан, лерилра гъятІаили дирар».

³ Ил Елеон дубурличИв кайИбхІели, Иличи сабицун мутагІялимТИ музабухъун ва хъарбаиб: «Бура нушази мурт ил бетарара? Сегъуна лишан бирара ХІу лявкънила ва ахират гъамбирнила?»

⁴ ГІисани илдас жаваблис иб: «Сахъли диИраЯ хІуша

чизи-биалра диргІяхІедиргахъес. ⁵ Бахъал ляхкъян Дила уличил ва бикІар: „Ну МасихІ сайра“. Илдани бахъал чеббулІахъа. ⁶ Дургъбачила бикъидая, дургъбачила хабурти дирар. ИлхІели хІуша кахмадирудая, сенкІун илди детаэс ГІягІнити сари, амма ил гъачамлис ахир ахІен. ⁷ Халкъ халкъличи пунтбирар, ца пачяхІдеш – итилличи; мер-мерличир гашира дирар, мерсра далкъан. ⁸ Илди лерилра – виштІаси виркъуси хъунул адамла ГІязабтачи мешули сари. ⁹ ИлхІели хІуша ГІязабтази диркахъурая, ва кадуршурая, Дила у багъандан лебилра халкъанани хІуша хІейгидирура. ¹⁰ Илбагъандан бахъал чеббулІан ва цали ца убедлуга, ва цаличи цали гъимидулхъахъа. ¹¹ Бахъал къалпти идбагуни дакІубухъи, бахъал чеббулІахъа. ¹² Ламусагардеш имціабикІни багъандан, бахъла диги камдирар. ¹³ Лерилра чекасес виубси верцили вирар. ¹⁴ Низам-зегъала дунъяла иш Инжил лебилра ГІяламлис, лебилра халкъанас бикъридешлис багъахъурли бирар. ИлхІели ахирра ляхкъян. ¹⁵ ХІера, Даниял идбагличибад багъахъурси бетаурли, дурхъаси мерличиб жяргабиънила нажасдеш чебаибхІели, белчІес вирусини багъаб, ¹⁶ илхІели Иудеялизибти дубуртази бебшаб; ¹⁷ хъалчличивсира, се-биалра касес или, хъули камаціаб; ¹⁸ авлахъличивсира, палтар касес или, хъули чармайаб. ¹⁹ Балагъ саби илди бурхІназиб дурхІялис баибтас ва михъиртачиб дурхІни бухъахъута! ²⁰ Дулгеная янилизиб яра сут бархІи ил хІебиахъес. ²¹ ИлхІели дунъя биубхІейчибад хІебиубси ва ГІур хІебиурси бахъ халаси балагъ бирар. ²² Илди бурхІни къантІхІедарибти диалри, цалра миціирси жан берцес хІебириб, амма чеббикІибти багъандан илди бурхІни къантІдарили дирар.

Инсаниятла Урши ляхкъни: ил бархІиличила чилилра балуси ахІен; «мадусадая»

²³ ИлхІели хІушази буралли: „Иш ишав МасихІ“, яра „Ит итав“ – дирхмарудая. ²⁴ СенкІун къалпти масихІуни ва идбагуни дакІубулхъан. Илдани, хІушара, имканбакІалли чеббикІибтира чердалІахъес или, халати ГІяламатуни ва мугІжизатуни чедиахъу. ²⁵ ХІера, Нуни хІушази гъахлахили дурира. ²⁶ Эгер хІушази буралли: „ХІера, Ит чІянкІ авлахъличив“ или, дурамадулхъадая; эгер буралли: „ХІера, Ит духІнарти хъулразив“ или, дирхмарудая. ²⁷ Машрикълизиб багъарбиубси лямці магъриблизиб чебиули къяйда, Инсаниятла Уршила вакІнира илгъунали бирар. ²⁸ Жаназа лебси мерличи чІакни цаладиркур. ²⁹ Илди бурхІнала балагъ-къадарлис ГІергъи хапли берхІи билшан, бацлира сунела шала хІелуга, зубартира зубрачирад кадиркур, зубрира гардардулхъан. ³⁰ ИлхІели заклизиб Инсаниятла Уршила ГІяламат

дакІубирар; дунъяла лебилра халкъани бисибирар ва зубрала гъагултачи айили ляхкъуси, чебахІси ціакъличилси ва чевяхІдешличилси Инсаниятла Урши чейу. ³¹ Дунъя бучІахъуси дядличил Сунела малаикунни бурхъу ва, закла ца дубличибад итил дубличи бикайчи, Сунела чеббикІибти бурчу. ³² Инжирла галгализибад ГІякълу касая: илала къялуби кІантІидиубли, кІинчІбазирад кІари дуралкъес дехІдихъибхІели, дуцірум гъамли диъни баладая. ³³ Илкъяйда хІушани илди лерилра секІал чедаибхІели, унзаличи гъамли ахир бакІили биъни багъирая. ³⁴ ХІекъли бурулра хІушази, иш къам бетхІехъили лебалли илди лерилра детарар. ³⁵ Закра ванзара детихъур, амма Дила дугъби детхІейхъур. ³⁶ Ил бархІиличила ва сгІятличила чилилра балуси ахІен, я малаикунани, я Уршили, чІянкІили Дила Дудешли ахІенси. ³⁷ Инсаниятла Урши ляхкъути бурхІназиб НухІ идбагла замана биубси къяйда бетарар. ³⁸ Шин чедидерхес гъалабра букутири, бужутири, хъайчикабирутири ва шеро башутири – НухІ идбаг гамиличи аціайчи, ³⁹ ва илдани балуси ахІенри тІурпан бакІили, лебилра гъаркъабарайчи. Илгъуна бирар Инсаниятла Урши вакІнира. ⁴⁰ ИлхІели кІел бирар авлахъличиб: ца арку, цархІил валта. ⁴¹ КІел бирар шинкъайзиб лукъути: ца арку, цархІил ралта; ⁴² Илбагъандан дусмадусадая, сенахІенну се замана хІушала Арочи ляхкъянал балхІебаладая. ⁴³ ХІушаб ГІячихъси саби, эгер хъа вегІли балуси биалри се замана хъулки ляхкъянал, усхІевси, ва хъа удибад уббуркъахъес хІебалти. ⁴⁴ Илбагъандан хІушара хІядурли диарая, сенкІун чидил сгІятлизиб Инсаниятла Урши ляхкъусил хІебаладая. ⁴⁵ Сунела лебилра къаравашуначи хІеруди бирахъес ва заманаличиб илди берк-бержличил ГІеббурцахъес юртла вегІли катурси халал буюрчи сегъуна вирара? ⁴⁶ ЧариубхІели хужаимли хІянчилизиахъили варгибси къаравашра талихІчевси сай. ⁴⁷ ХІушази бархъли бурулра: хужаимли илгъуна къаравашличи сунела лебил давла-хазналичи хІерудибарахъесра хъарбиру. ⁴⁸ Эгер ил къараваш сунези сай: „Дила хужаим жявли-декІар чархІейрар“ викІули, ⁴⁹ цархІилти къаравашуни итес вехІихъалли, ва, держлукъуначил укра укули, ужра ужалли, ⁵⁰ гъаналра агарси замана ил къаравашла хужаим ляхкъян, ⁵¹ ил иту ва кІибхІянтван танбихІлаиру. Илар биалли бисара, цулбала къяржарра дирар».

Веціал рурсиличила бурала

25 «ИлхІели Зубрала ПачяхІдеш мешули бирар, чиргъмира касили, гелешмешлис гъунибаэс дурабухъунти веціал рурсиличи. ² Илдазибад шел кабизалачебтири, шел биалли ахІенри. ³ Кабизалачебтани чиргъми касили, илдази

картIуси гIявадеш кахIесиб. ⁴ Кабизалачебтани чула чиргъмачил бархли тIалхIянабазиб гIявадешра касиб. ⁵ Гелешмеш къаниубхIели, илди лебилра бускаун. ⁶ Бай дуги тIама-гъама ахъдиуб: „ХIера, гелешмеш лявкъули, илис гъала дурадухъеная“. ⁷ ИлхIели лебилра рурсби ахъбиуб ва чула чиргъми далаиб. ⁸ ЧебетхIебаибтани кабизалачебтази иб: „Нушала чиргъми дилшули сарину, хIушала гIявадеш нушаб бихая“. ⁹ Кабизалачебтани илдази жаваб бедиб: „ХIушалаван нушалара камхIебиахъес багъандан, гIявадеш бирцутачи дякъи, асая“. ¹⁰ Илди асес арбякъунхIели, гелешмеш вакIиб ва хIядурти иличил барх мекъла сяхIбатличи абацIиб, илхIели къапура гIекIиб. ¹¹ Илала гIергъи, цархIилти рурсбира бакIили, бикIар: „Хужаим, хужаим! Нушаб унза абхъа“. ¹² Илини биалли, илдас жаваблис иб: „ХIушази бархъли бурулра: хIуша чихъалирал далути ахIенра“. ¹³ Илбагъандан дусмадусадая, сенахIенну Инсаниятла Урши лявкъуси я бархIи, я сягIят балути ахIенра.

Ашрапуначила

¹⁴ Илини дурала улкализиди аркъуси адамливан биру. Ил адамли, сунела лугъри жибарили, лебдеш хъарбариб: ¹⁵ цализи илини шел ашрапи дедиб, итиллизиди – кIел, цархIиллизиди – ца, гъариллис ахъри хIясибли дутIили, аръякъун. ¹⁶ Шел ашрапи касибси аръякъи, илди дузахъули, шел гъатIи ашрапи дикахъиб. ¹⁷ Тяп илкъяйда кIел ашрапи касибсинира кIел гъатIи дикахъиб. ¹⁸ Ца ашрапи касибсини, бухили ванзализиди укабатурли, дигIянбариб. ¹⁹ ГIяхIцад заманала гIергъи илди лугърала хужаим чарухъун ва лугъразибад лебдеш тIалаббариб. ²⁰ Шел ашрапиличилси иличи гъамиубли иб: „Хужаим! ХIуни набзи шел ашрапи гири, илдазирад ихди шел гъатIи нуни дикахъира“. ²¹ Хужаимли илизи иб: „ГIяхIна, гIяхIси ва марси лагъ! БиштIасилизив хIу наб марли кални багъандан, халасиличи калтари; хIела хужаимла шаддеш хIунира бутIа“. ²² КIел ашрапи касибсира гъамиуб ва иб: „Хужаим! ХIуни набзи кIел ашрапи гири, илдазирад ихди кIел гъатIи нуни дикахъира“. ²³ Хужаимли илизи иб: „ГIяхIна, гIяхIси ва марси лагъ! БиштIасилизив хIу наб марли кални багъандан, халасиличи калтари; хIела хужаимла шаддеш хIунира бутIа“. ²⁴ Ца ашрапи касибсира гъамиуб ва иб: „Хужаим! хIу хIебегIунси иршуси ва бурчуси къяркъси адам виъни нуни валусири. ²⁵ Илбагъандан урухиубли, хIела ашрапи ванзализиди дигIянбарира. ХIед хIела чарбирулра“. ²⁶ Хужаимли биалли, илис жаваблис иб: „Вайси ва азгъин лагъ! ХIуни балулри нуни хIебегIунси иршни ва бурчни. ²⁷ ХIебиалли нуни хIези гибси ашрапи вачрукъянабази бедили, бузахъес гIягIнисири,

нуни чарухъунхIели ил хайриличил кайсира“. ²⁸ Илизибси ашрапи кебасили, вецIал лерсилизи бедая. ²⁹ Лебсилис бедили бирар ва имцIабирар, агарсила лебсира кебасили бирар. ³⁰ ХIяжар лагъ дурала цIябдешлизи лайвакIая: илар бисара, цулбала къяржарра дирар“.

Халкъанала чебкадси суд; «Наб бариб»

³¹ Сунела чебяхIдешлизив ва лебилра малаикуначил Инсаниятла Урши вакIибхIели, Сунела чевяхIдешла тахличи кайрар. ³² Илала гъала лебилра халкъ цалабиркур. Илини букIунни къяцназирад маза декIардирули къяйда, цабехIти цархIилтазибад декIарбиру: ³³ маза балуй шайчи тIашдалта, къяцни биалли – алгъай шайчи. ³⁴ ИлхIели Пачани балуй шайчибтази буру: „Дукъеная, Дила Дудешли баркатладарибти, дунъяла бехIбихъудличибадал хIушаб хIядурбарибси ПачяхIдешла букъуртили детаирая, ³⁵ сенкIун Ну гушлири – хIушани Наб беркесил гира, Ну милиглири – хIушани Ну шинни вахунра, Ну дуравадси сайри – хIушани къабулварира, ³⁶ чIянкIулири – хIушани Ну вегIварира, зягIиплири – хIуша Набчи музадухъунра, туснакълаври – хIуша Набчи дакIира“. ³⁷ ИлхIели гIябидунани жаваблис Илизи иру: „Аричи! Мурт нушани ХIу гушли чеили, къацIли вахунсирив? Яра милигхIели, шинни вахунсирив? ³⁸ Мурт нушани ХIу дугIли чеили, къабулварибсирив? Яра чIянкIухIели вегIварибсирив? ³⁹ Мурт нушани ХIу зягIипли яра туснакълав чеили, ХIечи дакIибтирив?“ ⁴⁰ Пачани жаваблис иру: „ХIекъли бурулра хIушази: Дила бегIлара биштIатигъунти узбазивад цалис илгъуна барибси, Наб барибсира саби“. ⁴¹ ИлхIели алгъай шайчибтазира буру: „Дашеная Набчирадли, нажасуни, илбислис ва илала малаикунас хIядурбарибси даимси цIализи, ⁴² сенкIун Ну гушлири – хIушани Наб беркесил хIегира; Ну милиглири – хIушани Ну шинни хIехунра; ⁴³ Ну дуравадси сайри – хIушани къабулхIерира; чIянкIулири – хIушани Ну вегIхIерира; зягIиплири ва туснакълаври – хIуша Набчи хIедакIира“. ⁴⁴ ИхIели илдани жаваблис Илизи иру: „Аричи! Мурт нушани ХIу гушли, милигли, дугIли, чIянкIули, зягIипли яра туснакълав чеили, ХIед къуллукъхIебарибсив?“ ⁴⁵ ИлхIели илдази жаваблис иру: „ХIекъли бурулра хIушази, Дила бегIлара биштIатигъунти узбазивад цалис илгъуна хIебарибси, Набра хIебарибси саби“. ⁴⁶ Илкъяйда аркъян илди даимти гIязабтази, гIябидуни биалли – даимти гIямрулизи».

Сай убкІниличила ГІисани гъалахили бурни;
кашишунни ва тьамадаби ГІисачи кършили
бархбершни

26 ГІисани илди лерилра гъай
тамандарибХІели, Сунела мутагІялимтази
буриб: ² «ХІушани балулра кІел барХІила гІергъи
Пасхала байрам биъни ва Инсаниятла Урши
хІябтІерхъаличи ветирхъни».

³ ИлХІели Кайаф бикІуси хала кашишла
азбарлизиб хала кашишуннира, Низамла
гІялимтира, халкъла тьамадабира цалабикили,
⁴ гІямултачил уцили, ГІиса кавшес пикрибариб.
⁵ Амма байрамла ахІенси замана – халкъ
пунтХІебиахъес багъандан.

Вифаниялизив ГІиса вакни

⁶ ГІиса Вифаниялизив къявгала изайзирад
сагъиубси Симонничив сайХІели, ⁷ гачІла
тІалХІянализиб дурхъаси ГІявадешличилси хъунул
адам гъамриубли, Илала бекІ бакиб. ⁸ Ил чебаили,
Илала мутагІялимти ГІясибиубли, бикІутири: «Се
дирутив илди харжани? ⁹ Ил ГІявадеш дурхъали
бицили, арц мискинтас дедес вири». ¹⁰ Ил багъурси
ГІисани илдази иб: «Сен хъунул адам
урузрирахъулрав? Илини Наб гІяхІдеш бариб.
¹¹ Мискинти мурталра хІушачил саби, Ну биалли,
мурталра хІейрус. ¹² Дила чарх ГІявадешли бакили,
Ну илини хІяриихъахъес хІядурварира. ¹³ ХІекъли
викІулра хІушази: чинаб Инжил багъахъалра,
лебилра дунъяличиб ишини барибсира
багъахъурли бирар».

Ягъудани ГІиса уведни

¹⁴ ИлХІели вецІнукІирализивад ца, сунесра
Кариотлан Ягъуда бикІуси, хала кашишунни
вякъун ¹⁵ ва иб: «ХІушани наб се лугадая, нуни Ил
уведасли?» Илдани илис хІябцІали гІяббаси
гъаладихъиб. ¹⁶ Илала гІергъи ГІиса уведес или, ил
гІяхІси замана бикахъес хІерликайиб.

Пасхаличи хІядурбиъни

¹⁷ Анзути бехІцІурала цаибил барХІи мутагІялимти
ГІисачи гъамбиуб ва Илизи иб: «ХІед Пасхала
беркала чинаб барахъес хъарбирулрив?» ¹⁸ Илини
иб: «Шагъарлизи пулан адамличи дукъеная ва
илизи бурая: „МугІяллим викІули сай: ‘Дила замана
гъамбиубли саби, Дила мутагІялимтачил хІечиб
Пасха дурабуркІисра’“». ¹⁹ МутагІялимтани ГІиса
викІуси къяйда бариб ва байрамла беркала
хІядурбариб.

ГІисала дугадука; къацІ ва къям

²⁰ БарХІехъ Ил вецІнукІиралра мутагІялимличил
илав хъарихъун. ²¹ Илди букес бехІбихъибХІели, иб:
«ХІекъли викІулра хІушази: хІушазивад цали Ну
уведлугара». ²² Илди хІекъли пашманбиуб, ва
илдазивад гъарил Илизи викІескайиб: «Ну
ахІенрагу, Аричи?» ²³ Илини жаваблис иб: «Набчил
барх къумурла някъ бухибсини Ну уведлугара.
²⁴ Инсаниятла Урши къалли, Сунес белкІунсиван,
аркъули сай, амма балагъ Инсаниятла Урши
сунечивли уведлугуси адамлис, илис бекІлил
аХІекІубли гІяхІил бириб». ²⁵ ИлХІели Ил уведлугуси
Ягъуданира иб: «Ну къалли ахІенра, Рабби?»
ГІисани илизи иб: «ХІуни бурири».

²⁶ Илди букухІели, ГІисани къацІ касиб ва,
баркатлабарили, кабердили ва, мутагІялимтас
буртІули, иб: «Касая, беркеная – ил саби Дила
Къаркъала». ²⁷ Илкъяйда къямра касили,
баркатлабарили, илдази бедиб ва иб: «Илизирад
лерилра дуженая, ²⁸ сенкІун илди, бунагъуни
хасардатахъес багъандан бахъал гъанни картІути,
Сагаси ВягІзала Дила хІи сари. ²⁹ ВикІулрагу
хІушази: гъаннала гІергъи гІур хІушачил тІутІила
бухъайзирадти хІедужисра, Дила Дудешла
ПачяХІдешлизир сагати чягъир хІушачил
держайчи».

³⁰ Дезара белчІи, Елеон дубурличи арбякъун.

Петр бирхаудилизивад улхъни гъалахили бурни

³¹ ИлХІели ГІиса илдази викІар: «Ил дугилизир
лерилра хІушани Набчи дирхни детихъахъидая.
БелкІи саби: „БукІун каршисра ва дурзамла маза
тІутІукадирар“; ³² Ну мицІиркайубХІели, хІушаб
гъалав Галилеялизи аркъясра». ³³ Петрли Илис
жаваблис иб: «Лебтанилра бирхни бетахъахъалра,
нуни бетХІейхъахъис». ³⁴ ГІисани илизи иб:
«ХІекъли викІулра хІези: ил дуги, дагъа
бучІесбиайчи, хІуни Ну хІяйна уввалтара». ³⁵ Петр
илизи викІар: «ХІечил вархли вебкІес
чебуркъаллира, ну хІечивад ГІелумхІейрус».
Илкъяйда бикІи лебилра мутагІялимти.

Гефсиманиялизиб

³⁶ ГІур ГІиса илдачил Гефсимания бикІуси
мерличи вакІиб ва мутагІялимтази викІар: «Ишар
кадили каленая, Ну вякъи балга бирис».
³⁷ Сунечил варх Петрра, Заведейла кІелра уршира
касили, ил децІикІескайиб. ³⁸ ИлХІели илдази ГІиса
викІар: «Дила РухІ дебкІесливан децІдикІули сари,
ишар Набчил хІедусули каленая». ³⁹ Цакамси
ГІелумиубли, улгесвяХІиб: «Дила Дудеш! Имкан
биалли, ил гІузрула къям Набчибад гъарахъли
калаб, амма Наб дигусиван ахІи, ХІед дигусиван

биаб». ⁴⁰ МутагІялимтачи чарухъунхІели, илди бусули баргили, Петрлизи викІар: «Илкъяйда ца сяГІяталра хІуша Набчил хІедусули дуэс хІедиубраяв? ⁴¹ Мадусудая ва дулгеная, черхІедалкІес багъандан: рухІ жигарти сари, къаркъала биалли гъунарагар». ⁴² ГІурра ГІелумиубли, улгиб, викІули: «Дила Дудеш! Ил ГІузрула къям Набчибад чебхІебиркалли, ва чекасес чебуркъалли, ХІела ари биаб!» ⁴³ ГІур вакибхІелира илди ГІурра бусули баргиб, сенкІун илдала хІулби декІадиублири.

⁴⁴ Илди батурли, ГІурра ГІелумиуб ва хІяйнайсра илгъуна балга бариб. ⁴⁵ ИлхІели, вакили Сунела мутагІялимтачи, илдази викІар: «ХІуша гъаннара дусулраяв ва бамсриихъулраяв? ХІера, Инсаниятла Урши бунагъкартала някъбази ведлугуси сяГІят гъамбиубли саби. ⁴⁶ Айзирая, аркъехІе; ну уведлугуси гъамирули сай».

ГІиса уведили сай ва уцили сай

⁴⁷ Ил илкъяйда викІули левли, вецІнукІирализивад ца сайси, Ягъудара ва иличил барх турмачилти бахъал адаптира бакІиб. Илдала ургаб хала кашишунира, халкъла тьямадабира лебри. ⁴⁸ Уведлугусини илдази лишан буриб: «Ну Сунечи байикунси Ил сай, Ил уцай». ⁴⁹ БусяГІят ГІисачи гъамиубли, иб: «Салам, Рабби!» ва Иличи байикун. ⁵⁰ ГІисани илизи иб: «Гъалмагъ, селичи вакирив хІу?» ИлхІели бакІили, ГІисачи някъби чедихъиб ва Ил уциб. ⁵¹ ГІисачилтазивадси цали тур касили, хала кашишунала лагълис бяхъиб ва лихІи чеббикахъиб. ⁵² ИлхІели ГІисани илизи иб: «ХІела тур сунела мерличи кабихъа, сенкІун лебилра тур касибти турлизибадди бубкІар, ⁵³ яра хІед гъанбиркулив Нуни Дила Дудешлизи тиладибасли, малаикунала вецІнукІира азирла ГІяскар хІелуга или? ⁵⁴ Дурхъати жузази делкІунти секъяйда детурхара, или хІебиалли?» ⁵⁵ ИлхІяйзиб ГІисани халкълизира иб: «Къачагъ уцес къяйда турмачил ва къярдубачил дурадухъира хІуша Ну уцес. Ну биалли, гъарил бархІи хІушачил варх вирира, Аллагъла хъулир хІуша руркъули, илхІели хІушани Ну хІевцира. ⁵⁶ Иш кабикибси саби идбагунала делкІунти детерхахъес багъандан». ИлхІели, Ил ватурли, лебилра мутагІялимти бебшиб.

Чихъси судличиб

⁵⁷ ГІиса уцибтани Ил хала кашиш Кайафла азбарлизи киб. Илаб хала кашишунира, Низамла ГІялимтира, халкъла тьямадабира цалабикиб. ⁵⁸ Петр гъарахъ-гъарахъли, Илис ГІергъи вашули, хала кашишла азбарлизи ваиб ва, ухІна ацІили, къуллукъчибачил вархли кайиб, ахир чебаэс багъандан. ⁵⁹ Хала кашишунира, халкъла

тьямадабира, лебилра чебяхІси судра ГІисачи къаршители къалпти бикъридешлигІиб умцІулри, Ил кавшес багъандан, ⁶⁰ амма баргес бирули ахІенри, ГІяхІцад къалпти бикъруми башули биаллира. Ахирра кІел къалпти бикъруми бакІиб ⁶¹ ва иб: «Ил викІи Аллагъла хъали бехъес ва хІябал бархІила бухІнаб тІашбатес вирусра» или. ⁶² Хала кашиш айзурли, Илизи иб: «Сен селра хІебурулрив? Илдани хІечи къаршили бикъридеш дирули сари». ⁶³ ГІиса лехІкахъилри. Хала кашишли Илизи иб: «МицІирси Аллагъла у ахъили тиладибирулра, бура нушази, ХІу сайрив МасихІ, Аллагъла Урши?» ⁶⁴ ГІисани илизи иб: «ХІуни бурири. Амма бурулра хІушази: гъаннала ГІергъи гъагъултачив льявкъули, Къудратла ВеГІла балуй шайчи кайибси Инсаниятла Урши чейидая». ⁶⁵ ИлхІели хала кашишли сунела палтар гъярдердиб ва иб: «Ил Аллагълис вайта угъули сай! ГІур нушаб бикъруми селис хІяжатлив? Илала гъай хІушани дакъира! ⁶⁶ ХІушаб секъяйда гъанбиркулив?» Илдани жаваблис иб: «БекІаличи лайикъли сай». ⁶⁷ ИлхІели Илала дяхІличи тубикІесбиб, дяхъиб; цархІилти льяжубази бирхъулри ⁶⁸ ва бикІулри: «Бура, МасихІ, ХІед бяхъибси чи саял?»

Петрли ГІиса чеввахъни

⁶⁹ Петр дурав, азбарлизив кайилри. Иличи ца къуллукъчи гъамриуб ва иб: «Галилеялан ГІисачил хІура леври». ⁷⁰ Амма лебталалра гъалав илини ГІиса чеввахъиб, или: «ХІу се рикІулрил балули ахІенра».

⁷¹ Къапулизивад дураулхъухІели, ил цархІилли чеиб ва илабтази иб: «Илра леври Назорейлан ГІисачил». ⁷² Илини ГІурра чеввахъиб, „Илгъуна Адам хІелас“ или. ⁷³ Камси замана дикибхІели, илаб тІашти гъамбиуб ва Петрлизи иб: «Дурусли, хІура илдазивадси сайри, сенкІун хІела декІарти гъайли хІу уведлугулри». ⁷⁴ ИлхІели ил хъямаиркъескайиб, „Илгъуна Адам хІелас“ или. Хапли дагъа бучІесбиб.

⁷⁵ ИлхІели Петрлис ГІисани бурибси гъанбикиб: «Дагъа бучІесбиайчи ХІуни ну хІяйна чевирхъура». Илавадди дуравхъи, къутІкъули висииб.

Пилатла суд; Ягъудала ахир

27 Савли дикибхІели, лебилра хала кашишунала ва халкъла тьямадабала мажлис биуб, Ил кавшес багъандан. ² Илдани вигъи, Ил улкала бекІ Понтий Пилатличи арукиб.

³ ИлхІели Ил уведибси Ягъудани, Ил судлаварни чебаили, пашманиуб ва хала кашишунасра, халкъла тьямадабасра хІябцІали ГІяббаси чардариб, ⁴ ва иб: «ГІяйибагартти хІи удедили, нуни бунагъ барира». Илдани биалли, илизи иб: «Нушаб илала се авара? ХІед дигуси бара». ⁵ Аллагъла хъулир

арцра лайдакИили, ил дуравхъи арякъун ва гІяндикиб. ⁶ Хала кашишунани арц касили иб: «Ишди киласала хазнаханализи кадихъес асухІебирар, сенкІун хІила багъа саби». ⁷ ГІур вягІдалабиубли, илди арцлис тІалхІянала устала ванза асиб, дурабадти хІярибирхъес багъандан. ⁸ Илбагъандан ил ванзалис «хІила ванза» или, бикІули саби. ⁹ ИлхІели Еремия идбагличибад багъахъурси бетерхур. Илини ибсири: «Израилла дурхІнани Багъалаварибсила хІябцІали гІяббаси касиб, ¹⁰ ва, набзи Аллагъли бурибси къяйдали, тІалхІянала устала ванзалис дедиб».

¹¹ ГІиса биалли, Римли катурси улкала бекІла гъала тІашизур. Улкала бекІли Илизи хъарбаиб: «ХІу жугъутІунала Пача сайрив?» ГІисани илизи иб: «ХІу викІулри». ¹² Хала кашишунанира, халкъла тямдабанира Сай ГІяйиблаварибхІели, Илини жаваблис селра хІеиб. ¹³ ИлхІели Илизи Пилат викІар: «ХІуни хІебикъулрив сецад лебал ХІечи къаршили бикъридеш дирути?» ¹⁴ Илис жаваблис цалра дев хІебуриб, илбагъандан улкала бекІ хІекъли тамашаиуб. ¹⁵ Улкала бекІли БехІцІурала байрамлис бузахъуси гІядат лебсири, халкъла тилади хІясибли ца туснакъчи ваткайуси.

¹⁶ Илзамана туснакълизив Варавва бикІуси хабардерхурси туснакъчира леври. ¹⁷ Илкъяйда халкъ цалабикибхІели, Пилатли илдази иб: «Чи азадатурли дигулрав хІушаб: Варавва, яра МасихІ бикІуси ГІиса?» ¹⁸ Илини балулри ГІиса къясдешличивли уведибси виъни. ¹⁹ Илзамана, суд бируси мерличи ил кайибхІели, илала хъунуй пулан вархъиб ва бурахъиб: «Селра мабирид Ил Бунагъагарлис, сенахІенну муэрлизир нуни Ил багъандан дахъал чекасира». ²⁰ Амма хала кашишунани ва халкъла тямдабани халкъ бирхаахъур ва ГІиса кавшахъес багъандан, ВараввагІеббикахъиб. ²¹ ИлхІели улкала бекІли илдази хъарбаиб: «КІилизивад Нуни чи ваткаили дигулрая?» Илдани иб: «Варавва». ²² Пилат илдази викІар: «МасихІ бикІуси ГІисас нуни се бируси?» Лебилра бикІар: «ХІябтІерхъаличи чеветяхъя». ²³ Улкала бекІли иб: «Сегъуна вайдеш барилив гъатІи Илини?» Амма илди гъатІира ахъли вявбикІулри: «ХІябтІерхъаличи чеветяхъя».

²⁴ Селилра кумекхІебирни ва халкъла гъузгъалдидеш имцІадикІни чебаили, Пилатли, шин касили, халкъла гъалар някъби дирцили, иб: «Иш Бунагъагарла хІилизив ну ГІяйибла вегІ ахІенра. ХІердикІеная хІуша». ²⁵ Жаваблис лебилра халкъли иб: «Илала хІи нушачир ва нушала дурхІначир дирар». ²⁶ ИлхІели илдас Варавва ваткаиб, ГІиса биалли, вители, хІябтІерхъаличи чеветяхъяхъес ведиб.

ХІи хІунтІена гІяба ва занзбала таж; хІябтІерхъаличи чеветяхъни

²⁷ Улкала бекІла бургъантани, ГІиса касили, Ил алав лебилра хІуреба бучиб, ²⁸ ва, чІянкІуварили, Иличи хІунтІена бухъяна халатра чегъур. ²⁹ Занзбала таж барили, бекІличи чебиб ва балуй някълизи гІяйсара бедиб. Илала гъала къукъубачи кабизурли дукалкІулри: «Разиии, жугъутІунала Пача!», – бикІули. ³⁰ Иличи тубикІулри ва, гІяйса кебасили, Илала бекІлизи бирхъулри. ³¹ Иличибад чебдукарбяхІибхІели, халат убкасили, Сунела палтар чегъур ва хІябтІерхъаличи чеветяхъес арукиб. ³² ДурабулхъухІели, илдас Симон бикІуси киринейлан къаршиикиб. ГІиса чеветирхъуси хІябтІерхъала къанч илизи бихахъес бедиб. ³³ Голгофа бикІуси мерличи баибхІели, ³⁴ Илизи держажъес гъими гъудурбарибти чягъир дедиб, амма Илини халдарили, держес хуулхІевхъун. ³⁵ Чеветяхъибтани биалли, чІалабушили, Илала палтар дуртІулри, ³⁶ ва, кабиили, Илис къараулбирулри. ³⁷ Илала бекІла чеди, гІяйиб иргъахъуси белкІра баршиб: «Иш ГІиса сай – жугъутІунала пача».

ГІисачибад чебдукарбирхІни

³⁸ Иличил бархли, ца балуй ва итил алгъай шайчи кІел къачагъра чебетяхъиб. ³⁹ ШалгІеббулхъути, бурга гъакІбикІули, хІулбуцІуна бугъулри ⁴⁰ ва бикІулри: «Аллагъла хъали гъятІаили, хІябал бархІили тІашбалтуси! ХІуни ХІу верцахъи! Эгер ХІу Аллагъла Урши виадли, къанчличивад кацІи». ⁴¹ ИлтяхІярли хала кашишунанира, Низамла гІялимтира, халкъла тямдабанира Иличибад дукарбирхІули, бикІулри: ⁴² «Сунени цархІилти уцахъули вири, гъанна Сунени Сай верцахъес вирули ахІен, эгер Сай Израилла Пача виалли, къанчличивад кацІаб, илхІели нушара Иличи дирхарехІе. ⁴³ Аллагъличи игъдибарбихъилри, гъанна Илис гІягІинили виалли верцахъаб. СенкІун Илини иб: „Ну Аллагъла Уршира“». ⁴⁴ Илкъяйда Иличил бархли чебетяхъибти къачагъунира Илис биргулри.

«Сен ХІуни Ну ватурра?»

⁴⁵ СягІят вецІнукІираличибад хІябличичи бикайчи лебилра ванзаличи цІябдеш чебихъун, ⁴⁶ сягІят урчІемал диркухІели, ГІиса ахъли вявикІесвяхІиб: «Эли, эли, лема савахтани? Дила Аллагъ, Дила Аллагъ! Сен ХІуни Ну ватурра?» ⁴⁷ Илди дакъили, илаб тІаштазибад цабехІти бикІулри: «Илияслизи жиикІули сай Ил». ⁴⁸ ИлхІели илдазивад цали, шинижан чягъирлизи кагили, тІерхъаличи баршили, Илизи бержахъес бедиб. ⁴⁹ ЦархІилти бикІулри: «ТІашдизирая, хІердикІехІе ил верцахъес

Илияс лявкъянал». ⁵⁰ Ахъли вяврабяхъили, Гписани жан дедиб. ⁵¹ ИлхІели Аллагъла хъулибси пардав гъярбердили, кІибайбикиб; ванза зерзербухъун ва къаркъа пІякъдикиб; ⁵² хІябрира мягІдиуб ва дурхъати адамти мицірбиубли, дурхъаси шагъарлизи бакІиб ва бахълис гъалабизур. ⁵⁴ Гписас къараулбирути даршла бекІли ва иличил бархтани илди чедаили, дебали кахбиуб ва иб: «ХІекъдешличира, Ил Аллагъла Урши сайри». ⁵⁵ Илаб, галилеялан Гписас гІергъи бакІибти ва Илис къуллукъбирути, гъарахълабад хІербикІули хъунул адамтира лебри. ⁵⁶ Илдала ургаб лебри Мария Магдалинара, Якъубла ва Юсияла неш Марияра, Заведейла уршбала нешра.

ХІяриихъни

⁵⁷ БархІи ахъибхІели, Аримафеялизивадси, Гписачив учІули калунси, сунес Юсуп бикІуси давлачев адам вакІиб. ⁵⁸ Юсуп, Пилатличи вякъи, Гписала жаназа арбухахъес ихтияр га или тиладиухъун. Пилатли жаназа бедахъес хъарбариб. ⁵⁹ Илини жаназа убяхІасили, капайзи бергур ⁶⁰ ва, шурмазиб биркъубси, сунези гъалав чилра кахІейхъибси хІябла ухІна кайхъили, халаси къаркъара гъабихъили, арякъун. ⁶¹ Илаб Мария Магдалинара, цархІил Марияра лебри, хІябличи бяхІчили кабибти.

ХІябла гъалаб къараул

⁶² ЖумягІ бархІила гІергъиси бархІи хала кашишунира, фарисейтира Пилатличи бакІиб ⁶³ ва иб: «Хужаим! Нушаб гъанбикиб, Ит къянбарли мицірли левалхІелил иб: „ХІябал бархІила гІергъи миціркайрус“ или. ⁶⁴ Илбагъандан хІябал бархІи дикайчи хІяблис къараулбарахъес хъарбара, сенкІун Илала мутагІялимти дугели бакІили жаназа арбухалли, ил гІергъиси къяна цаибилличиб вайси бетарар». ⁶⁵ Пилатли илдази иб: «Къараулти касая, хІушаб дигусиван къараулбарая». ⁶⁶ Илди бякъи, хІябла гъала къараулти кабатур ва къаркъаличи мугъурдяхъиб.

Гписа миціриъниличила малаикли багъахъни

28 Сут бархІи шалгІеббухъи гІергъи, цархІил жумягІла бехІибхъудла цаибил бархІи савли Мария Магдалинара, цархІил Марияра хІяб чебаэс бакІиб. ² ИлхІели цІакъли мерсдакъун, сенкІун зубразивад каціибси Аллагъла малаик, хІябла унзаличибад къаркъа убкасили, иличи кайилри. ³ Илала куц лямцілагъунари, иличирти палтарра

дахІиван цІублири. ⁴ Илизибад урухбиубли, къараулбирути руржесбииб ва бекІибтигъунбиуб.

⁵ Малаикли, хъунул адамтачи дугъайзурли, иб: «УрухмакІудая. Балулра хІуша къанчличи чеветяхъибси ГписагІир умціули диъни. ⁶ Ил ишав агара – Ил, бурибси къяйдали, миціркайуб. Гъамдиубли хІердизирая Арочи кайхъунси мерличи ⁷ ва, къалабали дякъи, Илала мутагІялимтази бурая, Сай вебкІибихІивад миціриубли, хІушаб гъалав Галилеялизи аркъули сай ва илав чейида, или. ХІера, хІушази нуни бурира».

Гписас хъунул адамти къаршибикиб

⁸ Къалабали хІяблизибад дурабухъи, Илала мутагІялимтази багъахъес халаси урехиличил ва разидешличил дуцібухъун.

⁹ Илала мутагІялимтази багъахъес илди аркъухІели, илдас Гписа цугикиб ва иб: «Разидиарая!» Илди, гъамбиубли, Илала къяшми дуциб ва Илис икрамбариб. ¹⁰ ИлхІели илдази Гписани иб: «УрухмакІудая, дякъи, Дила узбази бурая Галилеялизи букъяхъес, Илав Ну илдани чейура».

Хала кашишунани къараулти асни

¹¹ Илди аркъухІели, цацабехІти къараултани, шагъарлизи бухІнабухъи, хала кашишунази бетаурсиличила буриб. ¹² Хала кашишуни халкъла тјамадабачил гъунибаили, мажлис барили, бургъантас дахъал арц дедиб ва иб: ¹³ «Бурая, нуша дусухІели, Илала мутагІялимти бакІили, дугели Ил вигІун или. ¹⁴ Эгер ил хабар улкала бекІличи баалли, хІушаб селра хІебарахъес нушани къайгъибирехІе». ¹⁵ Илдани, арц касили, чузи бурибсиван бариб. Ил хабар гъанналичи бикайчи жугъутІунала ургаб тІинтІиубли саби.

Вецінуцара мутагІялимлис гъалаизни; «Дукъеная, лебилра халкъани бяркъяя...»

¹⁶ Вецінуцара мутагІялим биалли, Гписани букъяхъес хъарбарибси, Галилеялизибси дубурличи арбякъун. ¹⁷ Илав Ил чеили, икрамбариб, амма цацабехІти васвасбухъун.

¹⁸ Гъамиубли, Гписани илдази иб: «Ванзалара заклар ари Набзи гибси саби. ¹⁹ Илбагъандан, ардякъи, лебилра халкъани бурсибарая, Дудешла, Уршила ва Дурхъати РухІла у багъандан бизахъули, ²⁰ Нуни хІушачи хъарбарибсиван гъар секІал дузахъес руркъули. Ну хІушачил вирусра лерилра замунтазив, ахирличи бикайчи. Амин».

ГІСА МАСИХІЛИЧИЛА ЛУКАЛА ГІЯХІ ХАБАР

Жузла мурад

1 Нушачир детаурти анцібукулумачила хабурти бахъли гьаларра цаладирхъутири. ² Илди секІал илдани чейули детаурти диънира, саби илди Девла къуллукъчиби биънира ашкарси секІал саби. ³ Нунира, хІурматчевси Феофил, гьар секІал бекІбархІиличирадал ахтардидарили, гьабгІергъили хабар белкІес ⁴ ва нуни белгили далути секІал марти диъниличи хІура таманни вирхаахъес къасбарира.

Шизиб бизахъан ЯхІъя алкІиниличила гьалахили бурни.

⁵ Гьирад Иудеяла пачали вируси замана лебли буили саби: Авияла къукъялизивадси, сунес Закария бикІуси, ца кашишра; Гьарунна къамлизирадси, сунес Елизавета бикІуси, илала хьунулра. ⁶ Илди кІелра Аричила амруби ва хъарбаркъуни дархъли тамандирути, Аллагъла гьалаб хІялалти мухлисун сабри. ⁷ Илдала дурхІни акІубти ахІенри, сенкІун Елизавета жугъан сарри, илди кІилалра гІяхІцад гІямрура ардякъири. ⁸ Ца гьачам, Закарияни Аллагълис балга бирухІели (ил барес кашишуналара сунелара яргала чебла сабри), ⁹ Аллагъла хъулибси кашишунала ургаб бузуси гІядат хІясибли, Аллагъла хъули аціили, къурбанбарибси секІал кабирхъуйхІир бизиси тІемла гІявадеш абалкахъи гавдушес илис чІалабаиб. ¹⁰ Илар гавдуршухІели, лебил халкъ булгули дураб тІашлири. ¹¹ Хапли илис Аллагъла малаик гьалайзур – ил гавдушибси мерла балуй шайчив тІашкайзурлири. ¹² Малаик чеили, Закария хІяккайзур ва гІур урухиуб. ¹³ Амма малаикли илизи иб: «УрухмакІуд, Закария, хІела балга къабулбариб, хІела хьунул Елизаветани уршира виркъу, илис хІуни ЯхІъя ибси ура бирхъид. ¹⁴ Илини хІед халаси харидеш лебху ва ил акІиниличи бахъал разибирар. ¹⁵ СенкІун Аллагъли ил дебали чевяхІиру. Илини я чягъир я держ хІедужу ва акІубхІейчивадал ил ЧеряхІти РухІли давлачевиру. ¹⁶ Илини хІекъли бахъал Израилла халкъ чула Аричи Аллагъличи чарбиру. ¹⁷ Ил Арикарличив гъавиубли вашар ва рухІлара цІакълара шайчив Илиясгъуна вирар, илини дудешхъалара дурхІналара уркІби чула саби-ургар уржахъу, илини мутІигІхІебиубтира

хІялалси гъуйчи дурайу, Арикар чучи вакІибхІейс, халкъра хІядуркабиру». ¹⁸ Закарияни малаиклизи иб: «Ил марси биъни нуни секъяйда багъес вирусу? Нура ухънаваилра, дила хьунулра жагъли ахІен». ¹⁹ Илис жаваблис малаикли буриб: «Ну Аллагъла мякълавси Жабраил сайра. ИкІини ну хІези гъайикІахъес ва хІези ил разиси гІяхІ хабар бурахъес вархъибсира». ²⁰ Нуни хІези бурибси секІалра замана баили гІергъи бетарар. Амма, хІу дила гъайличи вирххІеъни багъандан, хІела гъай детихъур ва лерил илди мардируси замана сабаайчи хІед лехІкахъес чевкъар.

²¹ Ил замана халкъ Закариячи хІерлири ва ил Аллагъла хъулив сен багълакайубсира или пикрилизиахъилри. ²² Дуравхъи хъалли, Закарияни гъайэс хІейуб. Илдани багъур Аллагъла хъулиб илини чедибад гьалабизурси чебаъни. Закарияни илдази някъбачил лишанти дирули, баянбирулри, амма сай тилхъавли калун. ²³ Сунела къуллукъбируси замана ахъибхІели, Закария хъайгІи чариуб. ²⁴ Камси заманала гІергъи илала хьунул дурхІялисраиб ва шел баз юртларад дурахІерухъи деркІиб. ²⁵ Ил рикІулри: «Халкъла гьалар набчила дурути дирглуми набчирадли черардукес багъандан, иш Аричини наб гибси сай, Сунени ишди бурхІназиб уркІецібарили».

ГІса МасихІ алкІиниличила малаикли Мариямлизи бурибси гІяхІ хабар

²⁶ Урегэсил базличив Галилеялизибси Назарет бикІуси шагъарлизи Аллагъли вархъибси Жабраил малаик ²⁷ Даудлизивад акІубси Юсуп ибси уличилси адамлис урарибси рурсиличи вакІиб. Ил рурсилис Мариям бикІусири. ²⁸ ВакІили Жабраил, иличи дугъайзур: «ХІези саламикІулра, Аллагъли черрикІибси адам! Аричира хІечил сай!» ²⁹ Ил уркІрухъи пикририкІулри: «Ишини набзи дурибти сегъуна мягІнала гъай сарира?» ³⁰ Малаикли иличи дугъайзурли иб: «ХІу Аллагъла уркІеціилиур саррину, урухмакІуд, Мариям!» ³¹ ХІу дурхІялисриуд, хІуни Уршира виркъид, Илис ГІса ибси ура бирхъид. ³² Ил чевяхІисили ветарар ва Илис ЧевяхІсила Урши или бикІар. ЧевяхІиси Аллагъли Илис Сунела минала хала дудеш Дауд пачала тахра бедлуга. ³³ Якъубла наслулис даимси пачали вирар ва Илала пачадеш ахир агартили дирар». ³⁴ Амма Мариямли малаиклизи хъарбаиб: «Ну шерир

хІериасли, ил секъяйда биэс бируси?»³⁵ Малаикли илис жаваб бедиб: «Дурхъати РухІ хІези кадиціур ва ЧевяхІсила ціакъ дакІубирар. Илбагъандан акІубси Дурхъаси ДурхІялис Аллагъла Урши сай илира бикІар.³⁶ ГІур, ХІела тухум Елизаветара гъанрикахъа гъари: ил рухънараили риалра, дурхІялисаили гъанна урегэсил баз риубли сари, илкІун жугъан сарри.³⁷ Аллагъли се-дигара барес вирар». ³⁸ ИлхІели Мариямли иб: «Ну Аллагъла арилизир сарра. Гъар секІал хІуни бурибси тяхІярли диаб».

Елизаветачи букъни

³⁹ Илала гІергъи камси замана дикибхІели, Мариям къалабарикили Иудеяла дубуртазибси шагъарлизи аррякъун.⁴⁰ Закарияла юртлизи араціили, Илини Елизаветас салам бедиб.⁴¹ Сунези ибти Мариямла саламла гъай дакъибхІели, Елизаветала канилавси дурхІяра вяхушъун. Елизаветачи Дурхъал РухІ хъурадиуб.⁴² Ахъси тіамаличил вявра или, Елизаветани иб: «Хъунул адамтазирад ХІу сарри Аллагъли черрикІибси! ХІела канилавси дурхІяра Аллагъли чеввикІибси сай!⁴³ Дила Арикарла Неш набчи ракІес ну чи сарсира гъари?!⁴⁴ ХІела гъайла тіама дила лихІбани бакъибмадан, дила канилавси виштІалра валли разили шикъикІесвахІибгу.⁴⁵ Сунези Аричини бурибсилочи рирхаурси, ил ирхІилирси адам сари».

«Дила рухІли Аричи мубаракирули сай»

⁴⁶ ГІур Мариямли иб: «Дила рухІли Аричи мубаракирули сай,⁴⁷ Берцудила ВеГІ Аллагъли дила рухІ разидарили,⁴⁸ ну гІядатла адам чераира. Гъаннала гІергъи лерил наслубала адамти наб талихІчерси сари или бикІар.⁴⁹ СенкІун Къудратла веГІли наб барибси секІал лебгІебал халаси саби, Илала ура дурхъаси саби!⁵⁰ Сунечи мутІигІтачи Илала уркІеціи наслубачибад наслубачи чеббашар.⁵¹ Илини Сунела ціакъси някъли гъакІбарили – чус гъандикибти пикрумира сабира уктемси агълу гъабяхъиб.⁵² Ціакъла бегІти къуллукъуначибад убасили, убяхІти ахъбуциб.⁵³ Гуштас лебдеш бедиб, давлачебти биалли селра хІебедили бархъиб.⁵⁴ Сунес къуллукъличибти израилланта, нушала гъаб-убла бегІтала, Ибрагъимла ва илдала наслула гъалаб даималлис чеасибси гъанбикили, Ил икъалакайуб. Иличила нушала дудешунази буриб».⁵⁶ Елизаветачир хІябал базцадхІи кали, Мариям сунела хъайгІи чаррухъун.

ЯхІгъа акІни ва илис у бихъни

⁵⁷ ДурхІя варкъес замана баибхІели, Елизаветани урши варкъиб.⁵⁸ Елизаветас Аричини барибси

ряхІмула анцібукъличила бакъили, илала унрубани ва узи-уршили ил мубаракарриб.⁵⁹ ГехІэсил бархІи илди урши суннатварес бакІиб ва дудешлис къяйда илисра Закария ибси у бихъеслибарриб.⁶⁰ Амма нешли, иличи къабулхІерикили, иб: «ХІебирхъехІену, ЯхІгъа бирхъехІе».⁶¹ Амма илдани иб: «Ил у хІела агълулизибалра агарагу».⁶² Ва, лишанти дирули, дудешлизи уршилис сегъуна у бихъес дигулрив или суалбухъун.⁶³ Закарияни, биштІаси уркъули гая или, тиладибарили, илизи белкІун: «Илала у ЯхІгъа саби». Лебилра тамашакабиуб.⁶⁴ Илмадан Закарияла гъай дакІиб ва, гъайикІесвахІибхІели, ил Аллагълис улгесвахІиб.⁶⁵ Лебилра унруби урухбуиуб ва Иудеяла лерилра дубуртала мераначир дурути гъай илди гІяламатла анцібукълумачилацун сарри.⁶⁶ Иличила бакъибси гъарра адам сунези сай викІусири: «Ит дурхІялизирад чи ветаэсара?» Аричи иличил вархри.

«Аллагъли талихІлис вархъибси Арикар» бикІуси Закарияла далай

⁶⁷ Илала дудеш Закариязира Дурхъати РухІ хъурадиуб. ГІур илра караматти секІал дурули гъайикІесяхІиб:⁶⁸ «ЧевяхІирехІе Арикар – Израилла Аллагъ! Илдас кумекбарес вакІибсира, Сунела халкълис азаддеш гибсира Ил сай;⁶⁹ Сунела къуллукъчили сайси Даудла наслулизирад вархъибси ЧевяхІси Берцуди Лебхан Ил сай.⁷⁰ Жъяси заманализибал Сунела дурхъати идбагунала мухІлубачил Сунени чеасибсири,⁷¹ душмантазибадра, нушачи гъимикартили сабти леблизибадалра нушаб берцуди хес;⁷² Нушала дудешуначи ряхІмучевсили виэс ва Сунела дурхъаси ВягІда гъанбикахъес,⁷³ нушала хала дудеш Ибрагъимла гъалаб барибси Сунела хъялис марли виэс⁷⁴ уруххІекІули, нушала душмантазирад азадли нуша хІердиахъес, нушала гІямрула бурхІни лералцадхІи Сунела гъалар хІялалтили ва диннис мартили диахъес.⁷⁶ ХІу, дила виштІал, ЧевяхІси Аллагъла идбаг ветаруд, сенкІун Илис гъуни кабихъес багъандан ва халкълизи саби берцесра биркур, илдала бунагъунира хасаркадалтути сари или, бурес багъандан хІу Арикарлис гъалавад вашуд.⁷⁸ Нушачи чедивад каціибсини, нушала Аллагъла малхІямси уркІеціили гъаббикІуси берхІиливан нуша шаладирура.⁷⁹ Илини ціябдешлизибти ва бекІала дяхІціилиубти халкъ шалабиру. Нушала къяшми даршудешла гъуникад дашахъу».

⁸⁰ Урши биалли халакайулри, дагърира чеимціадикІулри. Израилла халкъла гъалав вагъариэси замана сабаайчи, чІянкІ авлахъличив хІерирулри.

Гіса акІни

2 Ил замана лебил улкала халкъла лугІи белкІахъес Римла пача Августла хІукму дурабухъун. ² Сириялис Квиринийли бекІдеш дирес вехІихъила илгъуна балбуц бегІлара гъалаб дурабуркІулри. ³ Ил багъандан саби белкІахъес халкъ вегІ-вегІла шагъуртази чарбухъун. ⁴ Галилеяла Назарет шагъарлизивадси Юсупра Даудла агълула наслулизивадси виъни багъандан, Иудеялизибси сунес Вифлеем или бикІуси Даудла шагъарлизи арякъун. ⁵ Сай велкІахъес ил дурхІялисраибси сунела гелешмеш Мариямличил вархли арякъун. ⁶ Илди ВифлеемлизибхІели, Мариямли дурхІя варкъес дурусли замана баилри. ⁷ Илини цаибси Урши варкъиб ва вергурли тІенилизи кайхъиб, сенкІун илдани ГІяхІлала юртлизиб чус мер баргес хІебиуб.

ХІенкъулабачи малаик вакІни

⁸ Ил дуги чула хІункърас гузетчидеш дарахъес кабатурти адамтира лебри. ⁹ Хапли илдала гъала Аллагъла малаикра гъаласайзур ва Аричи чевяхІирули рурхІути нурли илди лебилра шалабариб. ¹⁰ Малаикли илдази буриб: «Урухмайрудая! Ну лебилра халкълис чебяхІси разидешла лебгІебал халаси хабар хили сайра хІушачи вакІибси. ¹¹ ИшбархІи Даудла шагъарлизив хІушаб Берцудила вегІ – МасихІ, Арикар акІубси бархІи саби. ¹² ХІера хІушаб лишанра: дукъядалли, руггурмазиуцили, тІенила кайхъибси дурхІя ургидая». ¹³ Хапли малаикла мякълаб Аллагълис дезна биркъути зубрала агълу багъарбиуб. ¹⁴ Илди бикІулри: «Деза биаб чихъ зубрачивси Аллагълис, ванзаличир Илала дигилиубти адамтас даршути гІямрура диаб!»

¹⁵ Малаикуни гІелабяхІ зубрачи чарбухъунхІели, гузетчибани цализи-цали иб: «Даширая, Вифлеемлизи ардякъи, Аричили дурибтазирад се мардиублил балехІену». ¹⁶ Илди къалабали ила бакІибхІели, Юсупличил рархли Мариямра, тІенила каркъибси ДурхІяра баргиб. ¹⁷ ДурхІя чеибхІели, илдани адамтази Ил дурхІяла черкад чузи малаикли дурибти гъар секІайчила буриб. ¹⁸ Илди дакъибти лебил халкъ хІенкъулта бурибсилчи тамашабиуб. ¹⁹ Мариямли лерил секІал уркІиладуциб ва илдачила пикририкІесряхІиб. ²⁰ ХІенкъулти биалли, чус чебаэсра бакъесра бикнилис Аллагълис дезна биркъули, гІелабяхІ чарбухъун.

Аллагъла хъулив ВиштІал Симеонничил ва
Анначил гъуниваъни

²¹ ГехІел бархІи дикили, ДурхІя суннатлаварес замана баибхІели, Илис, Сай канилав вагъариз

гъалабал Сунес Малаикли бедибси, Гіса ибси у бихъиб.

²² Мусани кабихъибси Низам хІясибли, умуирнила ГІядат дураберкІес замана баибхІели, Мариямлира Юсуплира чула Урши Аричис багъишлаварес Ярусалимлизи хиб. ²³ СенкІун Аричила Низамлизиб бурили саби: «Гъарилра акІубси мурул жинсла цаибил дурхІя Аллагълис багъишлаварили виэс ГІягІниси сай». ²⁴ Аричила Низамлизиб гІурра «КІел улугъ яра лагъала кІел дурхІя гъатІи къурбандарес чевкъар» илира бурили саби.

²⁵ Илзамана Ярусалимлизив левли сай сунес Симеон бикІуси адам. Ил хІялалси, диннис марси, Израиллис кумекличи хІерси ва сунези Дурхъати РухІ хъурадиубси адам сайри. ²⁶ Дурхъати РухІли Симеоннизи гъалахили бурибсири Аллагъла МасихІ чехІеили левалцадхІи хІу убкІхІебкІуд или. ²⁷ РухІли чебурниличивли, ил Аллагъла хъули вакІиб. Бузуси ГІядат хІясибли, суннат барахъес кили чула дурхІя ГІисара сабира бегІти ила бакІибхІели, ²⁸ Симеонни Ил някъбази сасиб ва, Аллагълис дезара барили, иб: ²⁹ «Арила ВегІ, ХІела лагъ ХІуни гъанна паргъатли ваткайулри, сенкІун ХІуни бурибси ХІуни таманбирули: ³⁰ Лебилра халкъанас Берцуди ХІезибад биъни дила хІулбани чебаира. ³² Ил – Аллагъ хІелути агълу шалабарес ухуси Шала сай ва ХІела Израилла халкъла ЧевяхІдеш сай». ³³ Гісачила Симеонни дурутачи дурхІяла дудешра Илала нешра тамашакабирули лехІихъутири. ³⁴ Симеонни илдас Аллагъла уркІециб балгун, Илала неш Мариямлизи иб: «ХІера, Ил кайхъунси багъандан Израилла бахъал халкъ чула къуллукъуназибад булхъан, бахъла даража ахъбирар. ³⁵ ХІела уркІи турливан кІибайбиру. ГІур Ил Аллагъла лишан ветарар ва бахъал Иличи къаршили дурабулхъан ва илтяХІярличил чула уркІбазирти дигІянати пикруми гъаргдиру».

³⁶ Илар Ашерала къамлизирадси Фануилла рурси идбаг Аннара лерри. Ил дебали рухънараибси адам сарри, муруйчил верхІел дус деркІибси. ³⁷ Ил гамъали гехІцІану авра дус риублири. Дубра рурцули, Аллагълис рулгра рулгули, ил Аллагъла хъулирад бекІлил дурахІерухъун. ³⁸ Илзамана илдачи гъамриубли, илра Аллагълис дезарикІес рехІрихъиб. Ярусалимлис азаддеш биахъес хІерти леблизилра илини виштІалличила хабар буриб.

³⁹ Аричила Низамли хъардарибти гъар секІалра дарили, илди Галилеялизи, чула шагъар Назаретлизи чарбухъун.

«Дила Дудешла вегІдеш»

⁴⁰ ДурхІя халаикІулри, Илала духудешра имцІакабикІулри. Ил Аллагъла дигили вицибсигъунари.

⁴¹ Гісала бегіти гьар дус Ярусалимлизи Пасхала байрамличи башутири. ⁴² Гіса веціну кіра дус виубхїелира, гьалаб кьайда, Илала бегіти Ярусалимлизи байрамличи бакїиб. ⁴³ Байрамла гїергьи илди хьайгїи чарбиуб, урши биалли илав Ярусалимлизив калун. ⁴⁴ Ил цархїилти бархкьябачил вархли льявкьули ургар или, илдани урши илав кални хїясибалра хїебариб. Ца бархїила гьуни ахьили гїергьи, тухумлара тянишуналара ургаб Илигїиб умціесбяхїиб. ⁴⁵ Илав хїергибхїели, илди Ярусалимлизи чарбиубли, илав варгес умціерилизиахьиб. ⁴⁶ Хїябал бархїила гїергьицун сайри илдани Ил Аллагьла хьулив варгибси. Ил мугїяллимтала урга кайили, илдачи лехїра ихьулри, илдази суалра викїулри. ⁴⁷ Иличи лехїихьути лебилра Илала гїякьуличира жавабтачира тамашабирутири.

⁴⁸ Ил чеибхїели, Илала бегїтира тамашабиуб. Нешли Илизи иб: «Гьай дила урши, Хїуни нушаб сен илгьуна бирусири? Нуша, Хїела дудешра нура, хїегїир умціули, сецад инжитдиубрал балулрив?»

⁴⁹ Илини жаваб бедиб: «Хїуша сен умціес гїягїинитирая? Ну Дила Дудешла хьайгїив виэс гїягїиниси биъни хїушани хїебагьуррав, гьатїи?»

⁵⁰ Амма Илала гьайла мягїна илдани хїергьиб.

⁵¹ Гіса илдачил вархли арякьун. Назаретлизи вакїибхїели, Гіса гьар секїайзив бегїтачил валкайкили, мутигїли вири. Илини дурибти гьай хьумхїертурли, нешли уркїиличир дихїулри.

⁵² Гіса халакаїулри, дусми имціадикїуцад гїякьула Сунечи Аллагьла ва адамтала дигира имціадикїулри.

Яхїяни вягїза бирули ва шизиб бизахьули сай

3 Ил бетаурсири веціну шура ибил дус Тиберийли императордеш дирухїели, Понтий Пилат Иудеялизив вегїбекї сайхїели, Гьирадли Галилеялизир, илала узи Филиппли – Итурияла ва Трахонитидила ванзурбачир, Лисанийли биалли Абиленализир бекїдеш дирухїели, ² Анналира Кайафлира хала кашишдеш дирухїели, чїянкї авлахьличиб Закарияла урши Яхїячи Аллагьла гьай баиб. ³ Гїур чула бунагьуни дерцахьес халкь Аллагьличи дугьабизахьес ва, илис лишан сабливан, шизиб бизахьес илди жибирули, Яхїя Иорданна дубаникадти лерилра ванзурбачивад чедиверхур. ⁴ Гісайя идбагла жузлизиб иличила белкїи саби: «Чїянкї авлахьличиб вявикїусила тїама бикьули саби: „Арикарлис гьуни хїядурбарая! Илис кьашла дякь гьарбарая: ⁵ гьарра шухїяри гьягьяли биціахьаб, музурбира ванзаличил царугдушаб, кьачїаълумира гьардараб, пукьнира лугїяна гьуни кьайдали кадизахьаб. ⁶ Илхїели мицїирси гьарра жаннис Аллагьла берцуди бирар“».

⁷ Шизиб базахьес сунечи кьукья-кьукьяли башути адамтази Яхїя викїулри: «Чїичїлумала кьур! Хїушачи челябкьуси Аллагьла гьимилизирад хїушаб дерцес биркур ибси пикри хїушази гьаналра чили бикахьибсив? ⁸ Хїушала дугьабиз уркїи-уркїилабадсили биъни баркьудилизиб чебаахьаягу! Амма „Нушала дудеш – Ибрагьим сай!“ – ибси пикрира уркїила мабурцидая. Нуни хїушази бурулра, Аллагьли Ибрагьимлис дурхїни ихди кьаркьубазибадра барес вирар. ⁹ Галгубала арла мякьлаб бардара хїядурли саби: гїяхїти цїедеш хїелугуси галга чебьяхьили цїализи лайбикїу». ¹⁰ Илхїели халкь Яхїязи хьарбикїулри: «Нушани се барес гїягїинилив?» ¹¹ Яхїяни илдас жаваб бедиб: «Сунела кїел хїева лерсини, ца бекїлил агарсилис бедаб. Сунела беркала лебсинира, илтяхїярли бараб». ¹² Шизиб базахьес бакїибти хїекь бурчантанира илизи иб: «Мугїяллим, нушани се бариша?» ¹³ Яхїяни жаваблис иб: «Хїушаб лайикьбарибсиличиб имціаси тїалабабиридая». ¹⁴ Бургьантани хьарбаиб: «Гьатїи, нушани се бариша?» Илдас жаваб бедиб: «Чилра малутїада, бугьтан чемабирхьидая ва хїушала алапаличирли хїердиирая».

¹⁵ Халкь лебгїеб халал умутличил Масихї вакїахьес хїерлири ва, лебталалра уркїиличи «Масихї – ит Яхїя рахли ахїенара?» – ибси пикрира башулри. ¹⁶ Амма Яхїяни лебталалра гьалаб буриб: «Нуни хїуша шизир дизахьулрая, наб гїелавадли льявкьуси, Ит набчив цїакьси сай. Ну Итала сирхьикїунала дабругуни арзесалра лайикьли хїергус. Илини хїуша Дурхьати рухїлизир ва цїализир дизахьурая. ¹⁷ Дургїибси дег биргїубли бекїбарес кура Сунела някьбазиб сабну, Итини анкїи усила калкья, нег биалли бекїлилра хїебилшуси цїаличир игу». ¹⁸ Гїяхї хабар тїинтїбирули, Яхїяни халкь руркьутири ва уркїичеббирутири. ¹⁹ Сунела узила хьунул Гьирадатличи хьайчикайъни багьандан ва цархїилти дахьал такьсирти багьандан Яхїяни Гьирад пужирулри. ²⁰ Лерти нукьсандешуначи че Гьирадли Яхїя туснакьвариб.

Гіса шизив вазахьни

²¹ Лебил халкь шизиб базахьили гїергьи, Гісара шизив вазиб. Илини балга бирухїели, зубри гьаргдиуб, ²² ва лагьалагьуна куцличилти Дурхьати Рухї Илизи хьурадиуб. Гїур закибад тїама абердиб: «Хїу – Наб дигуси Урши сайри! Дила харидешра Хїечи саби!»

Илала насабла тарих

²³ Сунела вазипа бехїбихьибхїели, Гіса хїябцїалицад дус виублири. Гіса, халкьла пикри

хІясибли, Илияла урши Юсупла урши сайри. Илала гъаб-убла бегІти саби: ²⁴ Матат, Леви, Малхи, Янай, Юсуп, ²⁵ Матати, Амоц, Наум, Хесли, Наггай, ²⁶ Махат, Матати, Шими, Юсех, Ягъуд, ²⁷ Яханан, Реса, Зерубел, Шалатиэл, Нури, ²⁸ Малхи, Адда, Касам, Элмада, Эр, ²⁹ Яшуа, Элизер, Ирим, Матат, Леви, ³⁰ Симеон, Ягъуда, Юсуп, Янам, Элким, ³¹ Малия, Минна, Мататай, Натан, Дауд, ³² Исай, Овед, Бааз, Салман, Нахшон, ³³ Аминадав, Админ, Арни, Хецрон, Перец, Ягъуда, ³⁴ Якъуб, ГІсакъ, Ибрагъим, Терах, Нахур, ³⁵ Серуг, Реу, Пелег, Эвер, Шалах, ³⁶ Кинан, Арпахшад, Сим, НухІ, Ламех, Метушелах, ³⁷ Энах, Иред, Махалал, Кинан, ³⁸ Энаш, Сет, Адам, Аллагъ.

ГІса къадагъасиличи хъулирахъни

4 Дурхъати РухІ сунези хъурадиубси ГІса Иорданничивад чарухъунХіели, РухІли чІянкІ авлахъличи арукиб. ² Ил авцІали бархІи илав илбисли къадагъасиличи хъулирахъули калун. Ил заманала бухІнаб Илини селра хІеберкун. БегІла гІергъира Ил гушиуб. ³ Илбисли ГІсази иб: «Эгер ХІу Аллагъла Урши виадли, их къаркъализи къацІ бетаахъес бура, гъари». ⁴ ГІсани илис жаваблис иб: «Дурхъаси жузлизиб белкІи саби: „Адам ца къацІличивлицун аХіен хІерируси“». ⁵ ГІур илбисли Ил ахъихІи арукиб ва ца гъигъла заманалис Илизи лебилра дунъяла пачалихъуни чедаахъиб. ⁶ Илбисли Илизи иб: «Чула лебил къуватра давлара сарира лерилра ихди пачалихъунас бекІдеш дирахъес нуни ХІези ари лугас. Лерилра ихди гъалар наб гибтири, гъанна наб дигусилис дедес ари набзиб саби. ⁷ ХІуни наб икрамбарадли – ихди гъар секІал хІела дирар». ⁸ ГІсани илизи иб: «Дурхъаси Жузлизибра иличила белкІи саби: „ХІела Аричи Аллагълис икрамбирен, Илалацун хІурматра бирен“». ⁹ ИлХіели илбисли ГІса Ярусалимлизи арухили, Аллагъла хъа ца къуббаличи тІашатурли, Илизи иб: «Эгер ХІу Аллагъла Урши виадли, ишадли уди тІяхІухъен. ¹⁰ СенкІун Дурхъаси Жузлизиб бурили саби: „Аллагъли Сунела малаикуначи ХІу верцахъес хъарбиру; ¹¹ ХІу илдани някъбачив аркури, ХІела къяшалра къаркъализи чехІейгур“». ¹² ГІсани илис жаваб бедиб: «Дурхъаси Жузлизиб гІурра белкІи саби: „ХІела Аричи Аллагъла хІялумцІесра валмалзад“». ¹³ Илала гІергъи илбис, сунела лерилра хІиллакар далдуцлумаи керхурли, иладли арбякъун, кІинайс чарбухъесли.

Галилеялизиб вягІза

¹⁴ ЧебяхІси РухІла цІакълара вегІкайубли, ГІса Галилеялизи чарухъун. Иличила хабар улкала лерилра мер-мусализи тІинтІбиуб. ¹⁵ Киласабазиб

Илини адамти руркъулри ва лебтанилра Ил чевяхІирулри.

Назаретлизив къабулХіериб

¹⁶ ГІса Сай халаваибси Назарет шагъарлизи вакІиб ва сут бархІи, Сунела ГІядатлибиубси барили, киласализиб Дурхъаси Жуз бучІес вехІихъиб. ¹⁷ Илизи ГІисайя идбагла жуз бедиб. Жуз гъаргбарили, ГІсани илаб ишгъуна белкІунси мер баргиб: «Аричила РухІ Набчил сари – ИкІини Ну чевикІира мискинтази ГІяхІ хабар бурахъес. Ясиртази саби азадли биъни багъахъесра, сукъуртази чула хІулбала шала чарбирниличила багъахъесра вархъибсира. ИкІини Ну ГІязабдешлиубти азадбарахъесра Аричила ряхІмукардешла манзил сабаъниличила бурахъесра вархъибсира». ²⁰ КъяпІбарили жуз къуллукъбирусилзи бедили, ГІса кайиб. Киласализибти лебталалра хІулбала хІер ИличибяхІ сабри. ²¹ ГІсани, илдачи дугъайзурли, иб: «Жузлизиб гъалахили бурибси, хІушанира бакъибси секІал ишбархІи маркабиуб». ²² Илала гъай леблилра гІердуциб ва Илала гъайла устадешличи тамашабирули, илдани хъарбиусири: «Рахли, Юсупла Урши Ит сай аХіенара?» ²³ ГІсани илдази иб: «Гъайгъайра, гъанна хІушани набзи айту буридая: „Гъари, тухтур, хІуни хІу сагъварес дарман дара. Капернаумлизиб биубсилличила нушани бакъирану, илгъуна ишаб нушала ватІайзибра бара“». ²⁴ ГІсани Сунела гъай гІурра даимбариб: «ХІушази бархъли бурулра: сунела ватІайзив марируси идбаг вируси аХіен. ²⁵ ХІушази бархъли бурулра: хІябал дус байхъала ряхІматра хІебарили, лебил улкализи цІакъти гашира дикибси, Илияс идбагла замана Израиллизиб бахъал гамъа хъунри бири. ²⁶ Амма Илияс илдазирадли цаличилра хІерхъили, ил Сидонничи гъамихІибси Сарептализирси гамъачи вархъибсири. ²⁷ Елисей идбагла замунтазиб Израиллизиб бахъал къявга изайзи бикибти адамтира бирутири, амма цалра сагъварибси аХіенри, ца сириялан Нааман аХіенси». ²⁸ Илди гъай дакъили, киласализибти лебилра халкъ лебгІебал гІясибиуб. ²⁹ Харчбизурли, илдани ГІса уцили, шагъарлизивадли хъусяхъили, сунечиб Назарет шагъар белшунси, дубурла ахъсигъуна мерличивад лайвакІес арухиб. ³⁰ Амма ГІса илди халкълизивад вердили аръякъун.

Капернаумлизиб адамти излумазибад арабирахъули сай

³¹ ГІса Галилеялизибси Капернаум шагъарлизи вакІиб ва сут бархІи халкъ руркъес вехІихъиб. ³² Илала гІякълула гъайличи лебилра тамашакабирутири, сенкІун Илала гъай халаси цІакъличил зайдикІулри. ³³ Илав киласализив

жиндралаиубси илбисла гъигъли вяхъибси ца адамра леври. Ил ахъси тІамаличил вьавухъун:
³⁴ «Эй, Назаретлан ГІиса, се саби ХІед нушазибад гІягІниси? Нуша талапдаресрив ХІу иша вакІибси? Нуни ХІу чи сайрил балулра. ХІу – Аллагъли вархъибси Дурхъаси Адам сайри!»
³⁵ ГІисани жиндлизиди буюрбариб: «ЛехІахъину, ил адамлизидибад дурабухъен!»
 Киласала байлав ил адамра кайкахъили, жинд илизидибад дурабухъун. Адамлис сегъуналра заралра хІебиублири.

³⁶ Лебилра адамти тамашабиубли, цализи-ца бикІулри: «Ишди се тамашала гъай сари? Илала цІакъ ва ари илцад халатигу, Илини буюрбаралли, жиндрира далли дурадулхъулигу!»
³⁷ Иличила хабар алавчарти лерилра мераначи тІинтІебиуб.

³⁸ ГІиса киласализивад дуравхъи Симонна юртлизиди ацІиб. Симонна хъубеш неш ил замана цІакъти дуцІари чедухъи карихъири. ГІисазиди илис кумекбарахъес тиладибариб.
³⁹ Иличи ГІиса гІяшиуб ва иб: «Изала, бетакъи!»
 Хъунул адамла изала беткахъиб. Илмадан аризурли, ил илдас къуллукъбиресряхІиб.
⁴⁰ БерхІи гІелабиркес бехІбихъибси замана Иличи гъар журала излумани буцибти адамти бикесбяхІиб. Гъарилличи някъ чебурцули, Илини лебилра сагъбариб.

⁴¹ Бахълизирад илбисуниди дурадухъи дубшутури: «ХІу – Аллагъла Урши сайри!» – или, вьавдикІули. Илдани ГІиса МасихІ сайни балулри, амма Иличила чизилра хІебурахъес Ил илдази чІумали хъарикІусири.

⁴² Савлила аргълис Ил шагъарлизивад дуравхъи, чилра агарси мерличи вяхІиуб. Бахъал халкъ ИлгІиб умцІес дурабухъун. ГІур варгібхІели, чучивад архІявкъяхъес къайгъилизидикиб.

⁴³ ГІисани илдази буриб: «Нуни цархІилти шагъуртазибра Аллагъла Низам-зегъала дунъяличила гІяхІ хабар бурес гІягІниси саби. Ил барахъес сайра Ну иша вархъибси». ⁴⁴ Ил Иудеяла киласабазир вьагІзурти дирес даимиуб.

Симон Петрра, Якъубра, ЯхІъяра ГІисани жибарни

5 Гъачам ГІиса Геннисарет шараличи гъамси мерла хъурайуб. Илини дурути Аллагъла гъайличи лехІахъес, халкъла халаси къукъяли Ил алавуциб. ² ГІисани иладли гъарахъли декІар ахІи шарала дубла тІашаибти кІел къаякъ чедиаб. Бялихъибани къаякъличибад кабацІили, турани ицулри. ³ Гъамиубли, илдазибад ца, Симонна бируси къаякъличи айили, ГІисани дубличибад цигІила тядидибахъесра тиладибарили, халкълизиди ГІевугъни даимбариб. ⁴ Дурути тамандиубхІели, Илини Симоннизиди иб: «Къаякъ цакъадар мурхъихІи букили, бялихъуни дурцути турани ита лайдакІая». ⁵ Симонни Илизиди иб: «Арикар, абзур дуги дузули хъалли нушани селра хІебуцира; ХІуни хъарбирули

гІергъи, нуни тур иргъис». ⁶ Илдани тур игъуб. Дуцибти бялихъунала дахъдешли туранира далли гъяркавдулри. ⁷ ЦархІил къаякъличибти юлдашуниди кумекличи бакІахъес илди някъба гъакІибикІесбяхІиб. Илдани бакІили кІелра къаякъ дицІибхІели, илди шиннизиди кайгІесдяхІиб. ⁸ Ил чебаили, Симон Петр, ГІисала гъалав къукъмусра викили, тиладиухъун: «Дила Арикар, тиладибирулра, ну бунагъкар адам сайрану, набчивад ХІу арукъен!»
⁹ Сай Симонра сунечил бархти юлдашуниди – Заведейла уршби Якъубра ЯхІъяра балли, дикибти илцад дахъал бялихъуни чедиаили, дебали уркІбухъун. Симоннизиди ГІисани иб: «УрухмакІуд. Гъаннала гІергъи хІу адамти бурцан ветаруд». ¹¹ Илдани шарала дубла къаякъ дурасиб ва илар гъар секІалра дархъдатурли Арикарлис гІелабадди арбякъун.

Къявгала изайзивсира къаркъала буцибсира арабарни

¹² Гъачам ГІиса ца шагъарлизив левси замана, Иличи къявгали лебил чарх кІапІебарибси ца адам гъамиуб. ГІиса чеибхІели, илала гъала вяхІудиикили, бусравикІескайиб: «Дила Арикар, эгер ХІед дигадлири ХІуни ну сагъварес виради».

¹³ ГІисани някъ гъабатур ва иличи гачикили иб: «Дигулрану, умуи». Илмадан илала къявга бетакъиб. ¹⁴ ГІисани илизиди биубсиличила чизилра хІебурахъес буриб ва иб: «ХІу сагъиъниличиди адамти бирхаахъес багъандан кашишличи укъенну, хІу сагъварнилис, Муса идбаглира хъарбарилван, садакъа беда». ¹⁵ Аммаки ГІисачила дурути хабурти челис че имцІадикІулри, Илала гъайличи лехІибизес ва излумазибадди умубиахъес Илини чус кумек барили дигути халкъ хІункърадди башулри. ¹⁶ Сай ГІиса биалли, гъаман чилра агарси мер баргили, улгулри.

¹⁷ Гъачам, ГІиса халкълизиди ГІевугъухІели, Иличи лехІихъутала ургаб Галилеялара Иудеялара лерил шимазибад ва Ярусалимлизидибад бакІибти фарисейтира Низамла гІялимтира лебри. ГІисазиди Аллагъли бедибси къуват Илини зягІипти сагъбирнилизиди дакІубулхъусири. ¹⁸ Ца-чумал адамли, някъби-къяшми хІедузуси инсан ганзилличи кайхъили левхути ил хъули ухІнайсули, ГІисала гъала кайхъес къайгъилизидикиб.

¹⁹ Чукурбикибти халкъла бахъдешли, илтыхІярличил ил ухІнасеси имкан хІебаргили, илдани хъалчлизиди тІярхъи бариб ва иладди ухІнасили, ганзиличивси чула зягІипкар хъа байла, ГІисала гъала кайхъиб. ²⁰ Сунечи илди адамтала бирхауди чебиули, ГІисани ил адамлизиди иб: «ХІела бунагъуни хасаркадатурти сари». ²¹ Низамла гІялимтира фарисейтира саби-бухІнаб пикрилизахъили, бикІулри: «Чи сайсира Ит,

Аллагъ мучлахІейран? Бунагъуни хасардалтес ца Аллагъли ахІи, ГІур чили вируси?»²² ГІисани, илдала пикруми дучІули, илдази жаваблис иб: «ХІушала уркІбази илдигъунти пикруми сен дашути?»²³ Бурая гъари, се эс гъамадлив: „ХІела бунагъуни хасаркадатурти сари“ яра „Айзину ваткайхъи“?²⁴ Ванзаличир бунагъуни хасардалтес ари Инсаниятла Уршилизибра лебси биъни гъанна бусягІят хІушанира баладая». ГІур някъби-къяшми хІедузуси адамлизи Илини иб: «Нуни хІези бурулра, касану хІела бурушра хІура, хІела хъайгІи арукъен». ²⁵ Лебтазилра чейахъули, ил харчизурли айзур ва сай кайхъунси бурушра касили, Аллагълис дезаикІули, хъайгІи арякъун. ²⁶ Лебилра тамашабиубли, хІяккабизур. Илди Аллагълис дезабикІули, уркІбухъи бикІутири: «ИшбархІи нушани бекІлил вирххІеэсигъуна секІал чебаира!»

Левий живарни

²⁷ ГІур ГІиса иладли арякъун. Илини хІекъ бурчнав кайибси, сунес Левий бикІуси хІекъ бурчан чеили, илизи иб: «Айзину, Наб ГІелавад ваши!»²⁸ Ил, гъар секІалра дархъдатурли, айзурли Илис ГІергъи гъайиуб. ²⁹ ГІисала хІурматлис Левийли, адамтира жибарили, ГІяхІси сяхІбат бариб. ГІяхІлала лугІилизиб бахъал хІекъ бурчантира цархІилти адамтира лебри. ³⁰ Фарисейтира Низамла ГІялимтира, чула къабулагри дакІубирули, хъутурбикІули, ГІисала мутагІялимтази бикІулри: «Сен хІуша хІекъ бурчантачилра цархІилти бунагъкартачилра дукутира ва дужутира?»³¹ ГІисани илдази иб: «Тухтур сагътас ахІенну, зягІиптас сай ГІягІниси. ³² Ну иша вакІибси бунагъкарти Аллагъличи чарбиахъес сайра, бирхаурти жибирес ахІенрану».

Дуббуцарличила

³³ ГІур илдани ГІисази иб: «ЯхІгъяла мутагІялимти гъаман дуббурцар ва булган, фарисейтала мутагІялимтиранира илкъяйдали биру, ХІела биалли – букра-букули, бужра-бужули саби!»³⁴ ГІисани илдази иб: «ГъатІи гелешмеш чучил виалли, мекъличибти ГІяхІли чили дуббуцахъес вирара?»³⁵ Аммаки илдазивад Ил кевкасибти бурхІнира ляркъян, хІера илхІели илди дубра кабурцу». ³⁶ ИлхІели илдази гІурра ца гъатІи буралара буриб: «Сагати палтарличибад чеббердили, дуркъа палтарличи чилилра декІа чехІебалта, сенкІун ил баралли сагати палтар заядирар, дуркъа палтарличира сагаси чІянкІила декІа балхІебиркур. ³⁷ Дуркъа тІагънагІи сагати чягъирра кахІертІу, сенкІун сагати чягъирли тІагънира гъяркавдахъу, чягъирра чяхІақадирар, тІагънира заяли аркъян. ³⁸ Сагати чягъирра сагати тІагънагІи кертІаб! ³⁹ ДахъхІидиубти чягъир держибсилис сагати

чягъирра хІейгахъу. Ил викІар: „ДахъхІила ГІяхІити сари“».

«Инсаниятла Урши – сут бархІилара хужаим сай»

6 Гъачам сут бархІи ГІиса анкІила хъу байбяхъили аркъухІели, Илала мутагІялимтани дердили лугни, някъба сурқдарили дукулри.

² Фарисейтани илдази иб: «Се саби хІушани бируси? Сут бархІи ил бирес асубируси ахІенгу!»

³ ГІисани илдас жаваб бедиб: «ХІушани хІебелчІунрав гъатІи, Даудли сайра гушли сунела адамтира гушбиубхІели се барибал?»⁴ Илини Аллагъла юртлизи ацІили, кашишуна ахІи, цархІил адамли деркес асухІебирусилизи халдирути къуцІри, суненира деркун сунела адатасра дедиб». ⁵ ГІисани буриси даимбариб: «Инсаниятла Урши – сут бархІилара хужаим сай».

⁶ ЦархІил сут бархІира ГІиса киласализи вякъун ва халкълизи ГІевугъули калун. Илав сунела балуй някъ берубси ца адамра леври. ⁷ ГІисани ил сагъваралли, иличивли Ил ГІяйиблаварес багъандан, Низамла ГІялимтара фарисейтара Иличи дигІянали хІеруди бирулри. ⁸ Амма ГІисани илдала къас балулри ва берубси някъла вегІлизи иб: «Айзи, иша, бегІлара байла тІашизи». Ил айзур ва лебталалра гъала тІашизур. ⁹ Илала ГІергъи, ГІисани илдачи дугъайзурли, иб: «Нуни хІушази хъарбиулра: сут бархІи се барес асубирулира? ГІяхІдешу яра вайдешу? Жан дерцахънив яра илди харабдарнив?»¹⁰ Илди лебличилра хІерра чедиберхахъурли, Илини ил чулахълизи иб: «ХІела някъ гъабати, гъари». Илини някъ чебаахъибхІели, ил цархІил някъван сагъсили уббухъун. ¹¹ ГІисала къаршикарти, лебгІеб дебали ГІясибиубли, ГІисачил се баралли ГІяхІсил чула саби-ургаб пикрилизахъиб.

Веціну кІира вакил чеббикІни

¹² Ца бархІи ГІиса балга барес дубурличи ацІиб, абзур дуги Аллагълис улгули, илаб беркІиб. ¹³ ГІур шаладикибхІели, Илини Сунела мутагІялимти тІалаббарили, илдазибад веціну кІира чеббикІили, вакилти бариб. ¹⁴ Илди сабри: сунес Петр ибси чеура бедибси Симонра, илала узи Андрейра, Якъубра, ЯхІгъяра, Филиппра, Варфоломейра, ¹⁵ Матфейра, Фомара, Алфейла урши Якъубра, Вайерх ибси чеула вегІ Симонра, ¹⁶ Якъубла урши Ягъудара, ГІур ГІисас хаиндеш дарибси Ягъуда Искаротра.

¹⁷ Вакилтачил вархли дубурличивад увяхІухъи, ГІиса диркъаличив тІашизур. Илаб Сунела мутагІялимтала ва лебил Иудеялизибадра, Ярусалимлизибадра, Тирла ва Сидонна дубаначирти шагъуртазибадра бакІибти бахъал адамти лебри. ¹⁸ Илди ГІисала гъайличи лехІахъес

ва Илизи саби излумазибад сагъбарахъес бакІлри. Жиндрала изай буцибтира илаб сагъбирутири. ¹⁹ Илабти лебталалра къайгъи ГІсачи гачбикес сабри, сенкІун Илизиб лебилра сагъбируси ціАкъ гъанарулири.

**Илини илди руркъули сай:
чи сая «талихІчевси»?!**

²⁰ МутагІялимтачи хІулбира ахъдуцили, ГІса гъайикІесвяхІиб: «ТалихІчертирая хІуша, мискинти! СенкІун Аллагъла Низам-зегъала дунъя хІушала саби. ²¹ ТалихІчертирая хІуша, гъанна гушти! ХІуша Аллагъли лукъахъурая. ИрхІилиртирая хІуша, гъанна дисути! ХІуша дукаркІудая.

²² ТалихІчертирая хІуша, адамти хІушачи гъимикарли биалли ва хІуша гъадирхъули, далтІули диадалли, Инсаниятла Урши багъандан хІушала уличи агруми чедирхъули диалли. ²³ Илгъуна бархІи хІуша шадли диреная ва разили тІяхІдикІеная! Зубрачиб ХІушачи лебгІеб халаси шабагъат хІерли бирар! Илди адамтала дудешхъаланира идбагунас тѧп илгъуна сабри бируси. ²⁴ Амма хІушаб, давлачерти, балагъ-къадар дирар! ХІушани лигІмат гъалабал чебаирая.

²⁵ ХІушаб балагъ-къадар дирар, гъанна делкъунти! ХІушачи гашира чевкъар. Балагъ-къадар дирар хІушаб, гъанна дукаркІутас! ХІуша къудкъули агъидикІули дисудая. ²⁶ Лебилра адамти хІушачила гапбикІули биалли, хІушабра балагъ-къадарра дирар: илди адамтала дудешхъаланира къалпти идбагунни тѧп илкъяйдали гапбирутири.

²⁷ Амма хІушази, Набчи лехІихъутази, Нуни бурулра: хІушала душмантачи дигичерли диреная, хІушачи гъимикартас гІяхІси биреная, ²⁸ хІушачи лягІнатбикІутас талихІ булгеная, хІуша далтІутас дулгеная. ²⁹ ХІела ца ляжилизи бяхъибсилис, итил ляжира кабуца. ХІела чела палтар кебусулиси хІева арбухахъесра диргаламалхъад. ³⁰ ХІези тиладиухъунсира гІелавяхІ чармайрид, беда, ва, хІела кебкайсули виалра, гІелабяхІ чарбара майкІуд. ³¹ ХІед цархІилтани барили дигуси секІал, хІуни илдас бирен. ³² ХІечи дигичевсиличи, иличи хІура дигичевли виадли, илизиб хІу гапвареси се леба? СенкІун бунагъкартасра чучи дигичебтицун дигахъу. ³³ ХІушаб кумекбирутасцун хІушанира кумекбирули диадалли, илис хІушаб сегъуна баркалла биэса? СенкІун ил бунагъкартанира биру. ³⁴ Эгер хІуни чеблалис арц, илди чардирниличи умут лебсилисцун дедлугули виадли, илизиб хІу гапвареси се леба? Чебла чарбирни балухІели сари бунагъкартанира арц чеблалис лугути. ³⁵ ХІушани илкъяйдали мабиридая! ХІушала душмантачи дигичерли диреная, илдас кумекбиреная ва чеблалисра лугеная, ил чебихъниличи хъулра майкІудая. ИлхІели хІушаб халаси шабагъат

къадарбирар: хІуша ЧевяхІсила уршбили дирудая, сенкІун ИкІ ГІяхІбаркъ хІебалантачира ГІясикартачира валли ряхІмукар сай. ³⁶ ХІушала ряхІмукар Дудешван хІушара ряхІмучертили диирая.

³⁷ Чилра судлизи марцид, хІура хІерцури.

Чичилра гІяйибти чехІерхъадли – хІечири чехІерхъу. Чевурхен, хІечибадра чебкабурхар.

³⁸ Лугеная – хІушабра луга, чебчебли биціили луга: хъячІкабарили, чІяхІ-чІяхІли калкъа. ХІуни сегъуна умцдали умцадра, илгъуна умцдаличил хІедра умцу». ³⁹ ГІисани илдас ишгъуна буралара буриб: «Сукъурли сукъур гъавуцили викес виару? Илди кІелра курла бухІна кахІебиркуру, гъатИи?

⁴⁰ МутагІялим сунела мугІяллимличив чевли виэс хІейрар, белчІуди таманбарибси мугІяллимгъуна ветарар. ⁴¹ Сен хІуни хІела узила хІуйзибси пис чебиули, хІела хІуйзибси зехни чехІебиусири?

⁴² ХІуни хІела хІуйзибси зехни чехІебиули виадли, хІела узиси: „Гъари, узи, хІела хІуйзибси пис дурайсисну“ – или, викІес хІу секъяйда вирусири? КибяхІян сайри хІу! ХІуни гъаланачи хІела хІуйзибадди зехни дураса, хІела узила хІуйзибад пис секъяйда дурайсусил гІур чебиидну.

⁴³ ГІяхІси галгаличир вайти цІедеш хІедашар, вайси галгали гІяхІти цІедеш хІелуга. ⁴⁴ Гъарилра галгала хІял иличирти цІедешличибли саби балуси. Я занзиличирад инжир, я муръухъличирад тІутІи хІедурчу. ⁴⁵ ГІяхІси адамли сунела уркІила духІнарти гІяхІдешлумала хазнализібад гІяхІси дурайсу. Вайси адамли сунела уркІила вайдешла хазнализібад вайси дурайсу. Адамла уркІилар лерти саргу мухІилларадра дурадиркути.

⁴⁶ Набчи: „Арикар, Арикар!“ – или, дугъадилзули, Нуни бурибси хІушани сен хІебирутирая? ⁴⁷ Набчи вашуси, Дила гъайличи лехІихъуси ва сунези бурибси бируси гъарил адам чичил мешууцес вирарал Нуни хІушази буришав? ⁴⁸ Ил мешуси сай юрт барес къасбарили, мурхъси хъулчира абитІи, ил къаркъаличибси хъулчиличиб белшунси адамличи. Шин дахъдаили хІеркІ юртличи чедиберхурхІелира ил юрт, гІяхІси хъулчиличиб белшунси биъни багъандан, шикъалра хІебухъун.

⁴⁹ Амма сай Дила гъайличи лехІихъули, сунези бурибси хІебируси мешууцес асубирар хъулчи ахІебитІи юрт тІашбатурси адамличи. Шин чедиухъунхІели, юрт илмадан гъятІкабиуб. Илала мерлар урціницун сарри калунти».

**Даршла бекІла
къараваш араварни**

7 Халкълизи Сунени дурес пикридарибти гъар секІалра дурили, ГІса Капернаумлизи чарухъун. ² Даршла бекІла левли сай сунес дебали ахІерси, бекІала урехилизисви къараваш.

³ Гісачила хабар бакъили, ил хІуребала бекІли Иличи жугъутІунала тјамадаби бархъиб – вакІили, сунела къараваш верцахъни тиладибарахъес.
⁴ Гісачи бакІили, илди халаси къайгъиличил тиладибухъун: «Ит даршла бекІ ХІуни сунес кумекбаресра лайикъси адам сай, ⁵ итис нушала халкъра дигахъу, итини сабри нушаб киласара барахъибси». ⁶ Гіса илдачил варх арякъун. Ил сунела юртличи гъамиубхІели, даршла бекІли сунела юлдашуни Гісас гъунибаахъес бархъили, Илизи бурахъиб: «Я Арикар! Къияйзимаркуд, ХІу дила юртлизи аціили, ХІуни дила хІурматбарес ну лайикълира хІергус. ⁷ ХІера, илбагъандан ну ХІед гъуниваэс хІекІира – дила пикрили, нуни илгъуна баресра лайикъли ахІенри. Амма ХІуни ца гъайадри – дила къараваш сагъкайри. ⁸ Нура цархІилла арилиувси адам сайра, амма дила арилиубти бургъантира леб. Илдазивад цализи „Укъен“ – или, бурасли, ил аркъян, цархІиллизи „Иша ваши“ – или, бурасли, лявкъян. Къаравашлизира „Ит секІал бара“ – или, хъарбарасли, илинира бирули сай». ⁹ Илди гъай дакъили, Гіса тамашакайуб ва Сунес Гіелабадди лябкъути халкълици дугъайзурли, иб: «Нуни хІушази бурулра: Набчи ишабсигъуна бирхауди Израиллизибра чехІебаира». ¹⁰ Гісачи бархъибти чарбиубхІели, къараваш сагъкайубли варгиб.

Наинлизирси гамъала урши мицірварни

¹¹ Камси заманала гІергъи Гіса Наин бикІуси шагъарлизи арякъун. Иличил барх сунела мутагІялимтира бахъал халкъра лебри. ¹² Гіса шагъарла къапуличи гъамируси замана, илаб бекІара сабра лябкъути къаршибикиб. Ил гамъаси нешла цайли-ца урши сайри. Нешлис Гіелабад шагъарлизибад лябкъути бахъал халкъра лебри. ¹³ Ил чераили, язихъризурли, иличи дугъайзурли, Гісани иб: «Рисмарисуд». ¹⁴ ГІур гъамиубли, Гіса ганзилици гачикиб. БекІа хъуцірумачиб архути тІашбизур. Гісани иб: «Жагъил адам, хІези викІусира, айзи!» ¹⁵ ВебКибси ахъиубли кайиб, гъайикІесвяхІиб. Гісани ил ГіелавяхІ чарварили, сунела нешлици вархъиб. ¹⁶ Лебилра уркІубухъун ва Аллагълис дезабикІесбяхІиб: «ЧевяхІси идбаг нушала ургав вагъариуб. Аллагъ Сунела халкълис кумекли виэс вакІиб». ¹⁷ Гісачила ил хабар лебилра Иудеялизира алавчарти мераначира тІинтІиуб.

Шизиб бизахъан ЯхІъяс Гісала жаваб

¹⁸ Сунела мутагІялимтани лерилра илди анцібукълумачила ЯхІъязи буриб. ¹⁹ ЯхІъяни КІел мутагІялим сунечи тІалаббарили, илди Арикарлизи

«ВакІес гІягІиниси Баягъи ХІу сайрив, яра нуша цархІил вакІахъес хІердикІес гІягІинилив?» – или, хъарбаахъес бархъиб. ²⁰ Гісачи бакІили, илдани иб: «Нуша ЯхІъяни дархъибтира ХІези хъарбаахъес: „ВакІес гІягІиниси Баягъи ХІуриув, яра нуша цархІил вакІахъес хІердикІес гІягІинилив?“» ²¹ Ил замана сабри Гісани бахъал халкъ излумазибадра, ГІядабти зугІлумазибадра, ГІясикар жиндразибадра сагъбарибти ва бахълис хІулбала шала чарбарибси. ²² Илдас жаваблис Гісани иб: «Дукъеная, хІушани чедаибтачилара дакъибтачилара ЯхІъязи бурая: „Сукъурти гІурра чебианкабиублири, гІяргаби аракабиублири, къявгала изайибти умукабиублири, гІянціаби бикъанкабиублири, бекКибти миціркабиублири, мискинтаци ГІяхІ хабарра биулри. ²³ Набчи васвасхІейубси ирхІиливси сай“ – или». ²⁴ ЯхІъяни бархъибти арбякъунхІели, Гіса халкълизи ЯхІъячила гъайикІесвяхІиб: «ЧІянкІ авлахълици хІуша селичи хІердикІес дякъунрая, дягІли лавшарбируси чІигІяличив? ²⁵ Гъу, чІянкІ авлахълици селичи дякъунрая? Гъайбатти палтарла вегІ адам чейэхІе или гъанбикибу? Амма жагати палтарра челгъули, эркиндешлизиб хІербирути, – илди кІялгІяла тавхунтазибгу бирути. ²⁶ ХІушаб чи чейэхІе или гъанбикиб? Идбагу? Идбаг хІушани чеира, хІушази бурулра, ЯхІъя идбагличивра чевяхІси сай. ²⁷ Дурхъаси жузлизиб сунечила ишкъяйда белкІунси: „ХІера, Нуни ХІечив гъалав Дила вакил урхъулра, илини ХІед гъалаб гъунира хІядурбируси“. ²⁸ Нуни хІушази бурулра, адамтала къамлизив цалра ЯхІъячив чевяхІсизили халареси агара. Аммаки Аллагъла Низам-зегъала дунъяличив виштІасира иличив чевяхІси сай». ²⁹ ЯхІъяни дурути дакъибти лебил халкъли, хІекъ бурчантанира балли, ЯхІъязи саби базахъили, Аллагъла баркъудлуми дархъти дитъни марбариб. ³⁰ Амма фарисейтанира Низамла ГІялимтанира Аллагъли хъарбарибси чехІесили, ЯхІъязи саби базахъес къабулхІебикиб. ³¹ ИлхІели Гісани хъарбаиб: «Нушала заманала адамти Нуни чичил цугбуциша? Илди чичи мешуливу? ³² Илди мешути саби майдайчи кабиибти ва цабехІлизи-цабехІ ишкъяйда вявбикІути дурхІначи: „Нушани сяхІбатла макъам бяхъилихъалли, хІушани делхъ хІедарра, нушани марайси макъам бяхъилихъалли, хІуша дисихІедиирая“. ³³ ЯхІъя вакІиб, ил я къаціли хІевкун, я чягъирли хІевжиб, амма хІуша илис „Илизиб жинд леб!“ – или дикІулрая. ³⁴ Инсаниятла Урши вакІиб. Ил укра укун, ужра ужиб – хІуша биалли дикІулрая: „ХІердикІеная, хІекъ бурчантала ва бунагъкартала вархкъя, канихъус ва держла тІагъа – Ит сай!“ ³⁵ Амма Аллагъла пасихІдеш лебилра илала дурхІнани марбирули саби».

Хъунул адамли бизили тІембикІуси ГІявадешли ГІсала кьяшми дакиб

³⁶ Ца пулан фарисейли ГІса сунечил вархли кьяцІли укахъес живариб. Ил фарисейла хъайГІи ацІили, кьумурла мякъла кайиб. ³⁷ Ил замана шагъарлизир хІерриуси, бунагъкар сарливан ралуси ца хъунул адам, ГІса ил фарисейличив хІерейс укес вакІили левни багъурли, тІемла ГІявадешличилси хъабара хили, ила раКІиб. ³⁸ ГІеларадли гъамриубли, рисули каризурХІели, ГІсала кьяшмачи каркути сунела нургъбира чурмачил душкили, байра рикІули, ГІур ГІявадешра чертІили, Илала кьяшми суркдиресряХІиб. ³⁹ Ил чебаили, ГІса сунечи живарибси фарисейлис гъанбикиб: «Нагагъ Ит идбаг виалри, сунечи гачриркуси бунагъкар адам риънира бали». ⁴⁰ Амма ГІсани илизи иб: «Симон, Наб хІези бурес дигуси леб». Ил викІар: «Бура, дила МугІяллим».

ХІялалдатурти чеблумачила бурала

⁴¹ ГІсани иб: «Ца адамла лебли саби чеблалиубти кІел адам. Цаличбси чебла шударш динарла, цархІилличбси биалли – шуцІали динарла сабри. ⁴² Чеблума ахъес хІебирухІели, илини илдала чеблума хІялалдатур. Бура, гъари, илдазивад чидилла диги иличи имцІали бирара?» ⁴³ Симонни жаваб бедиб: «Дила пикрили, сунес дахъал арц хІялалдатурсила имцІали бирар». ГІсани илизи иб: «ХІуни бархъли белгибарири». ⁴⁴ Хъунул адамличи ласяхъили, Илини Симоннизи иб: «ХІуни иш хъунул адам чериулрив? Ну хІела хъули вакІира, хІуни наб кьяшми дирцахъес шин хІегири. Ишини биалли, сунела нургъбачил Дила кьяшми дирциб ва сунела чурма суркдариб. ⁴⁵ ХІу набчи байхІейкунри, иш биалли, Ну иша ацІибхІейчирад рехІрихъили, гъаннара Дила кьяшмачи байрикІули лерал. ⁴⁶ ХІуни Дила бекІ зайтун ГІявадешли хІебакири, ишини биалли тІемла ГІявадешличил Дила кьяшми булан дакиб. ⁴⁷ Сен барибсил Нуни хІези бурис: ишала дахъал бунагъуни хасаркадатурти сари, илбагъандан ишала дигира цІакъти сари. Сунела бунагъуни камли хасардатурсила цархІилтачи дигира камли дирар». ⁴⁸ ГІсани ил хъунул адамлизи иб: «ХІела бунагъуни хасаркадатурти сари». ⁴⁹ ГІурилти ГІяхІли чузи саби бикІутири: «Чи сайсира Иш бунагъунира далли хасардалтуси?» ⁵⁰ Амма ГІсани хъунул адамлизи иб: «Аллагъличи хІела рирхнили сарри хІу рерцахъибси. Аррукъен паргъатли».

ГІсани шагъуртикад ГІяхІ хабар тІинтІирули сай

8 Илала ГІергъи камси замана арбякъунХІели, ГІса Аллагъла Низам-зегъала дунъяличила бурули, шагъуртазира шимазира чедиверхур.

Сунела вецІну кІира вакилра ² вайти жиндразибадра излумазибадра сагъбарибти ца-чумал хъунул адамра Иличил бархли лебри. Илдала лугІилизиб лебри: сунезирад ГІисани верхІел жинд дураибси ва сунес Магдалина бихъибси Марияра, ³ Гъирадла халалгъуна буюрчили сайси Хузла хъунул ИГІяйнара, Сусаннара ва бахъал цархІилтира. Илдани чула лебдешлизибад ГІисара мутагІялимтира хІяжатти гъар секІайчил ГІеббурцулри.

Хъубзарличила ва гъеличила бурала

⁴ Иличи декІар-декІарти шагъуртазибадли халкъ башутири. Цагъачам, бахъал халкъ цалабикибХІели, ГІисани илдас ца бурала буриб: ⁵ «Гъе дегІес хъубзар дуравхъун. Илини делгІухІели цацадехІти гъе гъунила дубла кадикиб. Илдазирад цацадехІти ганзкадариб, цархІилти биалли, даКІили арцанта дергун. ⁶ ЦархІилти гъе – къаркъубарси ванзаличи кадикиб, чедаКІиб, амма шин агни багъандан чедаКІибти деръуб. ⁷ ЦархІилти занзубала урга кадикили, эркинни дерхъибти занзубани илди ГІянддаКІиб. ⁸ ЦархІилти биалли, тухъси ванзаличи кадикили, чедаКІиб ва деГІунти гъеличиб даршнаили имцІаси сабухъ гиб». Илди гъайра дурили, ГІисани иб: «Бакъес лихІби лерсини бакъаб!» ⁹ МутагІялимтани Илизи буралала мяГІна сегъуна саби или хъарбиэскабиб. ¹⁰ Илини иб: «Аллагъла Низам-зегъала дунъяла анцІбукъуни дагъахъес хІушаб имкан гибси саби. ЦархІилтас буралабазир кавлан, илбагъандан илдани хІербикІули чехІебиу, лехІихъули хІебикъу. ¹¹ Ил буралала мяГІна ишгъуна саби: гъе – илди Аллагъла гъай сари; ¹² Гъунила дубла кадикибти ибси – илди гъайла бакъибти адамти саби; амма илбис бакІили, бакъибси гъай илдала уркІбазибад бигІи арбухибти адамти саби, илди бирххІеахъесра, хІеберцахъесра багъандан. ¹³ Къаркъубар ванзаличи кадикибти ибси – бакъибси гъай чули разидешличил къабулбирути, амма чІумаси кабизалачебдеш агарти адамти саби, ил багъандан цакамси манзиллис илди динниччи бирхарар, амма къияндеш чучи чебуркъибихІиб илдани гъандуцес хІебирар ибси саби. ¹⁴ Занзбази кадикибти гъе ибси – илди чузи бурибси гъай бакъибти адамти саби; амма илдала ГІямру аркъули сари, чула къайгъназира, арцлизира, ГІямрула лазатуназира ахъили – илдала лугнира дикъХІедикъурли кавлули сари ибси саби. ¹⁵ Тухъси ванзаличи кадикибти ибси – бакъибси гъай чула хІялалси, умуси уркІилизиб бихІути, кабизалачебдешличибли чула сабухъ бурчуту адамти саби ибси саби.

«Хіуша цархІилличи севан лехІдилзулраял
пикридухъеная»

¹⁶ Алкахъунси шямличи чилилра вакъ чекахебирхъу яра тахла уди кахебирхъу, абицІутани шала чебиэсли, сунела мерличи кабирхъу. ¹⁷ ЯкъинхІебиубли калеси дигІянасира лебси ахІен, ашкархІебиубли, чеди дакІухІебухъеси секІалра лебси ахІен. ¹⁸ Гъари, хіуша цархІилличи севан лехІдилзулраял пикридухъеная. Сунела лебсилис гъатІира луга, сунела агарсилизибад биалли, лебгу или гъанбиркусира балли кебкайсу».

¹⁹ Гъачам ГІисачи нешра узбира бакІиб, амма чукурбикибти халкъла бахъдешли, Иличи гъамбиэс хІебиуб. ²⁰ Илизи багъахъур: «Хіу чеэс дигули, ХІела нешра узбира къакъалаб тІашли теб». ²¹ ГІисани илдази иб: «Дила нешра узбира – Аллагъла гъайличи лехІихъанти ва ил бузахъути адамти саби».

Урхъначиб бурям тІашаъни

²² Гъачам ГІиса Сунела мутагІялимтачил варх къаякъличи айиб ва илдази иб: «Даширая шарала итил дубличи детахъдулхъехІену». Илди гъайбиуб. ²³ Къаякъ батбихъибхІели, ГІиса ускаун. Хапли шараличиб бурям бехІибхъиб ва къаякъ шинни бирцІесбяхІили, илди урехилизи бушиб. ²⁴ МутагІялимтани гъамбиубли ГІиса чеваргъахъиб ва иб: «Арикар! Арикар! Нуша улхулирагу!» Илини, чеваргъили, дягІра рамчанира тІашдизахъур. Илди ряхІятдиуб ва лехІдеш чебихъун. ²⁵ ГІисани мутагІялимтази иб: «Хіушала дирхни чинаба?» Илди уркІбухъи ва тамашакабиубли, цализи-ца бикІулри: «Сунени буюрикІули, дягІра шинра далли мутІигІдируси, иш чи саяра?»

**Жиндралаиубсилизирад
жиндри гъадяхъни**

²⁶ Илди Галилеяличи бяхІчили кабизурси Герасинлантала ванзаличи хъурабиуб. ²⁷ ГІиса шарала дубличи дуравхъунхІели, Илис шагъарлизивадси сунези жиндри хъурадиубси адам къаршиикиб. Ил гъалавал палтар агарли вашулри ва хъайгІив ахІи хІябрала хъулразив хІериулри. ²⁸ Ил илдани инжитирули вахъхІи сайри. Някъбира къяшмира рахажуначил дуцахъили вилгъули хъалли, жиндрани гъалакварибхІели, рахажунира къябкаили, ил вебшили чилра агарихІи арашусири. ГІисани жиндрази ил адамлизирад дурадухъахъес буюрбариб. ГІиса чеили, вявра или, Илала гъалав къукъмусикиб ва ахъси тІамаличил иб: «ГІиса, ЧевяхІси Аллагъла Урши, набзибад хІед се саби гІягІиниси? ХІези нуни тиладибирулра инжитхІерахъес!» ³⁰ ГІисани илизи хъарбаиб: «ХІед

чи бикІара?» Илини жаваб бедиб: «Хіуреба». СенкІунал адамлизи дахъал жиндри хъурадиублири. ³¹ ГІисази жиндри тиладидухъун: «Нушази лутІи агарси хандакълизи дукъеная майкІудгу» – или.

Цурмала хІенкъ

³² Илаб, дубурличиб, гІяйкабикІули цурмала халаси хІенкъ лебри. Жиндрани ГІисази ихди цурмази хъурадиахъес пурбанбарагу – или, тиладибариб. Илини ихтияр бедиб. ³³ Адамлизирад дурадухъи жиндри цурмази духІнадерхур, амма лебил хІенкъ шарала ахъси дубличибад шиннизи тІяхІкабухъун ва алхун. ³⁴ Бетаурси анцІбукъ чебаили, цурмала хІенкъулабани шагъарлизиб ва алавчарти мераначиб халкълизи буриб. ³⁵ Биубси чебаэс халкъ чукурбиркесбяхІиб. ГІисачи бакІибхІели, палтарра чекагъурли Илала гъала кайибси, духули гъайикІуси адам чеили, илди урухбиуб. ³⁶ Илизирад жиндри дурайули чебаибтани ГІисани ил секъяйда сагъварибал илдази бурутири. ³⁷ Герасинна мерличибти лебилра халкъ бахъ дебали урухбиубли, ГІисази тиладибухъун, чула мер-муса дархъдатурли арукъахъес. Ил къаякъличи ацІиб ва чарухъун. ³⁸ Сунезирад ГІисани жиндри дураибси адам Илизи сайра вархли арукахъес тиладиухъун. Амма ГІисани ил гІелавяхІ чарвариб, или: ³⁹ «ХІела хъайгІи чариину, Аллагъли хІед барибсиличила халкълизи бура». Ил адам чариуб ва сунес ГІисани барибси чебяхІси гІяхІличила лебилра шагъарлантази бурескайиб.

**Яирла рурси мицІиррарни
ва някъ гъамбарили хъунул адам сагърияхъни**

⁴⁰ ГІиса Галилеялизи чариубхІели, Иличил гъунибаэс бахъал халкъ бакІиб, сенкІун лебилра Иличи хІерлири. ⁴¹ Тяп ил замана Иличи киласала бекІ сайси, сунес Яир бикІуси адам вакІиб ва, Илала гъалав къукъмусра икили, Илизи сунела хъайгІи ацІахъес тиладиухъун, ⁴² сенкІун илала, вецІну кІира дуслациад гІямрула, цайли-ца лерси рурси рубкІулри. ГІиса иличил ватихъиб; бахъал халкъли Ил алавкавцили гъяжвариб. ⁴³ Ца хъунул адам вецІну кІира дус хІи дашнила изай руцилри. Илини сунела лебилра лебдеш тухтуртас харжбарили хъалли, ил чилилра сагърарес хІебиуб. ⁴⁴ Пеларадли гъамриубли, ил ГІисала пляшла дубличи гачрикиб. Илмадан илала хІи тІашдизур. ⁴⁵ ГІисани хъарбаиб: «Набчи чи гачикиба?» Амма лебилра гачхІедикира или хъяма биркълри. ИлхІели Петрли иб: «Арикар, ХіукІун чукурбикибти халкъли алавкавцили гъяжварилри». ⁴⁶ Амма ГІисани гІурра иб: «Юх, Набчи чирил гачикиб. СенкІун Набзибад цІакъ дурабухънира балли

гъанаур». ⁴⁷ ИлхІели, дигІянкили калес имканхІебикІни багъурли, гъала дурарухъи ва къукъмусра рикили, хъунул адамли се сабабли Иличи гачрикибал ва секъяйда илмадан сари сагъриубал лебилра халкъла гъалаб буриб.

⁴⁸ ГІсани илизи иб: «ХІу, Дила рурси, хІела рирхнили саррину сагъриахъубси, паргъатли аррукъен».

⁴⁹ ГІсани илди гъай дурили бекІхІейубли левалли, киласала бекІла юртлавад вакІибси ца адамли иб: «ХІела рурси ребкІиб. Гъанна МугІяллимлис бекІмахмалхъад». ⁵⁰ Илди гъай дакъили, ГІсани илизи иб: «УрухмакІуд. ЧІянкІли вирхен, рурси сагъкаритар». ⁵¹ Юртли ухІна айцІухІели, Илини, Петрра, ЯхІъяра, Якъубра, рурсила неш-дудешра ахІенти, сунечил бакІахъес хІебатур. ⁵² Юртли лебилра ребкІибсила чебкад бисулри, агъибикІулри. ГІсани илдази иб: «Дисмадисудая, рурси ребкІили ахІенну, русаи сари». ⁵³ Рурси ребкІни балули, Иличи лебилра дукарбяхІиб. ⁵⁴ Амма ГІсани, илала някъра буцили, тІамадариб: «Рурси, аризил!» ⁵⁵ Ил мицІиркариуб ва харчризурли аризур. ГІсани бегІтази рурси къацІли рахахъес буриб. ⁵⁶ Рурсила бегІти тамашакабиуб. ГІсани илдази бетаурсилчила чизилра хІебурахъес хъарбариб.

ВягІза бирахъес ва адамти сагъбирахъес вецІну кІира бархъни

9 ГІсани вецІну кІиралра вакил тІалаббарили, адамтазирад лерилра жиндри дурайахъес ва излумазибад илди сагъбирахъес ари-цакъ дедиб.

² Илини илди Аллагъла Низам-зегъала дунъяличила халкълизи бурахъесра, излумазибад адамти сагъбирахъесра бархъиб. ³ Илдази иб: «АрхІяли дурадулхъухІели селра камайсида: я тІерхъа, я тавра, я къацІ, я арц, я дарс чегъес кІидехІести палтар. ⁴ Чидил юртлизи адацІадалра, ардукъеси замана сабаайчи илар каленая.

⁵ Нагагъла чинар-биалра хІуша хъурахІедарадалли, ил шагъарлизирад аркъухІели, хІушани чучи се хІерлил багъахъес багъандан, хІушала къяшмачи илар чеакунти хъасара далли пяхІдарая».

⁶ МутагІялимти арбьякъун ва, гъар мерлаб ГІяхІ хабарра бурули, зягІиптира сагъбирули, шимазибад чедиберхур.

ГІса улгнили Гъирад вачаирхахъули сай

⁷ Лерилра илди секІайчила бакъили, мер-мусала халал бекІ Гъирад вачавархиб, сенкІун цацабехІти бикІулри: «ЯхІъя мицІиркайубли сай», ⁸ цархІилти биалли, «ЯхІъя вакІили сай», хІябэстира – «Гъалабла жявси заманала идбагуназивад чидил-саял ца идбаг мицІириубли сай». ⁹ Амма Гъирадди иб: «Нуни ЯхІъяла бекІ чеббяхъяхъирагу, чи

сайсира сунечила набзи ил хабар бакъахъибси?» Илис ГІса чеэс дигулиахъиб.

Шел азир къацІли бахни

¹⁰ ЧарбиубхІели, вакилтани бякъунихІир лерилра чули дарибтачила ГІсази буриб. Ил, сунечил бархли илдира арбукили, Сай мутагІялимтачил илав цайухъесиэси, Вифсаида бикІуси шагъарличи гъамихІибси адамти агарси мерличи арбьякъун.

¹¹ Амма иличила багъурли, бахъал халкъ Илис ГІелабад арбьякъун. Илини илди разили къабулбариб ва илдази Аллагъла Низам-зегъала дунъяличила хабуртира дурули, зягІипкардеш лерти сагъбирули, калун. ¹² БархІехъла замана гъамбиубхІели, вецІну кІира вакил Иличи дугъабизур: «Ишди халкъ чус хъурабиэси мерра, сегъуна-биалра беркалара баргахъес алавчарти шимази бархъагу, сенкІун иш адам хІерхІейруси мер сабину». ¹³ ГІсани илдази иб: «ХІушани бахеная». Илдани иб: «Нушала лерал-лерти шел къацІра, кІел бялихъра сарну, хІебиалли, ардякъи лебил халкълис даэстицад берклуми асалли ахІенси?» ¹⁴ Илаб шел азирцад адам лебри. ГІсани Сунела мутагІялимтази иб: «ХІушани илди гъар къукъялизиб шуцІали адам биэсли бутІили кабатырая». ¹⁵ Ил викІуси барили, лебилра кабахъиб. ¹⁶ ГІур касили шел къацІра кІел бялихъра, ГІсани, закибяхІ хІеръили, баркатладарнила балгара белчІи, бутІнаддариб ва илабти адамтас дутІахъес Сунела мутагІялимтази дедиб. ¹⁷ Лебилра букули белкъун; калунти бутІнани вецІну кІира чІап дицІахъиб.

Петрли ГІса МасихІ сайливан къабулбирули сай

¹⁸ Цагъачам, ГІсани, сайцун кайили балга бируйхІиб, чебакІибти Сунела мутагІялимтази хъарбаиб: «Чи сай бикІули Наб адамти?» ¹⁹ Илдани жаваб бедиб: «ЦабехІ ХІу – Шизиб бизахъан ЯхІъя сай, цархІилти – Илияс идбаг сай, цацабехІти биалли, ит вебкІибихІивад айзурси, жяв заманала идбагуназивад ца сай бикІули саби». ²⁰ Илини хъарбаиб: «ХІушала пикрили, Ну чи сайра?» Петрли жаваб бедиб: «ХІу – Аллагъла МасихІ сайри».

ГІсани Сунела ажайчила гъалахили бурни

²¹ Амма ГІсани, чизилра хІебурахъес чІумали хъарбарили, ²² илизи иб: «Инсаниятла Уршиличи дахъал къиянти чевкъар. Киласала хала тьямадабани, хала кашишунани, Низамла гІялимтани Ил бекІлилра мучлахІейру ва каршу. Амма хІябэсил бархІи Ил мицІирирар».

**ГІямру сен-сен детахъахъес ва мяІкамдарес
вирарал**

²³ ГІур ГІисани, лебтачилра дугъайзурли, иб: «Сунени сунела жан кадихъили, Набчил варх вакІес дигуси левиалли, ил Наб гІелавад вакІаб ва гъарилли сунечи чебуркъибси дехра бихаб – сай наб гІелавад вашес къасбарибхІели. ²⁴ Сунела гІямру дерцахъес дигусини илди детихъахъу. Амма Ну багъандан сунела жайзирад ухъунсини биалли, илди уцахъу. ²⁵ Лебил дунъя сунела бетааллира, адамлис се гІяхІдеша, эгер сунени сай заявиралли яра каршалли? ²⁶ Набзирадра Дила девлизирадра чи уруз-гІелумиаллира, Сунела, Дудешла ва Аллагъла дурхъати малаикунала чебяхІдешла рурхІилизив вакІибхІели, илизирад Инсаниятла Уршира уруз-гІелумиар. ²⁷ ХІекъдеш бурулра, Ишаб тІаштазирад цацабехІли бекІала хІял багъес гъалабал Аллагъла Низамла-зегъала дунъя чебиу».

²⁸ Илди дурибхІейчирад гехІел бархІи ардякъунхІели, Сунечил бархли арбукили Петрра, ЯхІъяра, Якъубра сайра, ГІиса балга барес дубурличи ардякъун. ²⁹ УлгухІели, Илала дяхІла сипат хапли барсбиуб, палтарра дяхІиван цІубли лямцІидикІесдяхІиб. ³⁰ Иличил кІел адам ихтилатбикІулри. Илди зубрала пархли-рявли шалабарибти ва Ярусалимлизиб ГІисас къадарбирусиличила гъайбикІути Мусара Илиясра сабри. ³² Петрра илала бархкъябира цІакъли бусулри. ЧебаргъибхІели ГІисала асилдешла шалара, Илала мякълаб тІашти кІел адамра чебаиб. ³³ Илди ГІисачирад арбукъес балбизурхІели, Илизи Петрли иб: «Арикяр, нушаб ишаб лебгІеб гІяхІил саби! Дашираягу, ишар хІябал чятир дирехІе, ца ХІед, ца Мусас, ца Илияслис». Петрли сай сейкІулилра балули ахІенри. ³⁴ Илини ил бурухІели, багъарбиубли гъагулли, илди сунела дяхІцили кІапІбариб. Саби хапли гъагуллиуб багъарбиубти мутагІялимти уркібухъун. ³⁵ Илдани гъагуллизирад тІама бакъиб: «Ил сай Дила черикІла Урши. Иличи лехІдилзена!» ³⁶ Ил тІама хІебикъанбиубмад, илдани сайцун ГІиса чеиб. ИлхІели чули чедаибтачила мутагІялимтани чизилра хІебуриб.

Жиндралаиубси дурхІя сагъварни

³⁷ ГІергъила бархІи, саби дубурличирад чарбирухІели, ГІисас бахъал халкъ гъунибаиб. ³⁸ Илдазирад ца адамли вьавъахъиб: «МугІяллим! Нуни ХІези дила левси цайли-ца уршиличи хІеръахъес дебали тиладибирулра. Жиндри дяхІили, урши чІярикІесирхІяхъу, туми дуцили левил дянгалзахъу, хъулухъма тІутІуикІахъу ва вахъхІи вархъІелтули, гІязабуркІу. Нуни ХІела мутагІялимтазира уршилизирад жиндри дураахъес тиладибаррагу, илданира селра барес хІебиуб».

⁴¹ Илис жаваблис ГІисани иб: «Агъ, ишди адамтала кабизалаагриличи ва бирхаудиагриличи хІеръаягу! Ну сецадхІи хІушачил варх виэс ва хІушани дирутачи Нуни гІурра сецадхІи сабурбарес вирусира? Гъари, хІела урши иша ка!» ⁴² Лявкъули левли урши жиндли, хІялбакІахъили, ванзаличи кайкахъиб. ГІисани жиндри дугІаиб ва сагъварили урши сунела дудешлизи ведиб. ⁴³ Аллагъла ахъриличил лебил тамашабиуб. Сунени дирутачи тамашабирни чебаили, ГІисани мутагІялимтази иб: ⁴⁴ «ХІушала лихІба бакъаб ва хъумра мартаб: Инсаниятла Урши адамтала някъбази ведлуга». ⁴⁵ Илди гъайла мягІна илдани хІергъиб. Илди дигІянаси мягІна лебти гъай сарри, илбагъандан илдани ил багъесра хІебири. Амма Илизи чузи бурибсила мягІна се сабил хъарбаэсра илди урухкІулри.

⁴⁶ Илаб саби мутагІялимтазирад чидил халасил белгибирули жал бетаур. ⁴⁷ ГІисани, илдала уркібазибси пикри багъурли, ахъуцили виштІаси дурхІя Сунела мякъла катур ⁴⁸ ва илдази иб: «Ну багъандан иш дурхІя къабулварибсини, Нура къабулирулра. Ну къабулварни, Ну иша Вархъибси къабулварни саби. ХІушазирад бегІлара виштІал халасили вирар».

Чихъали бахъалу?

⁴⁹ ГІисала гъайлис жаваблис ЯхІъяни иб: «НасихІятчи, нушани ХІела у гъанбушили, адамтазирад жиндри дурайуси ца адам чеира. Ил нушачил вархли вашхІешни багъандан, нушани илис къадагъабарира». ⁵⁰ ГІисани илизи иб: «ХІушачи къаршили ахІенси, ил хІушагІевли сай, къадагъамабиридая».

⁵¹ Иш дунъяра батурли, Сай зубрачи айсуси замана чесабиули биъни багъандан, ГІиса Ярусалимлизи вяхІиуб. ⁵² Сунес гъалаб Илини Сунела кумекчиби бархъиб. Илис гІягІинити гъар секІал хІядурдарес багъандан илди самариялантала шилизи арбякъун. ⁵³ Амма ГІиса Ярусалимлизи аркъуси виъни балули, шантани Ил хъурахІериб. ⁵⁴ Ил чебиули, ГІисала мутагІялимти Якъублира ЯхІъянира иб: «Арикяр, дигадли, нушани закирад цІа кабацІахъили, ихди талапбарахъес бурехІе?» ⁵⁵ ГІисани, илдачи гІелавяхІ ласяхъили, къадагъабариб. ⁵⁶ ГІур илди цархІил шилизи арбякъун.

⁵⁷ Илдани чула архІя даимбариб ва гъуйчив къаршиикибси ца адамли ГІисази иб: «Арикяр! ХІу чина аркъядлира, ну ХІечил вархли льявкъяс». ⁵⁸ ГІисани илизи иб: «Гурднас тІярхъубира, арцантас пукънира лер, амма Инсаниятла Уршилис бекІ кабихъесалра мер агара». ⁵⁹ ЦархІиллизи биалли ГІисани иб: «Наб гІелавад ваши». ГІисачи дугъайзурли, ил тиладиухъун: «Дила Арикяр,

гьаланачи ну дила хъайгІи чариубли, дила дудеш хІяриихъахъес пурбанбара». ⁶⁰ ГІсани илизи иб: «БекІибти илабтани хІярибихъаб, хІуни арякьи, Аллагъла Низам-зегъала дунъяличила ГІяХІ хабар бура». ⁶¹ ГІсази цархІиллира иб: «Арикар, нура ХІед гІелавад лявкъясну, гьаланачи дила хъайгІибтаци вякьи, ГІяХІил каленая или бурахъес пурбанбара». ⁶² Илизи ГІсани иб: «Сунела някъбани дураз буцили гІергьи, ГІур гІелавяхІ ласяхъили хІерикІуси чилра Аллагъла Низам-зегъала дунъяличи хъуликІес хІейрар».

ВерхІцІану кІира мутагІялим булгахъес бархъили саби

10 Илала гІергьи Арикарли ГІурра верхІцІану кІира мутагІялим чеббикІиб, кІи-кІили бутІиб ва Сай укъес къасбарибти лерилра шагъуртазира шимазира сунес гьалаб бархъиб. ² ГІсани илдази иб: «Диршес арши дахъли, бузести камлину, хІушани аршила вегІлизи ГІурра аршикъянаби бархъахъес тиладибарая. ³ Дукъеная: Нуни хІуша буцІала хІенкълизи мукъриван дурхъулрая. ⁴ Я тавра, я гавлаг, я дабруми камайсидаея ва гъуйчиб чисалра салам малугадаея. ⁵ Чила-биалра юртлизи адацІибхІели, хІушани гьаланачи „Иш юртлис балгундеш!“ – илира аея. ⁶ Эгер ил юртлизив балгундешличи лайикъси адам къаршиикалли, хІела балгунси салам илис бирар, амма илгъуна адам хІейалли, хІуни илис бедибси саламра хІечи гІелабахІ чаркабирар. ⁷ ХІуша илдала лебсигъунси секІал букули, бужули, ил юртлизир каленая, сенкІун хІянчизарлис хІекъ бедни – чебла саби. ХІуша хъали-хъайгІи мадашудая. ⁸ Эгер хІуша чидил-биалра шагъарлизи дакІибхІели, хІуша илар хъурадаралли, хІушаб гибси секІалра букеная; ⁹ илдала изутира сагъбиреная ва илдази дикІеная: „Аллагъла Низам-зегъала дунъя хІушачи гъамбиубли саби!“ ¹⁰ Нагагъладан дякъунси шагъарлизир хъурахІерадалли, къакъала дурадухъи, бурая: ¹¹ „ХІушала шагъарлизир нушала къяшмачи чеакунти хясара далли пяхІкадарили хІушаб далтулра. Амма Аллагъла Низам-зегъала дунъя сабиули биънира хІушани хъуммартидаея“. ¹² ХІушази бурулра, баягьи БархІи сабаибхІели, ил шагъарлисичиб Содомлис кункли бирар. ¹³ Балагъуни хІед, Хоразин шагъар! Балагъуни хІед, Вифсаида шагъар! Нуни хІушази чедаахъибтигъунти итди гІяламатла анцІубукъуни Тирлизирра Сидоннизирра чедаахъибти диаллири, сиркънира чекагъурли, палдара чекъурли, илди жявлил Аллагълис мукІурбикІи. ¹⁴ Къиямала бархІи Тирлисра Сидоннисра хІушаблисичиб къулайли бирар. ¹⁵ ХІура, Капернаум, зубрачи ахъбурцури или гъанбиркулив? Юх, хІу жагъаннабла бухІна кабиахъури! ¹⁶ ХІушачи лехІилзан Набчи

лехІилзанра сай. ХІуша къабулхІейран, Ну къабулхІейранра сай. Ну къабулхІейруси Ну иша Вархъибсира къабулхІейран сай».

¹⁷ ГІсани бархъибти верхІцІану кІира мутагІялим шаддешли бицІили чарбиуб. ГІсачи дугъабизурли, илди бикІулри: «Арикар! Нушани ХІела у гъанбушили, буюрбарибхІели, илбисунира далли нушачи лехІихъули сари!» ¹⁸ ГІсани илдази иб: «Закибад лямцІван кабиркуси илбис Нунира чебаира! ¹⁹ Чебиулраягу, Нуни хІушаб чІичІлуми ва ГІякърабти къяшмачил ганздирахъесра, душманна лебил цІакъличир чедидиркахъесра хІушаб ари гира – хІушаб селра диргалара хІебулхъан. ²⁰ Амма жиндри лехІихъниличи разидеш мабиридаяну, зубрачир хІушала уми делкІниличи разидеш барая».

ГІсани Дудеш чевяхІирули сай

²¹ Илмадан Дурхъати РухІли ГІисара харидешли вицІахъиб ва Илини иб: «Дудеш, зубралара ванзалара арила ВегІ! ГІякълула бегІтазибадра духутазибадра дигІянбарибси секІал ХІуни ГІядатла адамтасра биштІати дурхІначи мешутасра дакІубарни багъандан ХІези шукруикІулра! ГІе, ХІела ГІяХІси къасра илгъуна сабри! ²² Дила Дудешли Наб гъар секІал гиб. Дудешли аХІи, Урши чи саял чилилра хІебала. Сай Уршинира ва Сай гъаргиубсинира аХІи, Дудеш чи саял хІебала». ²³ ГІур мутагІялимтачивяхІ шурухъи, ГІсани илдазицун иб: «ХІушани чедиути чунира чейути хІулби талихІчерти сари. ²⁴ Набчи дирхаирая, хІушани чедиути чедаэс дигути, амма чехІедаибти, ГІур, хІушани дикъути чулира дакъес дигути, амма хІедакъибти идбагунира пачнира бахъал саби».

УркІецІила вегІ самарияланничила бурала

²⁵ Илав ГІисала хІялумцІес дигуси ца Низамла гІялимли, айзурли, Илизи хъарбаиб: «МугІяллим, даимти гІямру къадардиахъес багъандан, нуни се барес гІягІниси?» ²⁶ ГІсани илизи иб: «Низамлизиб иличила се бурилив? ХІуни илаб бучІуси се саби?» ²⁷ Илини жаваб бедиб: «Ишаб белкІи саби: „УркІи-уркІилавад, лерил жанничилра лебил цІакъличилра, хІела лерил пикрумачилра таманни Аричи дигахъен, хІела Аллагъ сайси. ХІечи гъамсиличира хІечи хІуван дигичевли вирен“». ²⁸ ГІсани илизи иб: «ХІуни бархъли жаваб гири. Илкъяйда бирадли, хІед даимти гІямру дирар». ²⁹ Амма Низамла гІялимли, сунела кабизахъес дигули, ГІисази иб: «Дила гъамси чи сая?» ³⁰ ГІсани ишгъуна жаваб бедиб: «Ярусалимлизивад Ерихоннизиди аркъуси ца адам къачагъуна уциб. Илала палтарра керасили, витили, вебкІес ветикахъиб, лайвакІили арбьякъун. ³¹ Баягьи ил гъуникад аркъуси ца кашиш, ил адам

чеили хьалли, илис икъалабарес тІашалра хІейзурли, гьунила итил шайчи арякъун.
³² Левитлира дурусли ил бариб: вяхъибси адам чеили, ил цархІил дубкаб викили арякъун. ³³ Ил гьуникад аркъуси ца самарияланни, ил чеибхІели, ил язихъизур ³⁴ ва иличи гьамиубли, илала дяхъурби, гьаланачи ГІявадешлира чягъирлира дакили, дигьун, ГІур сунела эмхІечи мурдаватурли карбансарайлизи киб ва илаб иличи хІерудибариб.
³⁵ Гергъила бархІи, сай арукъяйчи, илини карбансарайла хужаимлис кІел динар дедили, илизи иб: „Ишичи хІерудибирен. Рахли харжлис гибти дахІедаалли, чариубхІели ГІуррара лугас“.
³⁶ ГІур ГІисани Низамла ГІялимлизи иб: «ХІела пикрили, къачагъунази викибсилис илди хІяблизивад чидил гьамлив?» ³⁷ Илини иб: «УркІеЦіла вегІ». ИлхІели ГІисани илизи иб: «Укъенну, хІунира илкъяйдали бирен».

Мариямра Марфара

³⁸ АрхІя даимбарили, ГІиса сунела мутаГІялимтачил ца шилизи вакІиб. Илав Ил Марфа бикІуси ца хьунул адамли хьуравариб.
³⁹ Илала Мариям бикІуси рузи лерри. Ил Аричила къяшмала гьала кариили, Илала гъайличи лехІихъулри. ⁴⁰ Сари Марфа биалли ГІяХІси беркала барили ГІяХІяйс къуллукъбарес къайгъилизир сарри. ГІисачи гьамриубли, илини иб: «Арикар! Дила рузини лерилра хІянчи набчицун хъардарниличи ХІу тамашаХІейрулрив? Илизи наб кумекбарахъес бурагу». ⁴¹ ГІисани илис жаваблис иб: «Агь, Марфа! Марфа! ХІу дахъал секІайчила къайгъназирри, ⁴² амма барес ГІягІниси ца секІал саби. Мариямли сунес ГІяХІси чеббикІили сари, илизибад ил чилилра кебра хІейсу».

Секъяйда улгуси?

11 Гъачам ГІисани чинабрил бируси балга таманбарибхІели, ца мутаГІялимли Илизи иб: «Арикар! Дулгахъес ХІуни нушара бурсидарабагу, ЯхІъяни сунела мутаГІялимти бурсибариливан».
² ГІисани илдази иб: «ДулгухІели, дикІеная: „Дудеш! ХІела Ура даимал дурхъали бираб! ХІела Низам-зегъала дунъяра сабааб! ³ Гъар бархІилис ГІягІниси къацІра ХІуни нушаб га; ⁴ Нушала бунагъуни ХІуни хасардати, нушаб вай бирутачирад нушара черкадурхулрану; нуша гьанагарсиличи хьулмадирахъаба, бунагъилизира мадиркахъаба“».

«Тиладибарая, ва хІушаб гили бирар»

⁵ ГІисани буруси даимбариб: «Мисаллис биабну, хІушазивадли цала юлдаш левли сай. Ил юлдашличи байдугила замана арякъи, хІу илизи тиладиулхъулри: „Юлдаш, хІуни чеблалис хІябал

къацІ диха. ⁶ Гъанна набчи архІяличивад юлдаш вакІили сай, илис кабихъес селра агара“. ⁷ ГъатІи илини, унзара аХІебхъили, хІед жаваб лугав: „Ну паргъатли ватаба! Унзара ГІекакІили, дурхІнира нура кайхъирану, гъанна айзурли, нуни хІед селра гес хІейрусра“.
⁸ Юлдаш виъни багъандан ил аХІейзесра ва къацІ хІегесра асубирар, амма хІуни къайгъибарадли, ил алзан ва хІед дигуси луга.
⁹ Нуни хІушази бурулра: Тиладибиреная, хІушаб луга, умцІеная, хІушани бургида, къутІдирхъеная, хІушаб ибхъу. ¹⁰ СенкІун гъарилра тиладиикІусилис саби лугуси, умцІусини саби бургуси, къутІдирхъусилис саби ибхъуси. ¹¹ ХІушазив левара сунези уршили бялихъ тиладибарибхІели, бялихъла мерлаб илис чІичІала бедес виэси, яра уршили гидгари тиладибарибхІели, илис ГІякъраб бедес виэси дудеш? ¹³ Эгер хІуша – ГІясикар адамтани хІушала дурхІнази ГІяХІси секІал ГІебасахъес балули диадалли, гъайгъайра, Сунези тиладибикІутас Дурхъяти РухІ дедес зубрачивси Дудешра ГІелаХІелзан».

Жиндла цІакъличилу яра Аллагъла къудратличилу?

¹⁴ Гъачам ГІисани адамлизибад жинд дураиб. Ил адам тилхъавирахъуси жинд сабри. Жинд дурабухъунхІели, тилхъавси гъайикІескъахІиб. Халкъ тамашакабиуб. ¹⁵ Илдазибад цацабехІти бикІулри: «Адамтазирад жиндри дурайахъес Итис цІакъ жиндрала талхъан Белзибулли бедибси саби». ¹⁶ ЦархІилти биалли, ГІисала хІялумцІес къасли, Илизибад зубрала ГІяламатла анцІбукъ тІалаббурулри. ¹⁷ ГІисани, илдала пикруми далули, иб: «Саби бухІнаб бутІибси пачалихъра агарбирар, цабалгундеш агарси хъалибаргра тІутІукабирар. ¹⁸ Эгер илбисра сунечи саби кІиуркІли биалли, илала пачалихъли секъяйда гъандуцеса? ХІуша биалли илбисуни адамтазирад дурайахъес Набзи цІакъ Белзибулли саби гибси или дикІулрая. ¹⁹ Эгер Нуни жиндрала талхъа цІакъличил жиндри дурайули виасли, хІушала агъули чила цІакъличил дурайулив? Илбагъандан хІушаб илди судъябилира биаб. ²⁰ Эгер Нуни Аллагъли гибси къудратличил жиндри дурайули виасли, илини Аллагъла Низам-зегъала дунъя бакІниличила бурули саби. ²¹ Эгер сунела юртлис цІакъси ва ярагъличилси адамли къараул бирули виалли, илхІели илала лебдешлис урехи хІебирар. ²² Аммаки иличи сунечив гъатІира цІакъси адам чевхъи, иличив чедиикалли, илхІели цІакъла вегІли ил увиубсилизирад лерилра сай хъарихъути ярагъра керису, сунес дигуливан илала лебдешлара вегІирар. ²³ Набчил аХІенси – Набчи къаршиси сай. Набчил дарх дурчХІедурчусира – ил хІяздан харждиран сай.

²⁴ Адамлизибад дурабухъунси жиндли, саби хъурабиэси мер баргес умцІули, чІянкІ авлахъ

къяйцібиру ва баргхѣбаргили, сунези саби бикІар:
„Гъари, дила гъалабла хъайгІи чаркабирус“.
²⁵ ЧарбиубхІели, сунела гъалабла мер бушкили,
ибгили баргили саби. ²⁶ ИлхІели арбякъи, илини
сунечир гъатІира вайти цархІилти верхІел жиндра
сабра бакІили, ил мерла хъуракабиуб. Ва илди
адамлизи кадиціур, илар дарх хІеркадирар, ил
адамлис гъалабичибра жапали бирар».

ИрхІилибти саби бикъанти ва къелгІеббикибти

²⁷ ГІисани илди гъай дурухІели, адамтазирадли ца
хъунул адамли ахъси тІамаличил Илизи иб:
«ТалихІчерси сари ХІу канилав халаваахъибси ва
ХІези михъири берхъахъибси!» ²⁸ ГІисани жаваб
бедиб: «ГъатІиралра талихІчебти саби чули
Аллагъла гъай дикъути ва илини бурибси бирути».

Юнна гІяламат

²⁹ ГІиса-алав гъачамичиб-гъачам бахъал халкъ
чалабиркулри. ГІисани илдачи дугъайзурли, иб:
«ХІябра вайбухъбиубси наслу бетаурли леб! Илисра
гІяламатла лишан гІягІинили балан, амма илдас Юн
идбагла гІяламат ахІенси, цархІил сегъуналра
гІяламат бирхІебирар. ³⁰ Ниневияла халкълис Юн
гІяламат ветаурливан, илкъяйдали гъаннала
наслулис Инсаниятла Уршира илгъуна лишанни
ветарар. ³¹ Югла шайчиб хІербирантала пача
(хъунул адам) Къиямала бархІи ишхІелла
наслуличи къаршили рирар ва илди гІяйиблабиру.
Ил Сулайба пасихІси гъайличи лехІахъес дунъяла
дубларад ракибси сарри. ХІушачил вархси
Сулайбайчив имціали чевяхІси сай! ³² Къиямала
бархІи Ниневияла халкъра, ишхІелла наслуличи
къаршили бирар ва илди гІяйиблабиру. Юнни
барибси вягІза бакъили, илди чула бунагъличи
пашманбиуб ва Аллагъличи дугъабизур. ХІушачил
вархси Юнничив имціали чевяхІси сай!

Чархла чирагъ

³³ Алкахъунси чирагъ чилилра дигІянси мерла
яра вакъла уди кахІебирхъуну, ила абиціутани
шала чебиэси къасиличи кабирхъу. ³⁴ ХІулби –
чархла чиргъми сари. Эгер хІулби ара-сагъли
диалли, лебил хІела чархра шалали биціибсиван
бирар. Эгер хІулби вайдиубли диалли, чархра
ціябли бирар. ³⁵ Вари, хІушала бухІнабси шала
ціябдешличи шурхІебухъахъес хІерудибарая!
³⁶ Илкъяйдаличил, эгер хІу шалали виціили виадли,
ва, хІезиб селра ціябсира агара биалли, хІу тяп
шалали ухуси чирагъли шалаварибсиван, хІела
лебил чархра шалали бирар».

³⁷ ГІисала гъай тамандиубмадан, ца фарисейли
Ил сунечи вахес живариб. ГІиса хъули аціб,
къумурла мякъла кайиб. ³⁸ Укес вехІихъайчи
ГІисани някъби хІедирцни чебаили, фарисей

дебали тамашаиуб. ³⁹ Амма Арикарли илизи иб:
«ХІера хІушани, фарисейтанира, хІушала
халдуртала чедилацун сабгу ицуси, амма
духІнарадли хІуша лерилра къиркъирдешлира
гъимикардешлира дицілра. ⁴⁰ Абдулти! Дурала
шали барибсини ахІену, гъатІи, бухІналара
барибси? ⁴¹ Къямларти ва халдарларти мискинтас
дедадалли – хІушала гъар секІал умукадирар!

Фарисейтас балагъ-къадар

⁴² Балагъ-къадар хІушаб, фарисейти! Шумерилара,
хъалталара, гъар журала духълумалара веціал
бутІала ца бутІа Аллагълис закатли лугухІели.
ХІушани илра бирули, Аллагъла дигиличилара
судличилара хъумхІертес гІягІинисире. ХІушани ца
бирухІели, итилра хъумхІертес чебсири.

⁴³ Киласуназир гъаларти мерани дуцесра,
майдайчи чукурбиубти халкъ хІушази
хІурматличил саламбикІахъесра дигахъни
багъандан, фарисейти, хІушачи балагъ-къадар
чевкъар. ⁴⁴ ХІушаб балагъ-къадар! ХІуша,
хІясибалра хІерили адатани ганзкадирути, ціелда
агарти хІябригъунти саррая».

⁴⁵ Илис жаваблис Низамла гІялимтазивад цали
ГІисази иб: «МугІяллим, илдигъунти гъайличил
ХІуни нушаб хІейгилзахъулригу». ⁴⁶ ГІисани
илдази иб: «ХІушабра балагъ-къадар, Низамла
гІялимти! ХІушани икъалалис ца тІулалра
вяшхІебарили, бихес хІейэсигъуна дех,
цархІилтаци хъаркабирулраю. ⁴⁷ ХІушабра
балагъ-къадар! ХІушани идбагунас ціелдуби
калтІулрая. Илди хІушала дудешхъалани сабгу
кабушибти! ⁴⁸ ХІушала дудешхъала баркъуди
гІеббурцули диъни хІушанира марбирулрая:
хІушала бегІтани идбагуни кабуршули буили саби,
хІушани биалли, идбагунас ціелдуби калтІулрая.
⁴⁹ Илбагъандан сабгу гъатІи, Аллагъла пасихІси
девлизиб бурибси: „Нуни итдачи идбагуни ва
вакилти бурхъис. Илдани цабехІ кабуршу,
цархІилти биалли дугІу. ⁵⁰ Илбагъандан иш дунъя
акІубхІейчирадли кертІибти лебилра идбагунала
хІила жавабкардешра иш наслуличир дирар:
⁵¹ Гъабилла хІиличирад дехІдихъили, Аллагъла
хъалила къурбанбарибси кабирхъуси дурхъаси
мерлара ургав Закария кавшибхІейчи бикайчи“.
Нуни хІушази бурулра: гъаннала къамлис лерилра
челлуми ахъес чевкъар. ⁵² ХІушабра балагъ-къадар,
Низамла гІялимти! Багъудила унзала умхъу касили,
я хІуша духІна ахІедаціили, я абаціес дигути
цархІилти абаціахъес хІебатни багъандан». ⁵³ ГІиса
арякъун. Илала гІергъи Низамла гІялимтира
фарисейтира Иличи гІясибиубли, дахъал хІисаб-
суалтачил Илис гІелабадкабирки. ⁵⁴ Илала
мухІлилабад сай гІяйиблаварес хъулчилибиэси
гъай дурабикайчи илди хІерлири.

ДигІянаси гьаргбиубли бирар

12 Азирти адамти чукурбикили, барцдешли цали-ца ганзкабирулри. Гіса гьаланачи Сунела мутагІялимтачи дугъайзур: «Фарисейтала хамирдайзирад, цархІилгІебли буралли, кІибхІяндешлизирад мяхІкамли диирая! ² Чеди дакІухІебиэси селра уббихъибсира лебси ахІен, гІур гІячихъхІебиэси селра дигІянасира лебси ахІен. ³ ХІушани цІябихІиб бурибсира берхІили шалалиуб бикъидая. ГІямзилаб хІушани шивкІивбарибсира, хъулчрачибад бакъаябушили балахъа.

Чизивад урухкІуси?

⁴ Дила юлдашуни, хІушази бурулра: чули чарх кабушес бирули, гьатІи селра барес хІебирутагІир урухмакІудая. ⁵ ХІуша чигІир урухкІес гІягІинитирал Нуни хІушази бурис: чарх кабушили гІергъи, ил жагъаннабла цІализи бархъесра вируси кьудратла ВегІлигІир урухкІеная. Ну марли викІулра, хІуша илигІир урухкІеная. ⁶ Шел чяка кІел къарапуллис ахІену гьатІи дирцути? Амма Аллагъли илдазибад цалра хъумхІерту. ⁷ ХІушала бургачирти лерил гъезра далли цацали дейгІунти сари. Лерилра чякналайчиб хІушала багъа дурхъасину, урухмайрудая!

⁸ Нуни хІушази бурулра, халкъла гьалав дакІу-гьаргли Ну чили къабулварасра, Аллагъла малаикунала гьалав Инсаниятла Уршили ил сайра къабулиру. ⁹ Адамтала гьалав Ну чили къабулхІерасра, Аллагъла малаикунала гьалав Инсаниятла Уршили сайра къабулхІейру.

¹⁰ Инсаниятла Уршиличила вайси бурибсиличивад чевверхес асубирар. Амма ЧеряхІти РухІ далтІусилис чевверхни хІебирар. ¹¹ ХІуша киласабази кили хала хІякимталара арила бегІталара гьала тІашдатурхІели, хІушала гъай кабизахъес се буришара или шишимайзира мадиркудая. ¹² СенкІун хІушани бурес гІягІиниси Дурхъати РухІли хІушаб гІеббуру».

Давлачевла мехІурдешличила бурала

¹³ Илабти халкъла кьукъялизивад цали Гіисази иб: «МугІяллим! Дудешла калунси мас набчил бутІахъес узиси бурагу». ¹⁴ Гіисани илизи иб: «Бура, гъари, ХІушаб суд барахъес яра хІушала гъай-мез бекІдирахъес Набчи чили хъарбарибси?» ¹⁵ ГІур лелтачилра дугъайзурли, Илини иб: «Вари, адамла гІямру, сунела гъар секІал имцІадухъарицад лерли диалра, давлала ахІенну белгидирути, тамяхІкардешлизирад хІуша мяхІкамли диирая». ¹⁶ Гіисани илдас ишгъуна буралара буриб: «Ца давлачев адамла хъуми гІяхІил дерхъили дакІили сари. ¹⁷ Ил сай ухІнав пикриухъун: „Нуни се барасли гІяхІисира? ДакІибти ризкъи какъеси

мералра агарагу“. ¹⁸ ва илхІели иб: „Гъари, дила ризкъи калкъути усурби дехъубли, урасили, лерил ризкъилисра цархІил маслисра даарицад сагати, халати дирис, ила лерилра кадирхъис. ¹⁹ Илала гІергъи набзи ну викІус: ‘гъанна хІела дахъал дусмас баари давлара лебну, укули, ужули лигІматлизир гІямру деркІа!’“ ²⁰ Амма илизи Аллагъли хъарбаиб: „Абдал! Ишдугил бакІили, хІела жан асалли, хІуни баргъибси мас чис биркура?“ ²¹ Аллагъличивли давлачевхІейрули, сунесцун давла бурчуси гъариллис ил бетарар».

«Къайгъназимадиркудая»

²² Гіисани сунела мутагІялимтази иб: «ХІера илбагъандан хІушази викІулра: жаннис беркайчилара, чархлис палтарличилара къайгъназимадиркудая. ²³ СенкІун беркайчир жанра, палтарличиб чархра имцІали мягІиничерти сари. ²⁴ ХІеръая цІудара къянбачи: илдани я делгІули ахІен, я иршули ахІен. Илда я хазнала хъулри, я усурби агара, амма Аллагъли илди далхули сай. Арцантачир хІуша сецадла дурхъатирал багъадалри! ²⁵ Сунела къайгъиличирли сунела гІямру ца сягІятлалра духъяндиахъес хІушазивадли чили вирара?! ²⁶ Эгер хІушани ил бегІлара биштІаси секІалалра барес хІедирули диадалли, цархІил секІлачила къайгънадиркъес селис гІягІиниси?

Лилия вавначи хІердизирая

²⁷ ХІеръая, гъари, лилия вавни секъяйда духъулил: илди я дузули ахІен, я чус палтар душули ахІен. Амма Нуни хІушази бурулра, сунела хабарла замана пача Сулайбанра валли, илдазибадди цалраван вегІиэс хІейуб. ²⁸ ИшбархІи лебси, жягІял пичлаб цІали игуси къар Аллагъли илкъяйда бегІбирули виалли, Илини хІуша, камли дирхаранти, гьатІиралра гІяхІил дегІдирура! ²⁹ Илкъяйда хІушара се букутирая, се дужутирая или умцІра мамцІудая ва къайгъилизимадиркудая, ³⁰ сенкІун иш дунъяличибти лебил аллагъагартала бекІлибиубсигъуна къайгъи тяп ил саби. Илди лерилра хІушаб гІягІинити диъни хІушала зубрачивси Дудешлира балуси сай.

«Аллагъла Низам-зегъала дунъя баргес умцІеная»

³¹ ХІуша Аллагъла Низам-зегъала дунъя баргес умцІеная, гІурилти лерилра хІушаб ИкІ Суненира луга. ³² УрухмакІуд, камси кьукъя! Дудешла къас – ХІушаб Низам-зегъала дунъя пешкешбарни саби. ³³ ХІушала лебдеш бицили, мискинтас кумекбиреная, удхІевдути тавруми тІалабдарая, зубрачив кахІеберхеси, сунечи хъулки гъамизэс хІейэси ва имсли хІебергеси давлара

цалабирхъеная. ³⁴ СенкІун давла лебихІиб сабну, хІушала уркІира бируси.

Дусмадусадая

³⁵ Мурталра таманни хІядурли – палтарла чебкад вайлиу ирира бигъи, чиргъмира адалкахъи – диреная. ³⁶ ХІуша, хужаим мекъличивад чариубли, къутІдяхъибмадан илис унза абхъес хІерти къаравашуни къяйда, хІядурли диреная. ³⁷ ТалихІчебти саби, хъайгІи чариубси чула хужаимли, хІянчилизилахъили баргибти къаравашуни. ХІушази бархъли бурулра, ил хужаимли, къаравашла палтарра чегъурли, къумурличи жибарили, илдас сунени къуллукъбиру. ³⁸ ТалихІчебти саби, чула хужаим мурт чариалра, дигалли байдуги, дигалли шаладиркухІели виаб, хІядурли тІашли баргибти къаравашуни. ³⁹ Багъурли диирая, нагагъладан сунечи хъулкни мурт лябкъянал юртла вегІли балалри, илини хъулки сунела юрт бигІяхъес хІелти. ⁴⁰ Инсаниятла Урши хІушаб гъаналра агарси замана сайну лявкъуси, хІушара хІядурли диирая».

⁴¹ Петрли Илизи хъарбаиб: «Арикар, ХІуни ил бурала нушабцун бурибсив яра лебтасалра бурибсив?» ⁴² ГІисани илис жаваб бедиб: «Сунела лебилра къаравашуначи хІеруди бирахъес ва заманаличиб илди берк-бержличил гІеббурцахъес юртла вегІли катурси халал буюрчи сегъуна вирара. ⁴³ ЧариубхІели хужаимли хІянчилизилахъили варгибси къаравашра талихІчевси сай. ⁴⁴ ХІушази бархъли бурулра, хужаимли илгъуна къаравашличи сунела лебил давла-хазналичи хІерудибарахъесра хъарбиру. ⁴⁵ Эгер ил къараваш сунези сай: „Дила хужаим жявли-декІар чархІейрар“ – викІули, цархІилти къаравашуни итули, укули ужули кепкайралли, ⁴⁶ гъаналра агарси замана ил къаравашла хужаим лявкъян, ил иту ва сунечи лехІхІейхъантаци бирхауди агарти адамтачи ватиу. ⁴⁷ Сунела хужаимла хІялра балули, иличи мутигІвакІес валалра хІелзуси халахар левгІев дебали танбихІлаиру. ⁴⁸ Амма халахарли сай витес лайикъси баркъуди хІебагъурли бирули виалли, илис танбихІ камси бирар. Сунес дахъал дедибсилизибад, тІалабра халаси бирар. Сунечи халаси бирхауди бихъибсилизибад халати жавабкардешра тІалабдиру.

Юртлизиб декІарбикни ва челябкълала суд

⁴⁹ Ну иш дунъяличи цІа хили сайра вакІибси ва ил жявли пархбухъи дигулла! ⁵⁰ Шизив визуливан, наб гІязабтазив вазес чеблира саби. Ил бетаайчи, ну дебали децІлизивра! ⁵¹ Ну иш дунъяличи даршудеш хили вакІибсира или гъанбиркулив? АхІенра, Ну вакІилра дунъяличи хІебалгундеш хили.

⁵² ИшхІейчибад, ца юртлаб шел леббиалли, илди декІарбиркур: хІябал кІиличи къаршили ва кІел хІябличи къаршили бирар. ⁵³ Дудеш уршиличи, урши дудешличи къаршили бирар. Неш рурсиличи, рурси нешличи къаршили бирар. Хъубеш неш сунела уршила хъунуйчи, ил биалли хъубеш нешличи къаршили бирар».

⁵⁴ ГІисани илди адамтазира иб: «ХІушани машрикълизиб дакІубиубси гъагул чебаибхІели, илмадан дикІулра: „БусягІят ургъесбирхІур“ ва илкъяйда бирар. ⁵⁵ Къиблала шайчибад дягІ бухъунхІели, дикІулра: „Дебали ванабирар“ ва илкъяйда бирар. ⁵⁶ КІибяхІянти! ХІушани ванзаличира зубрачира хІеръили, сегъуна аргъ бирарал бурес балули, гъанна сегъуна замана сабил бурес хІебалулра?»

⁵⁷ ХІушаб чидил гІяхІсил белгибарес сен хІейрутирая? ⁵⁸ Масала, хІела къаршикарра хІура судличи аркъухІели, ита детаайчи хІушани гъар секІайчила маслигІятбарес къайгъибарая. Ил хІебарадли, хІу илини судъячи арукили, илав туснакъкайрахъури. ⁵⁹ ХІези марли викІулра, бегІла гІергъисигъуна къарапулличи бикайчи хІечибси лебилра чебла ахІехъили лебалцадхІи, хІу итадли дурахІелхъад».

ГІяйибличи мукІурвакІи яра вебкІи

13 Ил замана Аллагъла хъули къурбаннис делгъестира кили бякъунти галилеяланти Пилатли кабушниличила ва илдала хІи къурбандарибти хІяйвантала хІилизи дархдикниличила ГІисази буриб. ² ГІисани илдас жаваблис иб: «Итди галилеялантас илгъуна биубхІели, илди лебилра цархІилти галилеялантачиб имцІякъ бунагъкарти сабри или рахли хІушаб гъанбиркулив? ³ Юх, ахІен викІулра, Ну хІушази! Амма мукІурра дакІили, гІямру дарсхІедарадалли, хІуша лерилра итди къяйда улхадая! ⁴ Яра итди, чучи Силоамла кІялгІя кабикили бебкІибтиван, хІушара Ярусалимла лебил халкъличиб итди гъатІиралра гІяйибкарти саби или дикІулрав? ⁵ АхІен викІулра Ну хІушази! Амма мукІурра дакІили, гІямру дарсхІедарадалли, хІуша лерилра итди къяйда улхадая!»

Инжирла галгаличила бурала

⁶ ГІур ГІисани ишгъуна бурала буриб: «Ца адамла тІутІила анхълаб инжирла галга лебли саби. Ил вакІили, иличир цІедеш даргес умцІули хъалли, цалра баргили ахІен. ⁷ ИлхІели илини анхъчизи иб: „ХІера, хІябал дус иша вашули, инжирла иш галгаличир цІедеш даргес умцІули хъалли, хІедаргира. Бяхъили убаса. Мерра бурцахъули се бируси?“ ⁸ Амма анхъчини иб: „Хужаим, ца гъатІи дус батигу. Нуни алавчар ванзара буркъили, декра

калкьас. ⁹ Белики, цїедеш гїур дусалра дакїес? Дакїїедакїалли, гїур бяхъишину“».

Гемсни дуцибси хьунул адам сут бархїи арарарни

¹⁰ Цагъачам сут бархїи Гїиса киласалав гїякълума угьулри. ¹¹ Илар рархъриэс хїериуси, кьакъуй хьунул адам лерри: илизи жинд хьурабиубли, изай руцили, вецїну гехїра дус риублири. ¹² Ил чераили, Гїисани ил Сунечи жирариб ва илизи иб: «Хїу хїела изайзирад сагъкариубли». ¹³ Гїисани иличи някъби чедуциб ва ил, рархъкариубли, Аллагълис дезарикїесряхїиб. ¹⁴ Ил сут бархїи сагърарни багъандан Гїисачи гьимукїибси киласала хала кашишли халкълочи дугъайзурли иб: «Хїянчи бирес чедаахъибти урегал бархїи сари. Сагъдирахъес хїуша сут бархїи ахїи, илди бурхїназир дашеная». ¹⁵ Амма Арикарли илис жаваб бедиб: «Кїибяхїянти! Хїушазивадли гьариллира сут бархїи ахїену гьатїи, тїенилизибад арзили, унц яра эмхїе шинни бахес бикуси? ¹⁶ Гьанна вецїну гехїра дус Илбисли руцибси ишис, Ибрагъимла рурсилис, сут бархїи сагъриэс пайдахїебирулив, гьатїи?»

Къаршикартала къабулагардеш

¹⁷ Гїисала илди гъайли лебилра Илала къаршикарти урузбахъуб, лебил халкъ биалли, Илини дирути гїяжаибдешунани разибариб.

Гьела кьакълочила ва хамирдайчила бурала

¹⁸ Гїур Гїисани, илдачи дугъайзурли, иб: «Аллагъла Низам-зегъала дунъя селичил цугбуцес вирара? Нуни ил селичил цугбуциша? ¹⁹ Гьари, хїера, адамли, касили гьела кьакъ, сунела хъучи бегїи сай. Ил чебакїили, халабаили галгацад баибхїели, илала кьялубачир арцанта пукънира далли дарили сари».

²⁰ Гїисани гъай даимдарили, иб: «Аллагъла Низам-зегъала дунъя Нуни селичил цугбуциша? ²¹ Гьари, хїера: кьацї берцїес багъандан хьунул адамли касили хїябал умцла декълиси хамирданра кабихъили башунси лебил башни чеахъбиуб».

Кьакъати кьапу гїекїибхїели

²² Ярусалимлизи гьуни буцили, шагъуртазира шимазира виули, Гїиса халкълиси гїякълума угьулри. ²³ Ца адамли, Иличи дугъайзурли, иб: «Арикар, камтасцун берцес биркни марсив?»

²⁴ Гїисани илизи иб: «Кьакъати унзаларад духїна адацїес кьайгъибарая, амма, дирхаирая, илад абацїес бахъал балбизурли хьалли, бирхїебирар. ²⁵ Хъа вегїли айзурли унза гїекалалли, хїуша дурар кавладая ва, унзализи кьутїдикїули, дикїудая: „Хужаим, нушаб абхъагу!“ Илини хїушази иру: „Нуни хїуша чинарад дакїибти чихъали сарралра

хїедаларая“. ²⁶ Илхїели хїуша Илизи дикїудая: „Нуша Хїечил дарх дукулира-дужулира калунрагу, Хїу нушази гїякълумара угъади“. ²⁷ Амма илини жаваб луга: „Хїушази бурулрагу, Нуни хїуша чинарад дакїибти, чихъали сарралра хїедаларая. Вайдеш биранти лерилра набчирадли ардукъеная!“ ²⁸ Аллагъла Низам-зегъала дунъялизиб хїушани Ибрагъимра, Гїисакъра, Якьубра, цархїилти идбагунира чебаибхїели, дисидирудая ва цулба кьяржардикїудая, сепайда иларад хїуша дугїаили дирудая! ²⁹ Магърибла ва машрикъла, хъанила ва кьиблала шайчибад бакїибти Аллагъла Низам-зегъала дунъялизиб лигїматла кьумурла мякълаб цалабиркур. ³⁰ Бегїлара гїелабтили сабти, илди цаибтили бирар. Саби цаибтили сабти биалли, илди бегїлара гїергъитили бирар».

Гьирадлис Гїисала жаваб

³¹ Гїисачи ца-чумал фарисей бакїили, Илизи иб: «Хїед ишадли арукъес гїягїнибиркур. Гьирадлис Хїу кавшес дигули сай». ³² Гїисани илдази иб: «Дукъеная, ит гурдази бурая: „ишбархїира жягїялра жиндри гьадирхъули Ну узус, хїябэсил бархїи Дила хїянчи таманбирис“. ³³ Ишбархїира, жягїялра, гїергъила бархїира Нуни Дила архїя даимбарес гїягїнибиркур, сенкїун идбаг Ярусалимлизив ахїи, цархїиллав кавшили виэс бируси анцїбукъ ахїен.

Ярусалим! Ярусалим!

³⁴ Агъ, Ярусалим! Идбагунира кабуршуси, хїечи бархъибтира къаркъуба итули кабуркїуси, Ярусалим! Гїяргїянира сунела жибхїни дуклумау дурчуливан, хїела дурхїни бучес Нуни чуйнара кьасбарили хьалли, хїу къабулхїебекири! ³⁵ Хїера гьанна хїела юрт бацкабухъи саби! Нуни хїушази бурулра: „Арикар багъандан Лявкъуси Аллагъли мубаракварибси сай!“ – или дикїуси замана сабаайчи, хїушани Ну чехїейура!»

Сут бархїи инсанти сагъбирни

14 Цагъачам сут бархїи Гїиса фарисейтала бегїлара халалгъуна хїякимтазивад цаличи хїерикунничи вакїиб. Илини се бирул или адамти хїербикїулри. ² Гїисачи дяхї-дяхїли кайили, шиндикили зягїипси адам леври. ³ Низамла гїялимтачира фарисейтачира дугъайзурли, Гїисани хьарбаиб: «Сут бархїи сагъбирес асубирусив?» ⁴ Илдани жаваб хїегиб. Гїисани, зягїипсичи гачикили, ил сагъвариб. Илдази биалли иб: «Нагагъладан хїушазивад чила-биалра урши яра унц сут бархїи къуюла бухїнакабикалли, хїушани илмадан ил дурахїейсидав гьатїи?» ⁶ Илдани Гїисала ил суаллисра жаваб гес хїебиуб.

Цаибти мерани чердикіни

⁷ Жибарибтани гІяхіти мерани даргес къайгъилизиб биъни чебаили, Гісани илдас ца бурала буриб: ⁸ «Хіу мекъличи живарибхІели, хіу бегІлара хІурматла мерличи камайруд, сенкІун цархІил, хІечивра хІурматчевси адам живарили виэс асубиар. ⁹ Хіура итра сунечи жидарибси хужаимли хІези иру: „ХІела мерличи иш кайахъа, гъари“. ИлхІели хІед бегІлара вайсигъуна мерличи кайэс чевкъар. ¹⁰ ЖиварибхІели, хіу арякъи бегІла гІелабси мерличи кайи. ИлхІели хіу живарибсини, вакІили хІези викІар: „Юлдаш, хіу иша, ахъихІи кайи!“ ИлхІели цархІилтала гъалаб хІела хІурмат ахъбиар. ¹¹ СенкІун сунени сай чевяхІируси увяхІварили виар, сунени сай увяхІируси чевяхІварили виар». ¹² Сай живарибси фарисейлизи Гісани иб: «Савли яра хІерейс букахъес гІяхІли жибирухІели, я юлдашуни, я узби, я тухумти, я давлачебти унруби жимабирид, сенкІун илдани хіура живарили, хіуша лебтанилра чебла чебкайхъидая. ¹³ ГІяхІли хурегличичи жибирухІели, мискинтира, чулахъунира, балкІабира, сукъуртира жибирен. ¹⁴ ХІера, илхІели хіу харили виэс вируд: сенкІун илдани хІела гъалаб чула ламус бекІлил ахъес хІебиар ва илбагъандан хІялалси бекІала агълу мицірбирухІели, хІед керира биур».

¹⁵ Илди гъай дакъили, гІяхІлазивад цали Гісази иб: «ТалихІкар сай Аллагъла Низам-зегъала дунъялизиб сунес укесра ужесра къадарбиубси адам!»

Халаси беркайчи жибарни ва жибарибти хІебакіни

¹⁶ Гісани илис жаваблис ца бурала буриб: «Ца адамли сяхІбат барес къасбарили, бахъал гІяхІли жибарили сай. ¹⁷ Къумурла мякъла кабиэс замана баибхІели, „Гъар секІал жявилл хІядурлину, даширая“ – или, жибарибтази бурахъес сунела къараваш вархъили сай. ¹⁸ Лебилра гІяхІли вягІдалабиубтиван, „ГІяйиб мабиридая, имкан агара“ – или, бикІесбяхІиб. Цаибилли иб: „Нуни хъу асили, ил чебаэс хІякъи гІямал хІебирарну, чевверхи“. ¹⁹ КІибилли иб: „Нуни шел унц асили, илди пайдалати сарил ахтардидарес гІягІнилину, набчи гІяйиб мабирид“. ²⁰ ХІябэсиллира иб: „Дила мекъ сабину, ну вакІес хІейрус“. ²¹ Къаравашли чариубли вакІили, иличила буриб. ИлхІели гІясивиубси хужаимли сунела къаравашлизи буюрбариб: „Укъенну, шагъарла лерил къакъурбази алавиубли, иша лебил садакъачибера, чулахъунира, сукъуртира бучили ка“. ²² Къаравашли илизи иб: „Хужаим, хІуни хъарбарибси нуни барира, амма акъути мерани гІуррара лерал“. ²³ ИлхІели хужаимли

къаравашлизи иб: „Гъундурачибтира къакъурбазибтира бучили, леблизилра бакІахъес гІяхІил тиладибара. Наб гІяхІлани хъали биціахъес дигулра“. ²⁴ Хіушази бурулра: Жибарили хІебакІибтазивад цалра гІур дила къумурла мякъла кахІейрар!»

Гісас гІелавад арукънила багъа

²⁵ Гісачил барх башути бахъал адамти лебри. Илини гІелавяхІ ласяхъили, илдази иб: ²⁶ «Набчи вашуси, ил сунела дудешличира, нешличира, хъунуйчира, дурхІначира, узбачира, рузбачира, сунела гІямруличираван ахІи, Набчи имціали дигичевсили хІейалли, ил Дила мутагІялимли виэс вирхІейрар. ²⁷ Чедуркъибтира чекахІейсуси, Наб гІелавадра хІешуси, илра Дила мутагІялимли виэс вирхІейрар. ²⁸ Эгер хІушазивад чили-биалра кІялгІя белшес къасбаралли, илини, гъар секІал къелгІердушес сунес сецад арц гІягІнидиркурал багъес багъандан, гъаланачи кайили, сунени дарес гІягІнити лерил харжани хІясибхІейрув, гъатИи? ²⁹ Рахли илини илра хІебарили, хъулчи белшалли, илини сунела кІялгІя хъараахъес хІейрар. ГІур, илала баркъудиличиб лебилра дукаркабирхІур ³⁰ ва илис гІелабадли бикІар: „Лшес вехІихъили, бируси таманбарес хІейубси адам ит сай!“ ³¹ ЦархІил пачачи къаршили дяви бехІибхъес къасбарибси пачанира, гъаланачи сунечи къаршиси гъал азирла гІяскарличил, сунела лебси веціал азирла гІяскар дявлизахъес бирарал хІясиббарес гІягІнибиркур. ³² Рахли хІебиралли, даршудеш тиладибарахъес вакилти бурхъу. ³³ Илкъяйда хІушара: эгер хІушала лебдешлизирад духъес хІейрадалли, хІуша Дила мутагІялимтили диэсра хІейрудая.

³⁴ Зе – гІяхІти секІал сари, амма зелизибад зукъидеш бегъалли, зе селис багаладирара? ³⁵ Илди я ванза, я гъягъя гІявадаресалра какъес хІейрар, касили лайдакІалли ахІенси! Бакъес лихІби лерсини бакъаб!»

Бетахъибси мазачила бурала

15 Гісачи лехІбизес цагъачам бахъал хІекъ бурчантира цархІилти бунагъкар агълура бакІиб. ² Фарисейтира Низамла гІялимтира, дебали гІясибиубли, бикІулри: «Итини бунагъкарти къабулбирули, илдачил варх укесра кайрули сай!» ³ ГІур Гісани илдас ца бурала буриб: ⁴ «Масала, даршал маза лерси хІушазивадли цала, ца чебкабалкІи бетяхъили саби. Ил сунела гІелар калунти урчІемціанну урчІемра мазара авлахъличир датурли, илигІив умціес архІякъяну, гъатИи? ⁵ БаргибхІели разииубли, ил сунела хъуцірумачи гІелакахъили хъайгІи вакІили, юлдашунира унрубира бучили, илдази хІебурув:

„Бетахъибси дила маза баргирану, набчил дарх хІушара разидиирая!“⁷ Бархъли бурулра, илкъяйда зубрачибра ца бунагъуни тавбадарибсиличи имцІали харидеш биру, тавбадарес хІяжатдеш агарти урчІемцІанну урчІемра ГІябидличиван ахІи.

Бетахъибси арцличила бурала

⁸ Яра сунела вецІал къуруш лерли, ца бетахъалли, хъунул адам алкахъи чирагъра, хъалира лерил ГІямзурбира душкили, ил баргес умцІхІемцІару, гъатИи? ⁹ Ил баргибхІели, сунела юлдашунира унраличибти хъунул адамтира цалабяхъили, илдази хІебурув: „Бетахъибси къуруш нуни баргилрану, набчил дарх разидиирая“.

¹⁰ Дирхаирая, бунагъуни тавбадарибси ца бунагъкар багъандан Аллагъла малаикуна илгъуна разидеш биру».

ЧеввалкІунси уршиличилара, илала узиличилара, илдала дудешличилара бурала

¹¹ ГІисани, гъай даимдарили, иб: «Ца адамла кІел урши лебри. ¹² Дудешлизи виштІалгъунани иб: „Наб биркуси секІал га“. Илини лебдеш кІелра уршилис бутІиб. ¹³ Ца-кІел бархІила ГІергъи виштІал урши, гъар секІалра дицили, арцра ардухили цархІил улкализи арякъи сай. Илав саяхъ ГІямрулизи ахъили, ил лебилра лебдешлизивад ухъун. ¹⁴ Илини гъар секІал харждарили тамандиубхІели, ил улкализир цІакъти гаши дехІдихъили, илис дахъал агрими къяраэсра чебуркъуб. ¹⁵ Ил арякъи, илав хІерируси минала ца адамличив узесвяхІиб. Илини ил цурми дихІяхъес авлахълици вархъиб. ¹⁶ Сунес беркеси хІелугни багъандан, ил цурми далхути секІли дукесра валли хІядурлири. ¹⁷ БегІла ГІергъира, ил пикриухъун: „Дила дудешличиб бузути бахъал адамтас белкъра белкъи имцІара бухъеси беркала камхІебири, ну биалли ишав гаша убкІулра. ¹⁸ Арякъи дудешлизи бурис: ‘Ну зубралара хІелара гъалав ГІяйибла вегІ сайра. ¹⁹ Илбагъандан ну хІела урши сайра или викІес набзиб ихтияр агара, ну хІечив узахъесалра пурбанбара“’. ²⁰ Илмаданал ил сунела дудешличи арякъун. Ил гъарахъли левалли чеили, дудешла дебали уркІецидухъун ва дуцІли ветаили, хъябрусра викили, уршиличи байикун. ²¹ Уршили илизи иб: „Дудеш! Ну зубралара хІелара гъалав ГІяйибла вегІ сайра. Илбагъандан ну хІела урши сайра или викІес набзиб ихтияр агара“. ²² Дудешли сунела къаравашунази иб: „Къалабали дукъенаяну, дегІлара ГІяхІти палтар хили, илизи чегъахъая. Илала тІуйс тІулекара, къяшмас дабрумира хая. ²³ Кили цІерхъси къачара белгъеная; кадиили, шадлихъ бирехІе. ²⁴ СенкІун дила иш урши вебкІилри – мицІиркайуб, ветяхъилри – дакІуиуб“. Илдани сяхІбат бариб.

²⁵ Халалгъуна урши ил замана авлахъличив сайри. ХъайгІи чарируси халалгъуна уршили далуталара делхълара агурби дакъиб. ²⁶ Чула къаравашуназивад цализи хъарбаиб: „Се бетаурлив?“ ²⁷ Илини иб: „ХІела узи хъайгІи чариуб. Ит ара-сагъли чаритънила хІурматлис хІела дудешли цІерхъси къачара белгъахъун“. ²⁸ Ил гъимукІиб ва хъайгІира валли ахІецислибариб. Дуравхъунси дудешли илизи хъайгІи ацІахъес тиладибариб. ²⁹ Амма илини дудешлис жаваб бедиб: „Ну хІед лагъ къяйда узули, чум дус ардякъи диалра, нуни хІед ца гъайалра ГІелабяхІ чархІебатурра. Амма юлдашуначил барх шадлихъ барахъес хІуни наб ца ГІежалра гес лайикъхІебарири. ³⁰ ХІела лебил масра шаддикъ хъунрачил бергунси хІела урши вакІибхІели, цІерхъси къача ит уршилис белгъахъунри!“ ³¹ Дудешли илизи иб: „Дила урши! ХІу мурталра набчил варх сайри, дила лебдешра хІела саби. ³² Ит, хІела вебкІибси узи мицІиркайубли вакІниличи хІуни харидеш барес ГІягІнисири“».

Марли ахІенси буюрчичила бурала

16 ГІисани сунела мутагІялимтази ишгъуна гъатИи бурала буриб: «Ца давлачевси адамла левли сай сунела хІянчизартас бекІдеш дирахъес катурси буюрчи. Хужаимлизи багъахъурли саби, сунела буюрчили лебдеш пулкІуцІибурули или. ² Хужаимли ил тІалабварили, иб: „ХІечила набчи дашути се хабурти сари? ХІуни барибси хІянчила баянти ха. ГъатИи хІу буюрчили визс хІейруд“. ³ Илди гъайла ГІергъи буюрчили, пикриухъи, сунези сунени иб: „Нуни се баришара? Хужаимли ну хІянчилавад дуракайулрагу. Ванза укъес гъанна дила цІакъ агара, садакъалигІив вашесра – цІахли саби... ⁴ Се барес ГІягІнисил нуни балас! Ну хІянчилизиवाद ухъунхІели, чили-биалра сунечи хъайгІи арукишагу“. ⁵ ГІур илини хужаимлис чеблалиубти адамти цалис ГІергъи ца жибиресвяхІиб. Цаибиллизи хъарбаиб: „ХІечибси дила хужаимла сецадла чебла сабри?“ ⁶ Илини жаваб чарбатур: „Зайтун ГІявадешла даршал чармала“. Буюрчили илизи иб: „Ма хІела чеблала кагъар, къалабали кайили, ‘ШуцІали’ – или, белкІен“. ⁷ ГІур цархІиллизира хъарбаиб: „ХІечибси чебла сецадла саби?“ Илини иб: „АнкІила даршал гавлаг“. Илизира иб: „Ма иш чеблала кагъар, ‘ГехІцІали’ – или, белкІен“. ⁸ Сунела хІиллакар буюрчи хужаимлира валли гапвариб, хІилла уstadешличил барни багъандан. Марлира, гъаннала адамти, иман бухибтиван ахІи, цархІилтачилси чула бархбаслизиб имцІали сакІубти саби. ⁹ Нуни хІушази бурулра: иш дунъяличиб хІушаб гибсиличирли пайдаладиреная, гъалмагъуни имцІабиахъес

багъандан. Ишабси лебдешлизирад духъунси сягІят даимси хъули хъурадирура. ¹⁰ Камси секІайзив марси, ил халасилизивра марли вирар. Камсилизив хІялалагарси халасилизивра хІялалли хІейрар. ¹¹ Эгер хІуша дунъяла давла бихІяхъес игъдибарбихъес лайикъли хІейадалли, хІекъси секІал бихІяхъес хІушачи чили игъдибар бирхъув? ¹² Нагагъладан цархІилла мас бихІяхъес хІушачи игъдибарбихъес асухІебирули гІергъи, хІушаб хІуша дегІси-декІар чили лугав? ¹³ Ца къаравашра цагъакІли кІел хужаимлис къуллукъли кайзес хІейрар: цаличи ил дигичевли вирар, цархІил биалли дигхІейгахъу; цалис марли вирар, цархІиллис биалли багиагарли вирар. ХІушанира кІилис – Аллагълисра арцлисра къуллукъбирес хІейрудая!»

¹⁴ Арц дебали диганти фарисейти, ГІисала илди гъай дакъили, Иличиб дукарбяхІиб. ¹⁵ ГІисани илдази иб: «Халкъла гъалар хІушани хІялалталадирули хъалли, Аллагъли хІушала уркІбала хІял бала. Адамтани бегІлара къиматласилизи буйгІуси, ил Аллагълис бегІлара хІейгуси секІал саби. ¹⁶ ЯхІгъя вакІес гъалабал Низамра лебсири, идбагунира бирутири. Илис гІергъи сабри Аллагъла Низам-зегъала дунъяличила хабар бурес ва лебтазилра ила абацІес къайгъибиряхъес гІеббугъес бехІбихъибти. ¹⁷ Мусни-зубри пяхІли дуаллира, Низамлизиб хІярпла бутІалра бетхІейхъур.

Мурул-хъунул декІарбиркниличила

¹⁸ Сунела хъунуызивад декІарикили, цархІил карируси, ил сунела хъалибарглис мардеш булъан сай. Муруйзирад декІаррикибсилочи хъайчикайрусира хъалибарглис мардеш булъан сай.

Давлачевличила ва мискин Лазарличила бурала

¹⁹ Муртрил давлачев адам леври. Ил пачналагъуна палтарра челгъули, даимси байрамличив къяйда хІеркайрулри. ²⁰ Левил дяхъурбани уцибси, сунес Лазар бикІуси ца садакъачира леври. Ил давлала вегІла къапула гъалав кайхъири. ²¹ Къумурличир калунти къацІла кесекуни лайдакІибхІели, сунес дикахъес хІерлири. ДуцІли дакІили хурани илала дяхъурбира ижулри. ²² ХІера, ил садакъачи вебкІиб. Малаикунани ил заки, Ибрагъимла мякъла арухиб. Давлала вегІра вебкІибхІели арухили хІяриихъиб. ²³ Жагъаннаблизив, цІакъти гІязабтазивси илини хІеръибхІели, гъарахъихІиб Ибрагъимра илала мякълав Лазарра чебаиб. ²⁴ Ибрагъимличи дугъайзурли, илини вявъиб: „Ибрагъим-дудеш! Набчира уркІецибарагу. ЦІала иш гІязаблизив дебали инжитлирану, шинни бемхІехъурси тІуйчил

дила лезми шинкІабарахъесалра набчи Лазар вархъагу!“ ²⁵ Амма Ибрагъимли илизи иб: „ХІуни, дила урши, гъандикахъа гъари, гІямрулизир хІед гІяхІдешуницун дирухІели, Лазарлис – лерилра вайдешуни къадар диъни. Гъанна иш ишав лигІматлизив сай, хІу – гІязабтазив сайри. ²⁶ Илала дурабад, чи-биалра ишадли хІушачи ветяхъухъес къасбаралли, ил барес виъхІейэси, хІушара нушара декІардируси, лутІи агарси хандакъ леб“. ²⁷ ИлхІели давлала вегІли иб: „ХІебиалли, дудеш, хІези тилади саби, хІуни Лазар дила дудешличи хъайгІи вархъа. ²⁸ Итаб дила шел узи тебтину, илдира иш гІязабтала мерличи хІебикахъес къайгъибарая или чІумали бураб“. ²⁹ Ибрагъимли илизи иб: „Итдала Мусара цархІилти идбагунира тебтину, илдани чузи дурутачи лехІбилзаб“. ³⁰ Давлала вегІли илизи иб: „Юх, Ибрагъим-дудеш, бекІибтазивад ца чи-биалра укъялри, илди чула бунагъуначи мукІурбикІи“. ³¹ Ибрагъимли иб: „Эгер Мусачи ва идбагуначи итди лехІхІебилзули биалли, бекІибихІибад мицІирбиубтачира бирххІерар“».

Бунагъличила, вирхниличила ва чеблалличила

17 ГІисани Сунела мутагІялимтази иб: «Инсан бунагъличи гъуцІирути дахъал секІал лер. Амма сай цархІилла бунагъла сабабчи сайсилис халаси балагъ гІеббиур! ² Илди гІядатла адамтазивадра биштІалтазивадра цализи сунени бунагъ барахъниличиб, хъябличи шинкъала урхамра чекахъили, урхънази лайвакІни гъалаб сабри. ³ Вари, мяхІкамли диарая! Эгер хІела узи хатІаикалли, илизи уркъубяхъя, мукІурвакІалли, чевкерхи. ⁴ Ил хІечил жаляхъили, ца бархІи верхІна хатІара икили, гІур шурухъи верхІна „гІяйибмабирид“ алли, иличивад чевкерхи». ⁵ Арикарлизи вакилтани иб: «Нушала дирхни имцІабиахъа!» ⁶ Арикарли илдази иб: «Эгер хІушазиб гъела къякъцадалра дирхни леббиалли, хІушани ит инжирла галгализи „хІячмира айтІенну, хІу урхъулизи убатурли багъарбии“ адалра, ил хІушала гъайличи мутІигІибикІур. ⁷ Масала, хІушала хъу балцуси яра дуки вашуси ца къараваш левли сай. Гъари бура, ургубалавад чариубхІели, хІуни илизи ириду: „Къалабали вашину къумурла мякъла кайи!“ ⁸ ХІуни или хІейридну, гъаланачи илизи ирид: „Укъенну хІядурбарили, иша наб беркала ха, ну укухІели къуллукъбара, гІур вякъи, хІура укен“. ⁹ Сунечи хъарси барибси къаравашлис баркалла икІару? ¹⁰ Илкъяйда хІушара: хІушачи хъарти дарибхІели, дикІеная: „Нуша гІядатла къаравашуни сарра. Лерилра нушани дарибтира, илди нушачи хъарти секІал сарри“».

Гіяхібаркъ балуси къявгала изайзивси самариялан ва Гіяхібаркъ хІебалути урчІемал

¹¹ Гіса Самариялара Галилеялара ургабси дазукад ватихъили, Ярусалимлизи вяхІуб.
¹² Гъачам ца шила дубла ветаибхІели, Илис къявгала изай буцибти веціал адам къаршибикиб.
¹³ Гъарахъ-гъарахъли тІашбизурли, илди ахъли вевбикІули, тиладибухъун: «Гіса, Ахърила ВеГІ, нушачи уркІецібарагу!»
¹⁴ Илди чебаили, Гісани иб: «Кашишуначи дукъеная, хІушачи итдани хІеркайруну». Илди гъуникад аркъуйхІиб сагъкабиуб.
¹⁵ Илдазивадли ца, сай сагъкайтни чебаили, ахъси тІамаличил Аллагъ чевяхІурули, ГілавяхІ чариуб
¹⁶ ва Гісала гъала ветаили, къукъмусра викили, Илис баркаллаикІесвяхІиб. Ил Самариялизивадси адам сайри.
¹⁷ ИлхІели Гісани илизи иб: «Изайзибад умубиубти веціал ахІенрив, гъатИи? ЦархІилти урчІемал чинаба?»
¹⁸ Аллагълис баркаллала деза барес, цархІил миллатлан иш ца адам ахІи, цархІил чилра вакІхІекІибу?»
¹⁹ Гісани илизи иб: «Айзину, арукъен. Вирхнили сайри хІу верцахъибси».

«Аллагъла Низам-зегъала дунъя мурт бирусив?»

²⁰ Фарисейтани цагъачам Гісази хъарбаиб: «Аллагъла Низам-зегъала дунъя мурт бирусив?» Илини иб: «Аллагъла Низам-зегъала дунъя хІулбани чебаэсли лябкъуси ахІен.
²¹ Я чилилра хІейру: „ХІердикІеная, иш Аллагъла Низам-зегъала дунъя бакІили леб!“ яра „ХІера ит!“ СенкІун Аллагъла Низам-зегъала дунъя гъанналаубал хІушала ургаб саби».
²² Сунела мутагІялимтази биалли Гісани иб: «Инсаниятла Урши чеваэсси ца бархІилра бакІахъес хІуша иштяхІдиубси замана лябкъян. Амма хІушани Ил чехІейидая.
²³ ХІушази адамти бикІар: „ХІера итав!“ яра „ХІера ишав!“ БекІлил къалабамадикІудая ва Гіеларад дуцімадикІудая.
²⁴ Сай чариубси бархІи Инсаниятла Урши лебилра зак ца дублабад цархІил дубла бикайчи пархбухъи шалабируси лямцігъунсили виар!
²⁵ Амма Илис гъаланачи дахъал къияндешунира, гъаннала наслула адамтани сай хІейгиварнира дяхІяэс чевкъар.
²⁶ НухІ идбагла замана диубти Инсаниятла Уршила заманара дирар.
²⁷ НухІ идбаг гамилчи ацібси бархІи сабаэс гъалабра адамти букулира, бужулира, хъунрира кабирули, шерира башули калунти саби. Гур шин чедидерхурли, гъар секІал гъаркъакарбти сари.
²⁸ Тяп илкъяйда Лотла заманара биубси саби: адамти букулира, бужулира, дирцу-исулира, делгІулира, лушулира калунти саби.
²⁹ Амма Содомлизивад Лот дуравхъунси бархІи зубразирад ціалара алтІлара заб дарили, илди

лебилра къирбариб.
³⁰ Илгъуна секІал бетарар Инсаниятла Урши дакІуиубси бархІира!
³¹ Сай ил бархІи хъалчличив къаршиикили, сунела ваяхІ хъулир калунси адам, илди касес уди камаціаб!
Сай дурав къаршиикибси адамра ГілавяхІ чармайаб.
³² Лотла хъунуйчилара хъуммартидая!
³³ Сунела жан дерцахъес къайгъилизисси, ил сунела жаннизивад улхъан, илизивад ухъунсини – даимти Гіямрура дургу.
³⁴ Нуни хІушази бархъли бурулра, ил дуги ца ухъалаб кІел бирар: ца арку, цархІил валта;
³⁵ Ца шинкъалар ризкъи лукъути кІел хъунул адам бирар. Илдазирадли ца арку, цархІил ралта. [³⁶ Хъучиб кІел бирар. Илдазивад ца арку, цархІил кавлан]».
³⁷ Илизи мутагІялимтани хъарбаиб: «Арикар, лерилра илди секІал чинар детарутив?» Гісани жаваб бедиб: «Алхунси лебихІир чІакни чукурдирар».

Бунагъкар судъяличила бурала

18 Гісани мутагІялимтази, саби мурталра Аллагълис булгес ва бекІиллра умутагархІебирес ГіягІнили биъни аргъахъес багъандан, ишгъуна бурала буриб: ² «Ца шагъарлизив я АллагълигІив уруххІекІуси, я адамтазибад ціаххІебилзуси судъя леври.
³ Ил шагъарлизир мурталра ил судъячи рашули, илизи „Бархъдеш кабизахъес наб икъалабарили, дила ГІярза бекІличибушагу“ – или, тиладирикІуси ца гамъа хъунул адамра лерри.
⁴ Ил вахъхІи къабулхІеркулира кали, ГІур сунези сунени иб: „Ну я АллагълигІив уруххІекІули, я халкъла гъалаб ціаххІебилзули виасра,
⁵ ит хъунул адам наб ретІили сари. Гъари, набчи ГІур хІерашахъес ва инжитхІейэс багъандан, итала мурад бирус“».
⁶ Арикарли илдачи дугъайзурли, иб: «Ит хІярамзада судъя сейкІулил хІушани бикъулраяв?
⁷ Марлира, Сунени чеббикІибти ва дугелира хІерелира Сунес булгути адамтас Аллагъ икъала хІейэсара? Илини итдас Сунела кумек къанхІебирахъугу, гъатИи?»
⁸ Нуни хІушази бурулра, Илала хІукму къалабасили ва бархъсили бирар. Амма Сай вакІибхІели, Инсаниятла Уршили ванзаличир бирхни баргесара?»

Фарисейла ва хІекъ бурчанна балга

⁹ Чули саби бунагъагартаси халбирутас ва цархІилти лебтачилра гъимикартас Гісани ишгъуна гъатИи буралара буриб: ¹⁰ «Балга барес Аллагъла хъули кІел адам бакІиб: ца – фарисей, цархІил – хІекъ бурчан.
¹¹ Фарисей тІашкайзурли, сунези сай ишкъяйда улгесвяхІиб: „Я дила Аллагъ! ЦархІилти адамтачи: тамяхІкартачи, къалптаци, къехІбадешлизи ахъибтачи, ит хІекъ бурчайчира валли, ну мешули хІейънилис ХІед баркалла биаб.
¹² Ну ца жумягІли кІийна дубурцулра, нуни

тІалаббарибсила вецІал бутІала ца бутІа закатлис бедлугула». ¹³ Тяйдили кайзурси хІекъ бурчанни биалли, закибяхІ хІерэсалра хІейрулри. Ил, сунела михъирлизи хункІра бирхъули, викулри: „Я Аллагъ, ну бунагъкарси виаслира, ХІуни набчи уркІецІи бара!“ ¹⁴ Нуни хІушази бурула, фарисей ахІи, хІекъ бурчан сунела балгара таманбарили, Аллагъла гълав маркайубли сунела хъайгІи арякъун. СенкІун сунени сай халаиран, ил увяхІварили вирар, сунени сай увяхІирусичевяхІварили вирар».

«ДурхІни Набчи башахъес балтеная»

¹⁵ ГІса гачикахъес, халкъли Иличи биштІати дурхІни бихулри. Ил чебаили, мутагІялимтани къадагъабирулри. ¹⁶ ГІсани дурхІни Сунечи жибарили, мутагІялимтази иб: «ДурхІни Набчи бакІахъес батирая, илдас диргаламадулхъада. Аллагъла Низам-зегъала дунъя илдигъунтас саби къадарси. ¹⁷ ХІушази бурула, виштІаси дурхІяливан Аллагъла Низам-зегъала дунъя къабулхІебарибсилис илала ухІна ацІес хІебиркур».

Даимти гІямру

¹⁸ Ца хІякимли ГІсази хъарбаиб: «ГІяхІси мугІяллим, даимти гІямру диахъес се баришал бурагу?» ¹⁹ ГІсани илизи иб: «ХІу Набзи „ГІяхІси“ или сен викусири? ХІуни багъи, цайли ца Аллагъ ахІи, цархІил чилра гІяхІси левси ахІен». ²⁰ Илала амруби хІунира далулри: «Хъалибарглис мардеш мабулхъад; инсан камаршид; хъулкидеш мадирид; къянати бикъридеш мадирид; хІела неш-дудешла хІурмат бирен». ²¹ Илини жаваб бедиб: «Нуни илди дурхІяхІейчирадал дузахъулра». ²² Ил бакъили, ГІсани илизи иб: «ХІела камси ца секІал леб: хІела лебилра лебсигъуна секІал бицану, мискинтас бутІа. ИлхІели зубрачибра хІела давла бирар. Илала гІергъи хІу Наб гІелавад вакІи». ²³ Амма илди гъай дакъили, ил левгІевал марайиуб, сенкІун ил халаси давлала адам сайри.

²⁴ Ил марайиъни чебаили, ГІсани илизи иб: «ХІерагу, давлала вегІлис Аллагъла Низам-зегъала дунъялизи ацІес сецад къияннил! ²⁵ Давлачевсилис Аллагъла Низам-зегъала дунъялизи ацІесичиб, валрилис буребала тІярхъилабад бетацІес гъамадли бириб». ²⁶ Ил бакъибтани ГІсази хъарбаиб: «Чи верцес вируси гъати?» ²⁷ ГІсани илдас жаваб бедиб: «Адамтас ахърихІебикІуси Сай Аллагъли барес вирар». ²⁸ Петрли Илизи иб: «ХІера нушала лебсигъунара бархъкабатурли, нуша ХІед гІеларадли дакІира». ²⁹ ГІсани илдази иб: «Нуни бархъли бурула, Аллагъла Низам-зегъала дунъя багъандан сунени сай вегІси юрт, яра хъунул, яра узби, яра бегІти, яра дурхІни бархъбатурси гъарилли, ³⁰ гъаннала манзиллизир хІекъли дахъал

кайсу, гІурла манзиллизир биалли – даимти гІямрура кайсу».

Сунела бекІаличила ГІсани гъалахили бурни

³¹ Сунела вецІну кІира мутагІялим ца шайчибяхІ букили, ГІсани илдази иб: «ХІера, гъанна нуша Ярусалимлизи аркъулра. Инсаниятла Уршиличила идбагунала жузази делкІунти лерилра илар маркадирар. ³² Илав ГІса аллагъагартази ведлуга, илдани Иличир къугъни диру, Ил валтІа, Иличи тубикІар, ³³ витра витили, гІур каршу. ХІябэсил бархІи Ил мицІиркайрар». ³⁴ Амма бархтани селра хІергъиб. Илди гъайла мягІна илдас якъинхІебиуб ва ГІса селичила гъайикІулил илдани багъес хІебиуб.

Сукъур сагъварни

³⁵ ГІса Ерихоннизи гъамиубхІели, гъунила дубла кайили, садакъа тиладибириси ца сукъур адам леври. ³⁶ Сунела мякълабад аркъути бахъал адамтала тІама бакъили, илини хъарбаиб: «Се бетаурлив?» ³⁷ Илизи иб: «Лявкъуси Назаретлан ГІса сай». ³⁸ Илини вявъиб: «ГІса, Даудла урши, набчи уркІецІибарагу!» ³⁹ Гъалаб башути мутагІялимтас ил лехІахъахъес дигули хъалли, гъатІилра ахъси тІамара каили, вявикІесяхІиб: «Даудла Урши! Набчи уркІецІибарагу!» ⁴⁰ ГІсани, тІашизурли, сукъур сунечи кахъес хъарбариб. Сукъур Сунечи кибхІели, ГІсани илизи хъарбаиб: ⁴¹ «ХІед се барили диги? ХІед дигуси се саби?» Илини жаваб бедиб: «Арикар, чебианиэс дигулра!» ⁴² ГІсани иб: «ХІу чебианкайруд! ХІела вирхнили хІу сагъкаяхъубри». ⁴³ Сукъур илмадан чебианкайуб ва, Аллагълис дезаикІули, ГІсас гІелавад арякъун. Ил анцІбукъ чебаибти лебилра адамтани Аллагълис деза бариб.

ХІекъ бурчан Закхейла берцуди

¹⁹ ГІур ГІса Ерихонна къакъурбикадикили арякъун. ² Ил шагъарлизив хІекъ бурчантала бекІ сайси, сунес Закхей бикІуси, ца давлачев адам хІерирусири. ³ Илис ГІса чеэс ва сегъуна саял багъес дигули хъалли, халкъла бахъдешли ва сай алаша виъни багъандан, Ил чеэс виъхІейуб. ⁴ ИлхІели, ГІса чеэс багъандан, ил гъалаухъи, инжирла галгаличи ацІиб, сенкІун иладли шалгІевулхъуси сайри ГІса. ⁵ Ил мерличи саили, ГІсани лагъяхІра хІеръили, иб: «Закхей! Гъари, къалабали кацІи! Ну ишбархІи хІечив хъуравиеэс гІягІнисира». ⁶ Къалабали кацІили, илини халаси харидешличил ГІса сунечи хъуравариб. ⁷ Ил чебаили, лебилра цализи-ца хъутурбикІутири: «ХІера, итгъуна бунагъкар адамличи хъуракайубгу?!» ⁸ Закхей айзур ва ГІсачи

дугъайзурли буриб: «Арикар! Дила байхъала лебдеш мискинтас бедес нуни чейсулра. Рахли нуни чизибад-биалра имцїали сасили виасли, илис авнали имцїали чарра кабирис». ⁹ Гїсани иб: «Иш Ибрагьимла урши виъни багъандан, ишбархїи иш юртлизи берцуди хъурабиубли саби. ¹⁰ Гъалаб бетяхьбси баргесра берцахъесра сай Инсаниятла Урши вакїбси».

Вецїал кърушличила бурала

¹¹ Ил бакьибтази Гїсани ца гьатїи бурала буриб. Сенкїун илди Ярусалимличи гъамли сабаилри ва илдазибад цацабехїлис Аллагьла Низам-зегъала дунъяличи детуулра или гъанбиркулри. ¹² Гїсани илдази буриб: «Ца хала хїяким гъарахъси улкализи аркьулри, илаб пачадешла ихтияр кабизахъурли, гїелавяхї вакїес. ¹³ Илини гъаланачи сунечи вецїал кърараваш жибарили, илдази мургьила вецїал кърушра дедили, буриб: „Ну чариайчи хайри бакїесли харждарая“. ¹⁴ Амма сунела улкала халкъ иличи гьимилири ва „Нушаб илини пачадеш дирули дигули ахїенра“ – или, бурахъес, илис гїелабад вакилти бархьиб. ¹⁵ Ил пачадешра дикахъили чариубхїели, чузи арц дедибти къраравашуни тїалаббарахъес хърбариб, сецадла хайри барибал хърбаэс багъандан. ¹⁶ Цаибилли вакїили, иб: „Хужаим! Хїела ца кърушли вецїал къруш дариб“. ¹⁷ Илини иб: „Гьей багъадур, хїу асилси кърараваш сайри. Камси секїайзив марли кални багъандан, хїуни бекїдеш дирахъес нуни хїела арилизи вецїал шагъар лугулра“. ¹⁸ Кїиэсил вакїили, иб: „Хужаим, хїела ца кърушли шел къруш дариб“. ¹⁹ Пачани илизира иб: „Хїура шел шагъарла бекїли вируд“. ²⁰ Хїябэсиллира вакїили, иб: „Ма, дила хужаим, хїела иш къруш. Нуни ил, явлухъла бухїна бигъи, бихїира, ²¹ сенкїун хїу къркьси, кахїебихъбси кайсуси, хїебегїунси иршуси виъни балули, ну хїегїив урухиубра“. ²² Пачани илизи иб: „Хїу вайси кърараваш сайри! Хїуни хїед танбихїра белгикабарири! Ну къркьси сайнира, кахїебихъбси кайсан виънира, хїедегїунти иршан виънира хїуни балухїели, ²³ дила арц сен бузахъес хїегири? Ну чариубли вакїибхїели, наб хайрилра бикишигу!“ ²⁴ Илини сунела кумекчибази иб: „Итизибад ит къруш сасили, сунела вецїал лерсилис бедая“. ²⁵ Илизи иб: „Хужаим! Италакїун иш хїебедалра вецїал тер!“ ²⁶ Пачани илдас жаваблис иб: „Амма Нуни хїушази бурулра, лебсилис гили бирар, сунела агарсилизибад лебсира кебасили бирар. ²⁷ Нуни чус пачадеш дирниличи кършити дила душманти биалли иша кили, дила гъалаб кабушая“».

Ярусалимлизи гъайбатли бухїнаахъни

²⁸ Ил бурала бурили гїергъи, Гїисани Ярусалимлизи Сунела архїя даимбариб. ²⁹ Елеон дубурла хърличирти Вифагия ва Вифания шимачи гъамихїи ветисяхїибхїели, Гїисани Сунела кїел мутагїялим ила бархьиб ³⁰ ва илдази иб: «Ит бяхїчиси шилизи дукъеная. Шилизи духїнадухъунхїели, хїушани сунечи адам бекїлил мурдахїейибси, гъаялизи бигъунси жагьил эмхїе чебиидая. Гъаялизибад арзили, хїушани иша кая. ³¹ Эгер чили-биалра хїушази хърбаалли: „Сен ирзулрая?“ – или, илизи бурая: „Иш Арикарлис гїягїнибикили саби“ – или». ³² Арикарли бархьибти мутагїялимтани арбякьи, гъар секїал Илини чучи хърбарибси тьхїярли дариб. ³³ Илдани эмхїе ирзухїели, илала бегїтани хърбаиб: «Хїушани эмхїе сен ирзулрая?» ³⁴ Илдани буриб: «Иш Арикарлис гїягїнибикили саби». ³⁵ Илдани эмхїе Гїисачи киб. Гїур иличи чула палтар чедушили, Гїиса мурдаяхъиб. ³⁶ Ил ватихъибхїели, илдани чула палтар Гїиса аркъуси гъуйчи удуршутури. ³⁷ Ил Елеон дубурличивад кайцїуси катхїейчи гъамиубхїели, ила цалабикибти мутагїялимтала лебил кьукъя чули чедаибти гїяламатла анцїбукъуни багъандан Аллагьлис дезабикїесбииб, ³⁸ шадси тїамаличил вьабкигули: «Арикарла уличил льявкъуси Пачара баракатла сай! Зубрачиб даршудеш, чихъ зубрас чебяхїдеш дираб!» ³⁹ Халкъличил бархти фарисейти Гїисачи дугъабизур: «Мугїяллим, илди Хїела мутагїялимтази селра хїебикїахъес бурагу!» ⁴⁰ Амма Илини илдала гъай чехїесиб: «Хїуша дирхаирая, эгер итди лехїахъалли, къркьуби вьавдикїесдирхїур».

Ярусалимличила Илала децї-биса

⁴¹ Гъатїиралра гъамбиубли шагъар чебаили, илис къадарбириси къисматличи Гїиса висивииб ⁴² ва иб: «Агъ, хїуни ишбархїила бархїилра даршудешличи гъуни чебаадлири! Амма ил гъанна хїела хїулбани чебаэсливан ахїен. ⁴³ Душманта хїед алавчарли сангурти тїашдалтути, лерил шалубачибад алавбурцути, хїу къакъабакїахъибти бурхїнира ляркъян. ⁴⁴ Аллагьли маслигїятбириси, хїу берцнилис кьулайсили биэси замана хїебагъни багъанданцун, хїура хїела халкъра кърдарили детихъахъурая ва къркъаличиб къркъалра кахїевлан».

Вачар-чакарлизи ахъибти Аллагьла хъулибад дурабяхъни

⁴⁵ Гїур Гїисани, Аллагьла хъули ацїили, иладли бирцанти ва исанти дурабуршес вехїихъиб.

⁴⁶ Илини иб: «Дурхъаси жузлизи белкїи саби: „Дила

хъали – балгала хъали саби“ – или, хІушани биалли, иш къачагъунала къушличи шуркабатурлирая».

⁴⁷ ГІса Аллагъла хъулив гъар бархІи халкълизи гІякълума угъулри. Хала кашишунасра, Низамла гІялимтасра, халкъла халалгъунтасра Ил ветахъахъес дигулри. ⁴⁸ Амма ГІсала гъар гъайличи лехІихъули, лебил халкъ мурталра Иличил барх бирни багъандан, ил секъяйда бирусилра хІебалулри.

ГІсала ари-ихтиярличила суал

20 ГІса ца гъачам Аллагъла хъулив халкълизи гІякълума угъуси ва гІяхІ хабар буруси замана, хала кашишунира, Низамла гІялимтира, халкъла тјамадира къаршили кабизур ² ва хъарбаиб: «ХІуни илди лерилра секІал чила ихтиярличил дирусири? ХІед илгъуна ихтияр чили гібси?» ³ ГІсани илдази иб: «Гъари, Нунира хІушази ца суал хъарбиисну, хІушани Набзира бурая: ⁴ ЯхІгъани шиннизи бизахъни чили барахъибсири? Зубразибадли хъарбарили барахъибсив яра адамлив?» ⁵ Илди чула саби урgab жалбухъун: «Эгер нушани „зубразибадли“ – или, бурахІелли, ГІсани гІурра хъарбиу: „ХІуша иличи сен дирххІеуррая, гъатІи?“ ⁶ Амма нушани „адамли“ – или, бурахІелли, лебил халкъли, хІятта ЯхІгъа идбаг виъниличи саби бирхъни багъанданра, нуша къаркъубаудурцура». ⁷ ГІур илдани жаваб чарбатур: «Нушани хІебалехІе». ⁸ ГІсани илдази иб: «ХІебиалли чила ариличи хъарахъили дирулрал хІушази Нунира хІебурис».

Гъимикар тІутІи дашахъантачила бурала

⁹ ГІур ГІсани халкълизи ишгъуна бурала буриб: «Ца адам, тІутІира удатурли, анхъличи хІерудибирахъес анхъчибачи хъарбарили, сай биалли вахъхІилис дура арякъун. ¹⁰ ТІутІи дилкъуси замана сабаибхІели, илини анхъчибачи сунес биркуси сабухъ сасахъес къараваш вархъиб. Амма ил анхъчибани витили ва селра хІебедили гІелавяхІ чарвариб. ¹¹ Илини гІурра цархІил къараваш вархъиб. Илра селра хІебедили, витра витили, цІахварили вархъиб. ¹² ГІур хІябэсил къараваш вархъиб. Илра дяхъурбаркарили, анхъла дура лайвакІиб. ¹³ ГІур анхъла вегІ пикриухъун: „Нуни се барасли гІяхІсира? Гъари, дигуси дила урши урхъис, белики, илигІибалра урузбиэс“. ¹⁴ Амма анхъчиба, ил чеили, чула урgab пикрибариб: „Ит букъурла вегІ сайну, даширая итра кавшили, гъар секІайчи дегІкайрехІе!“ ¹⁵ Анхъчибани ил, анхъла дура арукили, кавшиб. ТІутІила анхъла вегІли илдас се бирув гъатІи? ¹⁶ Ил чарухъунхІели, анхъчибира кабуршу, анхъра цархІилтази бедлуга». Иличи лехІахъибтани иб:

«Аллагъли илгъунара къадармабараб». ¹⁷ ГІсани, илдачи чекайзурли хІерра или, хъарбаиб: «„Лац лушантани хІейгибариси къаркъара, хъинжлизиб бегІлара хІяжатсили бетаур“ – или, Дурхъаси жузлизиб белкІунсила се мягІна сабира? ¹⁸ Ил къаркъализи чегибсира къардиубли кайкили тІутІуирар, ил саби сунечи кабикибси адамра пІянчІкайу». ¹⁹ Ил бурала чузи аргъахъес бурибси биъниличи шакбикили, Низамла гІялимтасра хала кашишунасра ГІса уцес дигули хъалли, халкълигІиб урухбиуб.

²⁰ Илбагъандан илдани ГІсас гІелабад дигІянали хІерудибирес бехІбихъиб. Дебали хІялалтази буйгІути ца-чумал адам баргили, ГІсани бурибси, васвасиэсигъуна мягІнала гъай пайдалабарили, илди Иличиб гІяйиб кабилзахъути бикърумили биахъес ва Римла хІякимла арилизи ведили, илаб ГІсас диван барахъес къасбариб.

«Пачала пачас бедая...»

²¹ Илди цагъачам ГІсази суравбухъун: «МугІяллим, бархъдеш бирахъес ва чисалра гІяхІулахІейрули, лебтазилра дакІу-гъаргли Аллагъла бархъси гъуникад башахъес ХІу гІевугъни нушани балулрану, ²² бурагу, Римла пачас хІекъ бедлугес нушачиб чебсив ахІену?» ²³ Илдала суалла вайси мягІналичи шакикили, ГІсани илдази ²⁴ иб: «Гъари, Набзи динарий чебаахъая, илизир чила суратра ура лерал хІерэс дигулрану». Илдани жаваб бедиб: «Римла пачала». ²⁵ ГІсани илдази иб: «Пачас – пачала, Аллагълис – Аллагъла». ²⁶ Илини халкълизи дурибтазибад илдани чула вайти къасанас пайдабиэсигъуна селра баргес хІебиубли, ва, Илала жавабтачи тамашабиубли, илди лехІкахъиб.

Магъарличила ва зубрачила саддукейтала суал

²⁷ ГІсачи гъамбиубли, ца-чумал саддукейли (бевкІибти гІур миціирбирниличи илди бирхарути ахІенри) Илизи ишгъуна суал хъарбаиб: ²⁸ «МугІяллим, Низамлизиб Мусани нушаб белкІи саби: „Хъунул кариисси узи, сунезибад дурхІни ахІекІубли нагагъ вебкІалли, илала хъунул цархІил узини сунес кариаб ва узис дурхІни абикъаб“. ²⁹ ХІера, лебли саби верхІел узи: цаибил, хъунулра кариили, сунезивад дурхІя ахІекІубли вебкІили сай. ³⁰ КІиэсиллира ил кариили, дурхІя ахІекІубли вебкІили сай, ³¹ хІябэсиллира ил хъунул адам кариили сари ва илкъяйдаличил ил верхІелра узини кариили сари. Илди верхІелра узи дурхІни ахІекІубли бевкІили саби. ³² Илди миціирбиубхІели, ил чидил узила хъунулли ризсара? Ил верхІелра узичир хъунулли калунси риалли?!» ³⁴ ГІсани илдас жаваблис иб: «Гъаннала дунъяличиб хІербирутани хъунрира кабиръу, шерира арбашар.

³⁵ Амма саби хІяблабад абизес ва челябкьуси дунъялизибра хІеркабирес лайикътази халбарибтани я хьунри кахІебиръу, я шері архІякъян. ³⁶ Илди бекІесра хІебирар, илди малаикунигъунтили бирар. Илди Аллагъла дурхІни саби, сенкІун Аллагъли саби илди хІяблабадли ахъбуцибти. ³⁷ БекІибти хІяблабад абилзни сай Мусанира марбирули сай. Алкунси цІализи гІелабикибси муръухъла къадаличила хабарлизиб илини ишкъяйда бурили: „Аричи – ил Ибрагъмлара, Гисакълара, Якъублара Аллагъ сай“.

³⁸ Амма Аллагъ – ил алхунтас аХІенну Аллагъли сайси, мицІиртас сай. Аллагълис лебилра мицІирти саби».

Низамла гІялимти Илизи суалбикІес бирули аХІен

³⁹ ИлхІели цацабехІти Низамла гІялимтани иб: «МугІяллим, валлагъ, хІуни гІяхІил бурири».

⁴⁰ Илала гІергъи Гисази чилра суаликІес валхІейсур.

⁴¹ Амма сай Гисани илдази иб: «Сен гъатІи, МасихІ Даудла наслулизивад сай или бикІутив?»

⁴² Тулкнала Жузлизив сай Даудра аХІену гъатІи викІуси: „Аричини дила Арикарлизи иб: ‘Дила балуй някъла шайчи кайи, ⁴³ Нуни ХІела душманти ХІела къяшмауб багъарбиахъайчи“? ⁴⁴ Эгер Даудра Илис „Арикар“ – или, викІули виалли, секъяйда МасихІ Даудла наслулизивад виэс вирусив?»

⁴⁵ Лебил халкъ Сунечи лехІихъуси замана, Гисани Сунела мутагІялимтази иб: ⁴⁶ «Низамла гІялимтачил хІуша мяхІкамли диирая. Итдас духъяна палтар челгъесра, майдунтачиб чузи хІурматличил саламбикІахъесра, киласабазибра шадлихъла сяхІбатуначибра бегІла гъала кабиресра дебали дигахъу. ⁴⁷ Илдани саби гамъа хьунрала лебдеш бугуси, илала гІергъи чебаълис духъяндитІахъи балгнира дучІути. Илдани чучи чекайсу бегІлара халаси гІяйиб».

Гамъала кІел къарапул ва илис гап

21 Гисани, алавчарли хІеръили, садакъа кабирхъуси тІакъала чула савгъатуни кадирхъути давлачебти чебаиб. ² Илини сунела лерти дубсила кІел къарапул кадирхъуси мискин гамъара чераиб ³ ва иб: «ХІуша дирхаирая, ит мискин гамъали цархІилтачир дахъал кадихъиб. ⁴ СенкІун лебтанилра савгъатлис чула имцІабухъ секІал кабихъиб, иткъяйда мискинси итини биалли, сунела яшавлис хІяжатсира балли кабихъиб».

Ярусалим тІутІу-къякъябирниличила бурала

⁵ Ила цалабикибти адамти Аллагъла хъайчила, ил белшес кадихъибти къаркъубала ва ил баршес хибти ваяхІла жагадешличила гъайбикІули бакъили, Гисани илдази иб: ⁶ «ХІушани ишар

чедиути гъар секІал тІутІу-къякъядирар. Ишаб къаркъаличиб къаркъалра кахІелунти бурхІнира ляркъян».

⁷ МутагІялимтани, Иличи дугъабизурли, хъарбаиб: «МугІяллим! Илди лерилра мурт сари детарути? Ил сецад жявли бирарал секъяйда багъес вирусив ва ил биэс гъалаб сегъуна лишан дакІубиэсара?» ⁸ Гисани иб: «Вари, хІушани чисалра диргІяхІейэс къайгъибарая. Дила У пайдалабарили, „МасихІ – ну сайра!“ ва „Замана баили саби!“ – или, бикІули башутира бахъал бирар. ХІуша илдас гІеларадли армякъядая!

⁹ Дургъбачилара пунтчидешличилара бакъибхІели, уркІмадулхъадая. Гъаланачи илди лерилра диэс гІягІнитити сари, амма ил гъачамлис ахир аХІен».

¹⁰ ГІур Гисани илдази иб: «Халкъличи халкъ, пачалихъличи пачалихъ къаршили ахъдирар.

¹¹ Гъар чинаралра цІакъли мерсра далкъан, гашира диркур, бахъал адаптира улхан ва зубрачирад тамашала кахти лишантира дирар. ¹² Амма лерилра илди детаайчи, хІуша дуцили гІязабдуркІурая, гІелабадкабиркули, паргъатдеш хІелуга, киласабазиб танбихІбиру, туснакъла духІнайурая, Ну багъандан пачналара хала хІякимталара гъалар хІушазирад жавабкардешра тІалабдиру. ¹³ ХІера, илар хІушани набчила бикъридешдаресра дирудая.

¹⁴ Амма хІуша умудиэс или гъалакдиубли, пикрумазира майхъудая. ¹⁵ Нуни хІушаб гъайдикІахъес пагъра гІякълура лугас. ИлхІели хІушала къаршикартазивадли цалилра хІушачи къаршили я гъандуцес, я хІушала гъай уббяхъес хІейрар. ¹⁶ ХІуша удедес хІушала бегІтани, узбани, гъамтани ва юдашунанира балли, къасбиру. ХІушазибад цацабехІти кара кабуршу. ¹⁷ Ну багъандан хІушачи лебилра гъими-къяслира бирар. ¹⁸ Амма хІушала бекІличибад ца гъезалра убяхІхебиркур. ¹⁹ ХІушала сабурла чІумадеш – ил саби хІушала рухІла берцуди.

²⁰ ГІяскуртани алавкабуцибси Ярусалим чебаибхІели, багъирая: ил хараббируси замана гъамли саби. ²¹ ИлхІели Иудеялизибти лебилра дубуртази бекшаб; Ярусалимлизибти, ил бархъатурли, арбукъяб; илала дуба-карчІализибти шагъарлизи амабацІаб. ²² Илди – ляркъян или Дурхъаси Жузлизиб бурибси марбирути, мусибатла бурхІни сари. ²³ ДурхІялис баибтас ва михъирличивси дурхІяличилти хьунул адамтас илди агри-балагъла бурхІни сари! Ил ванзаличи цІакъти балагъуни, илабти халкъличи Аллагъла гъимидухъни чевкъар: ²⁴ цабехІ бугаси турлизибад улхан, цархІилти ясирбуцили, декІар-декІарти улкнази арку. Ярусалим биалли, аллагъагартас ахир сахІебаили лебалцадхІи, илдала къяшмауб кавлан.

²⁵ БерхІиличир, бацличир ва зубартачир гІяламатла анцІбукъла лишантира дирар, ванзаличибти халкъ биалли, урхъула ва дургъути

рамчанала кахси тІамали урехила ружерилизибуршу. ²⁶ Дунъяличи челябкьуси бурули бурес хІейэсигъуна балагълигиб урухбиубли халкъра гъигъ буцили, къагъбиубли кабиркур. ²⁷ ГІур илдани чебяхІси цІакъличилра пагъличилра машгурси Инсаниятла Урши гъагулличи айили льявкъули чейу. ²⁸ Лерилра илди мардирес дехІдихьибхІели, къукърира дархъдарили, бурги ахъдуцили хІеръая – азаддеш гъамли саби!»

²⁹ ГІисани илдас ишгъуна бурала буриб: «ХІушани инжирла ва цархІилти галгубачи хІеръая. ³⁰ Илди кІапІразир дузесдяхІибхІели, илдачи хІеръили, дуцірум гъамли диъни баладая. ³¹ Тяп илкъяйдали хІушанира ил марбирни чебаибхІели, багъирая, ил Аллагъла Низам-зегъала дунъя гъамли саби ибси биъни. ³² ХІушази бурулра: илди лерилра иш гъаннала къам мицірли лебаллил маркадирар. ³³ Зубрира ванзара къел-хІерзи агарли дегъаллира, Дила гъай детхІейхъур.

«ХІерудибарая»

³⁴ ХІерудибарая, илбархІи бирни хІушаб гъаналра агарсиван хІебиахъес багъандан хІуша шадлихъуназирад, держлукъдешлизирад, хъали-яшавла шикъатІализирад гІелумли дуэная.

³⁵ Ванзаличиб хІербирути леблисалра ил гъанагарсили бирар. ³⁶ ХІушаб къадарти лерил къияндешлумазирад зарал хІебиахъубли дерцес баарицад цІакъ биахъес ва Инсаниятла Уршилис гъунидаэс багъандан, хІуша мурталра хІуруціли диреная ва Аллагълис дулгеная».

³⁷ ХІерели ГІиса Аллагъла хъулив халкълизи гІякълума угъи, бархІехъла замана биалли, арякъи, дуги Елеон дубурличиб буркІи. ³⁸ Савли жявли лебил халкъ Илала вягІзуртачи лехІахъес багъандан Аллагъла хъули башутири.

Ягъудала хаиндешла къасани

22 Абиъ-бехІціурала, сунес Пасха или бикІуси, байрам гъамбикІулри. ² Хала кашишунасра Низамла гІялимтасра ГІиса агарварес дигулри, илди халкълигиб урухкІни багъандан. ³ ХІера, веціну кІирализивадли ца, Искарриот ибси че уличилси, Ягъудази Илбис бухІнаберхур. ⁴ Ягъуда арякъи хала кашишуначил ва Аллагъла хъа къараултала халалгъунабачил ГІиса уведеси тяхІярличила вягІдалакайуб. ⁵ Илди дебали разибиуб ва илис арц дедесра чесиб. ⁶ Ягъуда къабулкайкиб ва ГІиса уведес мякълаб цархІилти адамти агарси замана бикахъес хІерликайиб.

БегІ гІергъиси гъунибаъни

⁷ БехІціурала – Пасхала бархІи сабаиб. Ил бархІи пасхала мукъарара белгъес гІягІнисири. ⁸ ГІисани

Петрра ЯхІъяра бархъили, илдачи хъарбариб: «Дукъенаяну, нушаб бархІехълис пасхала беркала хІядурбарая». ⁹ Илдани хъарбаиб: «Нушани чинаб хІядурбарили дигулри?» ¹⁰ ГІисани илдази иб: «Шагъарлизи духІнадухъунхІели, хІушани шинна хъабара сайра ца адам чейидая. Илис гІеларад ардякъи, ил аціибси юртлизи хІушара адаціирая. ¹¹ Юртла вегІлизи бурая: „МугІяллимли хІези хъарбаахъес хъарбариб: 'МутагІялимтачил варх кайили, Нуни Пасха беркеси хъали чидил сабив?'“ ¹² Ил адамли хІушази чедибси, царкнира удушибси халаси хъали чебиахъу. Илаб беркесира хІядурбарая». ¹³ Илди арбякъун ва гъар секІал ГІисани бурибси къяйда даргили, пасхала беркала хІядурбариб.

¹⁴ Замана баибхІели, вакилти ГІисачил барх къумурла мякъла кабииб. ¹⁵ ГІисани илдази иб: «Дила гІязабти дехІдихъайчи, Наб хІушачил варх кайили, иш Пасха беркес дебали дигусири! ¹⁶ Ну хІушази викІулра, Нуни Пасха гІур хІебукас, ил барес Аллагъла Низам-зегъала дунъялизибцун бикалли ахІенси». ¹⁷ ГІур Илини хъаба касиб ва, Аллагълис баракатла балгара барили, иб: «Касая иш, хІушала ургар дутІая. ¹⁸ Нуни хІушази бурулра, Аллагъла Низам-зегъала дунъяла замана сабаили гІергъи ахІенси, Нуни гІур ишди тІутІила шинра хІедужис». ¹⁹ ГІур Илини, касили къаці, баракатла балгара барили, кІибайбарили, илди леблисалра бутІиб ва илдази иб: «Ил хІуша багъандан къурбанбируси Дила чарх саби. Илкъяйда биреная, Ну гъаниркахъес». ²⁰ Илкъяйдали бархІехъла хурегла гІергъира, хъаба касили, илдази иб: «Ил хъаба Нуни хІуша багъандан кертІути Дила хІиличил бигъунси Сагаси ВягІда саби». ²¹ Амма хІердикІеная! Ну уведлуганна някъра Дилайчил барх ишаб къумурлаб леб! ²² ГІе, Сунес къадарси гъуни Инсаниятла Уршилисра ахъес чевкъар. Амма Ил уведлугайчира балагъ-къадар чевкъар! ²³ Илди, «Илгъуна бареси чузивад чи саяра?» – или, цализи-ца суалбикІесбяхІиб.

Чили имціали?

²⁴ ГІур мутагІялимтала ургаб чузивадли халалгъунази вейгІеси чидил саял белгибирули жал бетаур. ²⁵ ГІисани илдази иб: «Аллагъагартачир пачнани сари халкълис бекІдеш дирути. Илдала хІякимти чус саби „халкълис гІяхІдеш биранти сарра“ – или бикІар! ²⁶ ХІушала илгъуна тяхІяр биэс асухІебирар! ХІушазивад вегІла халалгъунсили сайси, ил, вегІлара виштІалгъуна сайсиван вираб, вегІлара халалгъуна биалли – сай къараваш сайсиван вираб. ²⁷ ГъатІи, чи сая халаси? Къумурла мякъла кайибсив яра илис къуллукъбирули кайзурсив? Къумурла мякъла кайибси саяра?! ХІера, хІушала ургав Нура къуллукъчиван сайра! ²⁸ Лерил

имтихІянти хІушанира Набчил далли дяхІаирая.
²⁹ Дила Дудешли Наб пешкешбарибси Аллагъла Низам-зегъала дунъя, Нуни ил хІушабра пешкешбирулра. ³⁰ ХІуша Дила Низам-зегъала дунъялизир Дила кьумурларад къацІли дукудая, Израилла вецІну кІира кьамлис бекІдешра диридая.

³¹ Симон, ва Симон, хІу сахъли виин! ХІушала хІялумцІахъес ва неглизирадли анкІи декІардарахъес илбислис ихтияр бедибсину. ³² ХІела вирхни бетмахъаб или Ну улгира. ХІунира, ГІур Набчи чариубхІели, хІела узбала бирхни дебабирен». ³³ Петрли ГІисази иб: «Арикар! Ну ХІед гІелавад туснакъла вакІес ва бекІа чекасес хІядурлира». ³⁴ «Петр, Нуни хІези бурулра, – иб ГІисани, – ишбархІи дагъа белхІайчи, нуни Ит валуси ахІен или хІяйна ирид».

КІел тур

³⁵ ГІисани илдази хъарбаиб: «Нуни хІуша я арц, я тавра, я дабруми агарли дархъили хъалли, хІушала селичилра хІяжатдеш лебрив?» Илдани жаваб чарбатур: «Аги». ³⁶ ГІисани илдази иб: «Амма гъанна сунела арц лерсини, илдира касили, таврара касаб, арц агарсини биалли, палтарра дицили, тур асаб. ³⁷ Нуни хІушази бурулра, Дурхъаси Жузлизиб Набчила белкІунси бетарар: „Ил такъсирчизи халвариб“. СенкІун Набчила дурибти лерилра детарути сари». ³⁸ ГІисази илдани иб: «Арикар, хІера, ишар кІел тур лер!» Илдас Илини жаваб бедиб: «Диур!»

Елеон дубурличибси балга

³⁹ ГІиса хъайгІивадли дуравхъи, гІядатлибиубливан, Елеон дубурличивхІи ватихъиб. МутагІялимтира Илис гІелабадли арбякъун. ⁴⁰ Сай вашуйхІи аибхІели, ГІисани илдази иб: «ХІялумцІалалис гъандуцес дулгеная». ⁴¹ ГІур, игъубси къаркъала гъарахъдешличи тядидиубли, кьукъмусикили, улгесхІиб: ⁴² «Ва Дудеш! ХІези тилади саби, Набчибад иш гІязабтала хъаба чебарбука! Амма Дила ният ахІи, ХІела бартааб». ⁴³ Зубрачивадли вакІили, малаикра ГІиса уркІичевварес къайгънаиркъусири. ⁴⁴ ХІяшкълавиубли, ил иштяхІли улгусири, Илала чяхІдикІути майъа ванзаличи хІила кІунтІриван кадиркутири. ⁴⁵ Балгаличивад айзурли, чариубли, мутагІялимтачи вакІибхІели, илди, шишимаили бамсахъурли, бусули баргиб. ⁴⁶ ГІисани илдази иб: «ХІуша сен дусутирая? Айзираяну, хІушала хІялумцІухІели гъандуцес багъандан дулгеная».

ГІиса уведиб

⁴⁷ Илини илди гъай дурухІели, халкъла кьукъя багъарбиуб. Илдала гъабкъябазив баягъи вецІну

кІирализивад цали сайси, сунес Ягъуда бекІуси гъавиубли вашулри, ГІисачи байикес ветухъун. ⁴⁸ ГІисани илизи хъарбаиб: «Ягъуда! Байикниличил саю хІуни Инсаниятла Урши уведлугуси?» ⁴⁹ ИлхІели Илала мякълабти мутагІялимтани, илаб бусягІят се бетарарал чебаили, ГІисази хъарбаиб: «Арикар! Нушани турани айтІес замана баилив?» ⁵⁰ Илдазивадли цали, тур чегахъили, хала кашишла къаравашла балуй лихІи чеббушиб. ⁵¹ ГІисани иб: «Диур, ватирая!» ГІур илала лихІиличи гачикили, къараваш сагъвариб. ⁵² Илини Сай арукес бакІибти хала кашишуназира, Аллагъла хъа къараултазира, тямадабазира иб: «Туранира тІерхъубира касили, уцес хІуша дурадухъес, Ну къачагъ секІал сайрав?» ⁵³ Ну гъар бархІи хІушачил варх Аллагъла хъулив вирира, хІуша Набчи гачхІедикира. Гъанна биалли, хІушала замана саби – цІябдешла ариличилси. ⁵⁴ Илдани ГІиса уцили, гъайварили, хала кашишла юртлизи киб. Петр илдачив цакъадар тядидили, илдас гІелавадли вашулри.

«Нуни Ит валуси ахІен»

⁵⁵ Азбарла байлаб цІара бикъурли, адамти цІалис алавчар кабиб. Илдачил варх кайили Петрра леври. ⁵⁶ Ил цІала мякъла кайили чеили, ца къараваш хъунул адамли иличира хІеръили, иб: «ГІисачил вархли илра левригу». ⁵⁷ Амма Петрли, илала гъай чехІесили, иб: «Хъунул адам, нуни Ит валуси ахІен». ⁵⁸ Камси заманала гІергъи цархІил адамлира, ил чеили, иб: «ХІура итдазивад ца сайригу». Амма Петрли илизира иб: «АхІенра». ⁵⁹ ГІурра сягІятцад замана арбякъи гІергъи, ца адамли гІячихъли иб: «Валлагъ, ил адам ГІисачил вархли леври, ил галилеяланра сай». ⁶⁰ Амма Петрли илизира иб: «Нуни хІу сейкІулрил балули ахІенра!» Илини илди гъай дурухІели, дагъа белхІун. ⁶¹ ИлхІели Арикарли, шуряхъили, Петрличи хІеръиб. Петрлис сунези Арикарли дурибти гъай гъандикиб: «Дагъа белхІайчи хІу Наб хІяйна марли кахІелада». ⁶² Азбарла дура арбякъи, Петр кьутІкьули висивииб.

⁶³ ГІисас къараул биранти Иличиб кьугънара бикъутири, дебали итра итутири. ⁶⁴ Илала хІулбира дигъи, илди хъарбикІутири: «Идбаг, гъари, багъи ХІед чили бяхъибал?» ⁶⁵ Илдани Илизи дахъал цархІилтира валтІути гъай дурутири.

⁶⁶ Савли шаладикибхІели, халкъла хІяким-тямадаби, хала кашишуни ва Низамла гІялимти чукурбикибхІели, ГІиса чула диванханала гъала кили, тІашатур. ⁶⁷ Илизи хъарбаиб: «Бура, ХІу – МасихІ сайрив?» Илини илдази иб: «Нуни бурили хъалли, хІуша Набчи дирххІерудая, ⁶⁸ Нуни хІушази хъарбааслира, хІушани Наб я жаваб хІелугадая, я Ну хІушани ваткахІейура. ⁶⁹ Гъаннала гІергъи Инсаниятла Урши ЧевяхІси Аллагъла тахличив

балуї някъла шайчи кайили вирар». ⁷⁰ Илди леблилра хъарбаиб: «Хіебиалли, Хіу Аллагъла Урши сайрив?» Илини жаваб бедиб: «Ну чи сайрал, хіушанира бурирая». ⁷¹ Илхіели илдани иб: «Нушаб гіур сегъунти бикъридеш гіягінитив? Сунела мухліли дурути нушани дакъирагу».

Гіса Пилатла гъалав

23 Илала гіергъи лебил халкъ абизур, Гіса Пилатличи арукиб. ² Иличирти гіяйибти кадизахъес багъандан, илдани буриб: «Иш адамли нушала халкъ чеббулкъахъули виъни, пачас хіекъ хіебедахъес гіевугъни ва сай Масихі, цараван буралли, пача сайра или викіни, нушани кабизахъурра». ³ Пилатли Илизи хъарбаиб: «Хіу – жугъутіла пача сайрив?» Илини жаваб бедиб: «Хіуни буриригу, Ну чи сайрал». ⁴ Пилатли хала кашишуназира халкълизира буриб: «Нуни иш адамличиб сегъуналра гіяйиб чебиули ахіенра». ⁵ Илди бикіулри: «Илини, вягізурти дирули лебил Иудеякад вашули, халкълизиб къабулагардеш алкъахъули сай. Галилеялизирад вехіхъили, хіера, гъанна ишара саили сай».

⁶ Галилеяличила бакъили, Пилатли хъарбаиб: «Гіса Галилеялизирадси саю, гъатіи?» ⁷ Гіса Гъирадла арилиубси ванзаличивадси виъни багъурли, Пилатли Гіса, илди бурхіназив Ярусалимлизи вакібси Гъирадличичи ухахъес хъарбариб. ⁸ Гіса чеили, Гъирад дебали разиуб: Иличила дурути хабурти дакъили, Ил чеэс иштяхіли ил вахъхі сайри. Илала дуравад, Гісани сегъуна-биалра гіяламатла анцібукъра чебаахъесгу или хуллири. ⁹ Гісази илини дахъал суалти хъардаили хъалли, Илини илала суалтас жаваб чархіебатур. ¹⁰ Ил замана илаб тіашти хала кашишунанира, Низамла гіялимтанира Гісачила чула гіяйибти дурни даимбирулри. ¹¹ Гъирадра илала бургъантира Иличиб къугънабиркъиб ва Ил увяхівариб. Гіур, Иличи жагати палтарра чегъахъурли, гіелавяхі Пилатличи чарариб. ¹² Ил бархіла гіергъи гъалаб цаличи-ца къаршикартили бирути Гъирадра Пилатра юлдашуни бетаур.

Иудеялантала тіалаб

¹³ Хала кашишунанира, тямадабира, халкъра сунечи тіалаббарили, Пилатли илдази иб: «Хіушани иш адам халкъ гъирбиран сай или гіяйиблаварили, набчи кирая. Хіушара лерли нуни ахтардиварили хъалли, ишала черкад хіушани дурутацибад нуни ишичи сегъуналра гіяйиббареси секіал хіебаргира. ¹⁵ Тяп илкъяйда Гъирадлира, нуни Иш сунечи вархъили хъалли, Ишис кавшеси хіукму барес лайикъсили биэси сегъуналра багъана хіебаргили чарвариб. ¹⁶ Илбагъандан витяхъесра бурили, нуни иш ваткайс». ¹⁷ -

¹⁸ Илзамана лебил халкъли ца мухлілибад къяйда вявъиб: «Нушаб Гіса гіягінили ахіен! Варавва азадвара!» ¹⁹ Варавва – ил шагъарлизиб бетаурси пунтла замана адам кавшни багъандан туснакъварибсири. ²⁰ Туснакълавад Гіса дураэс пикрибарибси Пилат халкъличил гіурра ихтилатикіес вализур. ²¹ Амма илдани вявъиб: «Ил хіябтіерхъаличи чеветяхъая, хіябтіерхъаличи!» ²² Пилатли хіяйнайсра илдази иб: «Итини се вайси бариба? Ит кавшес хіукму баресси нуни чебиули ахіенра. Нуни Ит витяхъесра бурили, ваткайахъис». ²³ Амма Гіса чеветяхъни тіалаббурили, биругіеб вявбикіутала тіама Пилатлайчиб чедибикиб. ²⁴ Илини халкъли тіалаббуруси хіукму дурасиб. ²⁵ Пунтлизир бутіакъянчидеш дарни ва адам кавшни багъандан туснакъварибси адам, ил ватаахъес дигутала мурад барили, ваткаиб. Гіса биалли, чус дигуси барахъес халкъла арилизи ведиб.

Голгофаличи аркъукад

²⁶ Гіса чеветяхъес арукиб. Илис гіелабад архуси къанч сунела хъучивад чариубли, шагъарлизи льявкъуси, Киренализивадси Симон бикіуси адамлизи гіелахъахъиб. ²⁷ Гіисас гіелабад льякъути бахъал халкъ, илдачил барх хъунул адаптира, лебри. Илди чучи саби бирхъули, Гіисас яс бирулри. ²⁸ Илдачи шуряхъили, Гіисани иб: «Ярусалимланти! Ну багъандан мадисудаяну, хіуша ва хіушала дурхіни багъандан дисеная!» ²⁹ „Жугъантира, дурхіни хіебаркъибтира, дурхіни хіебухъахъибтира талихічебти саби!“ – или, адамти бикіести бурхіни чесадиули сари: ³⁰ Илхіели дубуртачи дугъабизурли, бикіар: „Нушачи гъятідухъеная!“, музурбази бикіар: „Нуша дигіандарабая!“ ³¹ Эгер ара-сагъси галгалис илгъуна биралли, берубси галгалис се баресара?»

Гіса хіябтіерхъаличив

³² Гісачил барх кабушес аркути кіел гъатіи къачагъ лебри. ³³ Илди Голгофа бикіуси мерличичи сабаибхіели, Гіса илав хіябтіерхъаличи чеветяхъиб. Къачагъунира – ца Илала балуї шайчи, цархіил – алгъай шайчи чебетяхъиб. ³⁴ Гіисани, лаг зубрачибахіра хіеръили, иб: «Дудеш! Ишдани чули се бирулилра балули ахіенну, ишдачивад хіу чевверхи!» Бургъантани биалли, Илала палтар, чіалабушили, чула ургар дуртіулри. ³⁵ Халкъ тіашкабизурли илдачи хіербикіулри. Тямадаби биалли, Гісачира хіербикіули, Иличиб дукарбирхіулри: «Сунени цархіилтира уцахъули вирину, эгер Сай Аллагъли чеввикібси Масихі виалли, виралли, гъанна Сунени Сайра верцахъабгу». ³⁶ Гъамбиубли, ціикіти чягъирра гъадурцули, бургъанти Гісачиб къугънабиркъулри

ва ³⁷ Илизи бикІулри: «Нагагъла ХІу жугъутІунала пача виадли, ХІуни ХІура верцахъес виигу».

³⁸ ГІсала бекІла чедиб «ИШ ЖУГЪУТУНАЛА ПАЧА САЙ» – ибси белкІра лебри.

³⁹ ХІябтІерхъаличи чебетяхъибтазивад ца къачагъ, Иличи вайтІа вехІра вилзули, викІулри: «Марлира, ХІу МасихІ сайрив? ХІебиалли, ХІура нушара дерцахъаба!» ⁴⁰ ЦархІил биалли, илис виргулри: «АллагълигІивалра хІу уруххІекІулрив? ХІедгъуна танбихІ Илисра барилигу? ⁴¹ Нушаб барибси танбихІ – бархъси саби. Иличиб буресигъуна гІяйибалра агара». ⁴² ГІур ГІисачи дугъайзур: «Арикар! Пача ветаурли вакІибхІели, ХІуни нура гъаникахъаба». ⁴³ ГІисани жаваб чарбатур: «ХІу ишбархІил Набчил варх алжайзив вируд».

⁴⁴ ХІерейсла замана биалра, лебил дунъяличи цІябдеш чебакІиб. Ил цІябдеш хІери гІергъи сягІят хІябал дикайчи калун. ⁴⁵ СенкІун берхІиличи дяхІцІи чебихъун. Аллагъла хъулибси пардав гъярбердили кІибайкабиуб. ⁴⁶ ГІисани ахъси тІамаличил вявъиб: «Дила жан ХІела арилизи лугулра!» Илди гъайра дурили, ГІиса таманкайуб.

⁴⁷ Илаб бетаурси чебаили, бургъантала даршла бекІли, Аллагълис дезабарили, иб: «Иш адам гъарли-марли сегъуналра гІяйиб агарси адам сайри!» ⁴⁸ ХІябтІерхъаличи чебетяхъибтаци хІербикІес бакІибти лебил халкъ чус саби хункІара бирхъули, хъали-хъайгІи арбякъун. ⁴⁹ Амма ГІиса валути, тядидили кабизурли, Иличи хІербикІулри, илдала ургаб Иличил барх Галилеялизибад бакІибти хъунул адамтира лебри.

Юсупли ГІиса хІяблизи мерлаварни

⁵⁰ Иудеяла Аримапея бикІуси шагъарлизивадси, сунес Юсуп бикІуси адамра вакІиб. Ил гІяхІси табиГІятла, бархъдеш дигуси ва Аллагъла Низам-зегъала дунъяличи хІерси адам сайри. Ил диванханализив чеввикІибси адам сайли хъалли, илаб ГІисас барес пикрибарибси танбихІ илини гІебхІебуциб. ⁵² Юсуп, Пилатличи вякъи, ГІисала жаназа арбухахъес ихтияр га или тиладиухъун. Илини жаназа убяхІасиб ва, капайзира бергурли, шурмазиб биркъубси, сунези гъалав чилра кахІейхъибси хІябла ухІна кайхъиб. ⁵⁴ ЖумягІ бархІира ахъили, сут бархІила бархІехъла замана бехІбирхъулри. ⁵⁵ Галилеялизибад ГІисачил бархли бакІибти хъунул адамтани Юсуплис гІелабад арбякъи гъар секІал – шурмазибси хІябра, ГІиса ила хІяриирхъуси тяхІярра чедаиб. ⁵⁶ ХъайгІи чарбиубли, илдани гІяхІси тІемла гІявадешра, цархІил секІалра хІядурдариб. Сут бархІи, Дурхъаси Жузлизибра маслигІятбариван, илди паргъатли хъайгІиб калун.

БацІси хІябличи хъунул адамти ва Петр бакІни

24 ЖумягІла цаибил бархІи савли шала шикълис абизурли, хІядурти чула ваяхІра касили, хІябличи арбякъун. ² Ила бакІибхІели, хІяб гъабарес кабихъибси къаркъала гІена ца шайчибяхІ убкасилри. ³ БухІна абацІибхІели, илаб Арикар ГІисала жаназа хІебаргиб. ⁴ Биубсиличи тамашакабирули, хъунул адамти тІашбизурхІели, хапли илдала гъалаб шалали ухути палтарличилти кІел адам багъарбиуб. ⁵ УркІабухъи, бургира къухІдуцили, ванзаличи хІулби вякъаибти хъунул адамтаци илди дугъабизур: «ХІуша бекІибтала ургав мицІирси варгес умцІутирав? ⁶ Ил ишав агара. Ил хІяблавад айзурли арбякъун. Галилеялизив вирухІели Илини хІушази се бурибал гъанбикахъая, гъари. ⁷ „Инсаниятла Урши уцили бунагъкартала някъла ведлуга. Илдани Ил хІябтІерхъаличи чевтирхъу, хІябэсил бархІи Ил мицІирра кайрар“ – или, ахІенрив Илини хІушази бурибси». ⁸ Илдас ГІисани чузи дурибти гъай гъандикиб. ⁹ ХІябличибад чарбиубхІели, илдани гъар секІайчила вецІну цара вакиллизира цархІилтазира буриб. ¹⁰ Илди хъунул адамти, хІера, ишди сабри: Мария Магдалина, ИГІяйна ва Якъубла неш Мария. Илдачил бархли калунти цархІилти хъунул адамтанира тятп илкъяйдали сабри бурибси. ¹¹ Амма вакилтас илдани дурибти мехІурти гъай сартиван дизур, хъунул адамтаци бирххІеур. ¹² Бархъси секІал, Петр илмадан дуцІли хІябличи вякъун. БухІна хІеръибхІели, илар мер-мерла лайдакІибти жулгъала бутІницун сарри чедаибти. Биубси анцІбукъличи тамашакайубли, ил хъайгІи чариуб.

Еммауслизи аркъуси гъуникад

¹³ ХІера, баягъи ил бархІи Ярусалимличибад вецІну цара версла гъарахъси Еммаус бикІуси шилизи гъуникад хъурали аркъути кІел мутаГІялим ¹⁴ детаурти лерилра илди анцІбукълумачила гъайкабикІулри. ¹⁵ Илдала гъайра жалра демжурхІели, ГІиса илдачи гъамиубли, илдачил вархли ватихъиб. ¹⁶ Амма илдала хІулби сукъуркайубтиван, илдани Ил вагъхІегъур. ¹⁷ ГІисани илдази иб: «Гъуни-гъуникад хІушала се ихтилата?» Илди хумарти дяхІ-сипатра кадуцили тІашбизур. ¹⁸ Илдазивадли ца, сунес Клеопа бикІусини, ГІисас жаваблис иб: «Ишаб цабархІи бетаурси секІайчила селра хІебалуси, марлира, лебилра Ярусалимлизив ца хІуцун ургуд?» ¹⁹ ГІисани хъарбаиб: «Гъай селичилав?» Илдани иб: «Назаретлан ГІисас биубсиличила сари. Ит баркъудилизив ва Сунела гІилмулизив Аллагълара халкълара гъалав асилси идбаг сайри, ²⁰ Амма хала хашишунанира халкъла тямдабанира Ит

кавшахъес ведиб. Ил арукили хІябТІерхъаличи чеветяхъиб. ²¹ Ил Израиллис сунени берцудира хили вакІес гІягІниси Баягъи Ит Арикар сай ибси нушала умутра балли лебсири. Амма гъачам илди лерилра иличирли таманхІедиуб: ил бетаурхІейчибад гъанна хІябэсил бархІи бехІбихъили саби. ²² ГІурра нушала хъунул адамтанира нуша тамашадиахъубра. Савли шала шикълис илди хІябличи арбякъи уббухъун. ²³ Илаб ГІисала жаназа баргхІебаргили чарбиубхІели, валлагъ, чус малаикунира гъаласабизур, чузи Ил мицІирли виънира бурибти хабуртира адердахъиб. ²⁴ Нушала адамтазибад цацабехІли, ила хІябличи хІерэс бякъунтанира, гъар секІал дурусли хъунул адамтани бурибси тяхІярли даргиб. Амма илдани сай ГІиса чехІеиб». ²⁵ ГІисани илдази иб: «ХІябра духудеш камти адамти дуили леррая! Идбагунани дурибти гъар секІайчи дирхаэс илцадра дебали къиянни балан! ²⁶ Сунела ахъси даражаличи аэс багъандан аХІенрив, гъатІи, МасихІли лерилра илди къияндешуни дяхІаэс гІягІнити?» ²⁷ Дурхъаси Жузлир Сунечила бурути лерил мерани ГІисани Мусачивад вехІкайхъили лебилра идбагуначила илдас баяндариб.

²⁸ Саби букъес къасбарибси шилизи бетіэсбяхІибхІели, ГІисани вашес дигусиладариб. ²⁹ Амма илди чучил варх калахъес Илизи тиладибикІесбяхІиб ва «БархІехъла замана гъамбикІулину, нушачил варх кален» – или, дугъабизур. ГІиса юртлизи ацІиб, илдачил калун. ³⁰ Илдачил варх къумурла мякъла кайибхІели, ГІисани касили къацІ, баркатлабариб ва кІибайбарили илдази бедиб. ³¹ ИлхІели илдала хІулби гъаргдиуб, илдани ГІиса вагъур. Амма илдани Ил чехІейулри. ³² ГІур илдани цализи-цали иб: «Ишини нушачил вархли гъуникадли вашухІели ва нушази Дурхъаси Жузла белкІани баяндирухІели, нушала уркІбас буцІархІейгив, гъатІи?!» ³³ Илди илмадан абизур, Ярусалимлизи чарбиуб. Шагъарлизи бухІнабухъунхІели, илаб баягъи вецІну цараличил барх цархІилти мутагІялимтира цалабикили баргиб. ³⁴ Илдачи дугъабизурли, цалабикитани иб: «Арикар хІяблавад айзни марси саби. Ил сунес гъаласайзурли Симоннира чеили сай». ³⁵ ГІур илдани гъуйчиб бетаурсиличила ва къацІ кІибайбирухІели чули ГІиса вагъниличила буриб.

ГІиса вецІну цараличи вакІиб

³⁶ Илдани ил бурухІели, хапли ГІиса илдала ургав вагъариубли, илдази иб: «ХІуша даршули дирабая!» ³⁷ Чус гъаласабизурси рухІла къаралди саби или гъанбикили, илди уркІбухъи хІяккабизур. ³⁸ ГІисани илдази иб: «ХІуша илцад дебали сен уркІдулхъутирая? ХІушала уркІби гъаннара васваслив? ³⁹ Дила някъбачира къяшмачира хІеръая, иш – Ну сайра. Набчи гачдикеная, хІеръая: Ну – мицІирси Жан сайра. РухІла Дилагъуна я къаркъала, я лигуби дирхІерни хІушанира баладая». ⁴⁰ Илира или, ГІисани илдази Сунела някъби-къяшми чедаахъиб. ⁴¹ Бахъ разибиубдешли, илди бирхаэс хІебирулри ва тамашакабиублири. ИлхІели ГІисани илдази хъарбаиб: «Ишаб хІушала беркеси секІал лебу?» ⁴² Илдани Илис берцІибси бялихъла кесек бедиб. ⁴³ Илдини сасили, илдира хІеркабикІахъули, ил беркун.

⁴⁴ ГІур илдачи дугъайзурли, ГІисани хъарбаиб: «Нуни хІушази Мусала Низамлизиб Набчила белкІунсира, идбагунала жузазир ва Забурлизир дурибтира мардиэс гІягІнити диъниличила бурни гъанбиркуру?» ⁴⁵ ГІисани мутагІялимтас лебилра Дурхъаси Жузла мягІна баянбариб. ⁴⁶ Илдази Илдини иб: «МасихІличи гІязабтира чевкъар, вебкІили гІергъи Ил хІябэсил бархІи мицІирра кайрар. ⁴⁷ Илала Ула хІурматлис Ярусалимличибадли бехІбихъили, лебилра халкъани чула гІямрура дарсдарили, бунагъуни хасардатахъес багъандан Аллагъличи дугъабизахъес жибарес гІягІнибиркур. ⁴⁸ Илди лерилра секІал хІушала хІулбала гъалар детра детаур. ⁴⁹ Дила Дудешли хІушаб чесибти секІал Нуни гъанна дурхъулра, хІушаб чедибадли бархъибси къуват хІушази кабацІайчи шагъарлизир каленая».

Зубрази арукни

⁵⁰ ГІисани илди шагъарлизибад гъунибатурли, Вифаниялизи бикайчи вякъун. Някъбира ахъдуцили, ГІисани илди баракатлабариб. ⁵¹ Илди баракатлабирухІели, Ил илдачивад гъарахъиркес ва зубрачи арцурли чевяхІихъесяхІиб. ⁵² Илдани Илис икрамбариб. ГІур илди лебгІеб харидешличил Ярусалимлизи чарбиуб ⁵³ ва Аллагъла хъулиб мурталра Аллагълис дезабикІи.